

Älönžil n-Ÿisa Älmasex wa iktäb Mätti

Ättarex n-Ÿisa Älmasex (Luqa 3:23-38)

¹ Ättarex n-ŸisaÄlmasex wa n-ahäya n-ännäbi
Dawöd d-ahäya n-Ibrahim da:

² Ikräš Ibrahim Isxaqq,
Isxaqq ikräš Yaqub,

Yaqub ikräš Yähuda d-ayötma-s wi iyyädnen.

³ Yähuda ənta, təkräš-as hänne-s Tamar, Faris d-
Zira.

Ikräš Faris Xäšrun,
ikräš Xäšrun Aram,

⁴ ikräš Aram Aminädab,
ikräš Aminädab Nasun,
ikräš Nasun Sälmun.

⁵ Ikräš Sälmun d-hänne-s Rahab Boḡaz,
ikräš Boḡaz d-hänne-s Rutt Ÿubäyd,
Ÿubäyd ənta, ikräš Yasa.

⁶ Yasa ənta a oräwän ämänokal Dawöd.
Dawöd ənta, ikräš d-hänne-s n-Urya
Suläyman,

⁷ Suläyman ənta ikräš Raxäbyäm,
Raxäbyäm ikräš Abya,
Abya ikräš Asaf,

⁸ Asaf, ikräš Yähušäffat,
Yähušäffat ikräš Yoram,
Yoram ikräš Uzya,

⁹ Uzya ikräš Yotam,
Yotam ikräš Axaz,

Axaz ikräš Ezekya,

¹⁰ Ezekya, ikräš Mänase,

Mänase ikräš Amon,

Amon ikräš Yozya,

¹¹ Yozya ikräš Yäxunya d-ayətma-s wi iyyädnen.

Äzzäman-wen-däḡ a däḡ-əttəkfälän käl-Işrayil
s-äkall wa n-Babilun.

¹² Darät atəkfəl-wen-däḡ ad-ikräš Yakonya
Äşşälat,

Äşşälat ikräš Zurubabil,

¹³ Zurubabil ikräš Abihud,

Abihud, ikräš Ilyakim,

Ilyakim ikräš Yazur,

¹⁴ Yazur ikräš Ässäddiq,

Ässäddiq, ikräš Yahim,

Yahim ikräš Үəlihud,

¹⁵ Үəlihud ikräš Үəlyazär,

Үəlyazär, ikräš Mittän,

Mittän, ikräš Yaqub.

¹⁶ Yaqub-en-däḡ a äshäyāwän Yusəf wa n-ähäləs
n-Märyäma

ta toräwät Үisa wa s-itawänna Älmasex.

¹⁷ Үur-äzzäman wa n-Ibrahim təkkəd
äzzäman wa n-Dawəd, okäynät märawät
əzzurəyaten d-əkkožät; Үur-äzzäman wa n-
Dawəd təkkəd äzzäman wa n-atəkfəl n-käl-
Işrayil s-äkall wa n-Bäbilun, okäynät märawät
əzzurəyaten d-əkkožät; Үur-äzzäman daḡ wa n-
atəkfəl n-käl-Işrayil s-äkall wa n-Babilun təkkəd
äzzäman wa n-tiwit n-Älmasex, märawät
əzzurəyaten d-əkkožät a okäynen.

*Tiwit n-Ŷisa Ālmasex
(Luqa 2:1-7)*

¹⁸ Ēnta da əmmək wa s-iwa Ŷisa Ālmasex: ma-s Märyäma, ittar-tät ähaləs s-isəm-net Yusəf māsan dāḡ-a-wa itäj Mässināḡ s-tärna n-Unfas Šäddijän, təkrəš ənniyät härwa wär toher d-Yusəf isəftaḡ.

¹⁹ Yusəf-i n-anəmmutär-net, ähaləs n-ämaḡdal a ämoos, inhäy a-s tanfust-den-dāḡ ḡas, ässosäm, wär t-illa ere dāḡ-ija isälan ed wär-irha ad-tät-ikšəf. Təssəba n-a-wen-dāḡ a fäl t-dd-ijjāš ənniyät n-ad-hin-izjār isälan-net dāḡ-ufär.

²⁰ Izinəzjum dāḡ-a-wen-dāḡ a-s has-dd änfaläl änjälos n-Emäli dāḡ-täharjit, inn'-as: «Yusəf Ägg-Dawəd, wär täksudäd adubən n-Märyäma fäl-a-s ənniyät wa la, Unfas Šäddijän a-s əssəbab-net,

²¹ ad-təkrəš alyaḡ, təjəd-as isəm Ŷisa fäl-a-s ənta a madän-ixləs tamətte-net dāḡ-ibäkkadän-net.»

²² A-wa iket-net ija i-ad-itbət a-wa innä ännäbi n-Mässināḡ iyyän a-s innä:

«Innä Emäli:

²³ <Säjdät!

Ad-təkrəš tämawaḡt wärät təzzey meddən ənniyät,

təkrəš alyaḡ, iwär-t isəm Imanuwil>.

Imanuwil, älmāḡna-net: Mässināḡ, izzāḡ-dd jere-nāḡ.»

²⁴ Inkär-dd Yusəf dāḡ-eḡəs, ämešäl a-wa has-innä änjälos n-Emäli, izzəzläy-dd Märyäma,

25 māšan wār dār-s oher isəftaḡ har təjṛāw eḡāf-net, təkraš alyaḍ, āswār-t isəm ʿİsa.

2

Imusānān wi dd-fälnen ijəj, əmmaḡān i-ʿİsa

¹ Äzzāman wa d-āmoos Harudəs ämänokal n-teje ta n-Älyāhudəyāt ad-iwa ʿİsa dāḡ-taḡrəmt ta n-Bätlehäm häť teje-ten-dāḡ. Äzzāman-en-dāḡ daḡ ad-dd-osān imusānān dd-falnen emäynāj, əkkan-dd Yārussālam,

² sastanān äddināt d-ämānokāl n-kāl-Älyāhud wa s-iket iwa s-ənhäyān atār-net a-s dd-izjār s-emäynāj; əllāḡen-asān a-s ass ad-dd-jān i-ad-t-əḡbədän.

³ Isl' ämänokal Harudəs i-mājṛād-wen-dāḡ ḡas, iššəwwāš ənta d-kāl-Yārussālam iket-dāḡ-nāsān.

⁴ Äsdāw-dd ḍarāt-a-wen e d t-illām ämänokal n-kāl-tikutawen d-älḡalim n-Äṭṭāwrāt, issəstāntān d-edāgg wa dāḡ-mad-iwəy Älmasex.

⁵ Ənnān-as: «Bätlehäm ta häť teje ta n-Älyāhudəyāt a dāḡ-mad-iwəy fäl-a-s iktab ännābi iyyān a-s, inna Mässināḡ:

⁶ <Ya Bätlehäm, kāmm-i häť teje ta n-Älyāhudəyāt, tidət, wār təkned təmḡäre jer-tiḡärmaten ti n-kāl-Älyāhud māšan, kāmm-i-dāḡ əndārrāt ad-dd-mad-izjār ämänokal wa madān-izar i-tamət-te-nin ta n-kāl-Işrayil, isəssiḡəd-tāt.> »

⁷ Islä Harudəs i-a-wen ɣas, ikkäs-dd imusänän-winnin s-takše, ad-tän-ikann asəstan d-əzzäman wa dăɣ-hasän-dd-änfaläl atär wa s-ənnän ənhayän-t.

⁸ Issəgl'-en ɖarät-a-wen, dăɣ-a-s hasän-inna: «Äkkät Bätlehäm, təknoḿ asəstan d-alyaɖ, afäl t-təjrəwäm, əqqəlät-ahi-dd, təjəm dăɣ-i isälan i-ad-t-äkkäɣ, ärkäɣäɣ-as näkk-dăɣ.»

⁹ Eslän i-a-wa inna, əglän. A əndärrän, atär-wənnin ənhäyän s-emäynäj-da-dăɣ, äzzar-asän har tanämhäla n-ehän wa iha alyaɖ.

¹⁰ Ənhäyän atär-en, əknän tedäwit.

¹¹ Əjjäšän ehän wa jənnəj-ənhäyän atär, ənhäyän alyaɖ d-ma-s Märyäma, ärkäɣän-as, ad-t-ɣabbädän. Orän ɖarät-a-wen tisətwar-näsän, əkkäsän-as-dd tibəddar n-oräɣ d-matälxer d-telɖədt.†

¹² Əllan-t dihen-dăɣ a-s täni-issəlmäd Mässinäɣ dăɣ-täharjit s-udaɣnet i-ad-əqqəlän Harudəs. Jän tabarät tiyyät säl ta dd-jän, əqqälän äkall-näsän.

Ajiwəɖ s-Miṣra

¹³ Əglän imusänän ənnin ɣas, änfaläl-dd änjälos n-Emäli i-Yusəf dăɣ-täharjit, inn'-as: «Yusəf, ənkär, əɖkəl alyaɖ d-ma-s, jawäɖ s-äkall wa n-Miṣra, təzzäɣäd dihen-dăɣ har asäl wa d-hak mad-ännäɣ täddoobed ad-dd-təqqəläd fäl-a-s alyaɖ-i, itammäɣ-as Harudəs i-ad-t-änɣ.»

¹⁴ Inkär, iɖkäl alyaɖ d-ma-s, ähona s-Miṣra ehäɖ-wen-dăɣ,

† **2:11 2:11** Aɖutän-wi-dăɣ, itawänn'-asän daɣ: Miri (myrrhe dăɣ-Təfränsit).

15 izzäx dihen har äba Harudəs. Ij'-a-wen i-ad-itbət a-wa innä ännäbi iyyän a-s innä, innä Emäli:

«Ëyrex-dd Rure-x i-ad-dd-izjār Mişra.»

Aratän wi issänya Harudəs

16 Ilmäd Harudəs a-s əssəswädän-t imusänän ed wär t-dd-olesän uxel xas, ikäf s-ađkär. Omär älwäqq-wen-däx s-ad-ämmätän ilyadän wi hänen Bätlehäm d-attayän-net t-əllanen daw-əssin iwətyan ed täqqän-ten-däx a togdähät d-ta s-has-ənnän imusänän, änfalälän-asän-dd atär däx-s.

17 Ämoos a-wen-däx ijän a ässiitbätän a-wa innä ännäbi Yirmiya† a-s inna däx-əlkəttab n-Mässinäy:

18 «Ij' eməsli n-tisnant däx-axrəm wa n-Rama, ja tahäla d-tikälelen.

A-wa Rähila hallät ilyadän-net, äbä-dd a tät-isəssisumän, ed ilyadän-net, ämmun iket-däx-näsän.»

Iqqäl-dd Yusəf äkall wa n-Işrayil

19 Äba Harudəs xas, änfaläl-dd änjälos n-Emäli i-Yusəf däx-täharjit däx-äkall wa n-Mişra, inn'-as:

20 «Ədkəl alyaq d-ma-s ämära, təqqələd äkall wa n-Işrayil ed äddinät wi s-käla tattarän iji n-iman-net, äba-tän.»

21 Inkär Yusəf, idkäl alyaq d-ma-s, iqqäl äkall wa n-Işrayil.

† 2:17 2:17 A-wa ännäbi dd-äzzarän i-Yisa, äloläy däx-isälan-net sädisät timaq n-awätay dat-tiwit-net.

²² Mășan, islă a-s Erkilyas ägg Harudəs a ämnakälän dăḡ-edägg n-ti-s fäll-teje ta n-Älyähudəyät ḡas, igdäl-as əmməttəsu ad-tăt-äkk i-ad-dăḡ-s izzăḡ. Änfaläl-as-dd Măssinăḡ dăḡ-tăharjit, inn'-as ad-äkk teje ta n-Galila.

²³ Iwwăd-in teje-ten ḡas, izzăḡ dăḡ-taḡrəmt s-isəm-net Năşirăt. Ija a-wen i-ad-itbət a-wa ənnän ännăbitän fäll-Ÿisa a-s ənnän:

«Ad-t-iwăr isəm: U-Năşirăt.»

3

Älxuṭbăt wa ija Exya wa n-Enəsselmăḡ (Marqəs 1:1-8; Luqa 3:1-18; Exya 1:19-28)

¹ Išilan-win-dăḡ d-izzăḡ Ÿisa taḡrəmt ta n-Năşirăt, ad-issəntă Exya wa n-Enəsselmăḡ ämaşal-net, ijanna i-äddinăt dăḡ-tenere n-teje ta n-Älyähudəyät:

² «Utabăt fäl-a-s Təmmənəya n-Măssinăḡ, tohăz-kăwän-dd.»

³ A-wen-dăḡ islän Exya, a dăḡ-ăssewäl ännăbi Saya,[†] a-s innă:

«Ad-t-iməl ähaləs äsiḡären dăḡ-tenere, ijanna i-äddinăt:

<Äknăt tabarăt i-Emăli, səssiḡədăt data-s ibaran-net.> »

⁴ A-s ităjj a-wen-dăḡ, ilsa Exya asälso iknan s-elăm n-amnəs warän amzadän, ijbas s-taməntəka n-elăm, iddar s-taşwält d-torawăt.

[†] **3:3 3:3** A-wa ännăbi dd-äzzarän i-Ÿisa, äloläy dăḡ-isälan-net əssayăt timaḡ n-awätay dat-tiwit-net.

⁵ Tisən-t-dd äddinät dd-falnen aḡrəm wa n-Yārussālam d-teje ta n-Ālyāhudəyāt iket-net d-idāggan iket-nāsān wi ohāznen ejānš wa n-Ÿurdəni,

⁶ ad-tilḡun ibākkaḡān-nāsān dat-tamətte, isalmaḡ-tān Exya dāḡ-ejānš wa n-Ÿurdəni.

⁷ Ijrāh-in Exya a-s tamətte ta t-dd-təkkāt, han-tāt äddinät äjjootnen la taggayt ta n-kāl-faris d-ta n-kāl-sadus ārhanen ad-tān-isəlmāḡ, innāḡ-dd sār-sān, inn'-asān: «Ya taššālen-idāḡ! Wādden tənnām təmsādām! ʔyya, a tārham ad-tətwəsəlmāḡām i-ad-təfələm daw-āššərəḡa n-Māssināḡ wa s-išwar fälla-wān dd-oḡa? Lāḡātāt-ahi, mi kāwān-issəlmādān s-a-wen?

⁸ Sətbətāt tātubt-nāwān s-timašalen āhuuskātnen,

⁹ wār täsfällām fäll-tənnā n-a-s əzzurəyāt n-Ibrahim a tämoosām ed afāl tāqqāl s-isālan n-əzzurəyāt ḡas, Māssināḡ, äddoobāt ad-isəmməskəl tihun-ti-dāḡ hannāyām, ixlək-dd dāḡ-snāt əzzurəyāt i-Ibrahim.

¹⁰ Äjät ənniyāt fāl-a-s emm n-tutāla āru d-insa fäll-ikewān n-ihəškan, e d t-illām ahəšk wārān itirəw aratān iha ālfāyda, ad-hin-ättānkāḡ, itwəjār-in dāḡ-efew.

¹¹ Näkk, aman a dāḡ-kāwān-salmaḡāḡ i-ad-umas a-wen ašāmol n-tātubt-nāwān māšan, ilkam-ahi āhaləs hi-ijan mijraw wa-dāḡ s-wār-ānhājjāḡ wāla-dāḡ d-ad-əḡəsāḡ issal n-tifādelen-net, ənta, Unfas Šāddijān d-efew a dāḡ-kāwān-mad-isəlmāḡ,

¹² ittaf tesāyt-net ta s-mad-hin-izuzzār allon-

net, isədəw ətəxam wa oläxän dāx-ejänd-net, irməs ahošār wa wār-ih' älfäyda, ijär-t-in dāx-efew ähijäljälän härkuk.»

Atwəsəlmāx n-Ÿisa dāx-aman
(*Marqəs 1:9-11; Luqa 3:21-22*)

¹³ Dāx-a-wen-dāx a dd-ifäl Ÿisa teje ta n-Galila, ikkā-dd Exya i-ad-t-isəlmāx dāx-ejānš wa n-Ÿurdəni

¹⁴ māšan, unjāy Exya s-a-wen, änn-ak, inn'-as: «Näkk a ämiḡatārän s-ad-hi-səlmāxād dāx-aman, ḡas əndek e-d il' əmmək n-a-s kāyy a hi-dd-itakkän i-a-wen?»

¹⁵ Inn'-as Ÿisa: «Ämära-dāx, əqbəl s-a-wen ed əmmək-wen-dāx a-s mad-nämašäl a-wa oḡädän, irha Mässināx.» Ij'-as Ÿisa mäjräd-wen-dāx ḡas, issəlmāx-t Exya.

¹⁶ Ätwäsälmāx Ÿisa, diha-dāx dd-izjār aman, ad-dd-ämerän išənnawän dāx-təssəba-net, inhāy Unfas Šaddijän n-Mässināx har fälla-s dd-äzzubbät dāx-ännuḡ n-tedäbert mällät.

¹⁷ Dāx-tamäzäyyat-ten-dāx ad-dd-ijmäḍ emäsli išənnawän, innän: «A-wa Rure-ḡ wa əkneeḡ tārha, ənta a dāx-äsriwän iman-in.»

4

Äžžurräb Iblis Ÿisa
(*Marqəs 1:12-13; Luqa 4:1-13*)

¹ Oḡäd Unfas Šaddijän Ÿisa ḍarät-a-wen s-tenere i-ad-t-ižžurrəbət Iblis.

2 Ija dihen əkkozät timərwen n-ehäd d-aşäl, äzum, wär-ikša, wär-iswa. Şamad tokay täqqän-ten-däx, ad-älluž.

3 Älwäqq-wen-däx ad-t-ohäz Iblis-i n-älmužärib, inn'-as:

«Şamad käyy a-s Rure-s n-Mässinäx, änn i-tihun-ti-däx ad-umasnät tijəlwen!»

4 Inn'-as Үisa: «Iktab däx-mäjräd n-Mässinäx a-s:

<Tämudre n-əgg-adəm, wär təmdä fäl tetäte җas, iddäret daҗ s-e d t-illäm mäjräd dd-izjarän emm n-Mässinäx.> »

5 Iwwäy-t Iblis ɖarät-a-wen s-aҗrəm wa şäddijän n-Yärussälam, ij'-e fäll-afälla n-ehän n-ämudd wa mäqqārän, inn'-as:

6 «Şamad käyy a-s Rure-s n-Mässinäx, äyy iman-näk s-äkall ed iktab däx-mäjräd n-Mässinäx a-s:

<Ad-sär-k dd-amär Mässinäx änjəlosän-net əkbəlän-käy däx-ifassän-näsän i-ad-wär hak-rəssəl wəla-däx təhunt tiyyät җas.>

»

7 Inn'-as Үisa: «Iktab daҗ däx-mäjräd n-Mässinäx a-s:

<Wär-e tarəməd Eməli-näk, Mässinäx.> »

8 Iwwäy-t daҗ Iblis s-aɖaҗ iyyän iknan aɖkul, issəkn'-e əddəwəlän n-əddunya iket-net d-älxurmät-näsän, inn'-as ämära:

9 «Hakkäx-käy a-wa-däx iket-net, afäl dat-i tärkäxäd, təxbädäd-ahi.»

10 Inn'-as Үisa: «Iblis, əjəj-ahi; iktab däx-mäjräd n-Mässinäx a-s:

<Äxbəd Eməli-näk Mässinäx,

ənta ɣas a fälla-k ilan älxidmät.> »

¹¹ Oyy'-e Iblis darät-a-wen, osän-t-dd änjälosän ässaɣät-wen-däɣ, äxdämän-as.

Sänto n-ämašal n-Ÿisa däɣ-tayrəmt ta n-Qäfärnaxum

(Marqəs 1:14-15; Luqa 4:14-15)

¹² Islä Ÿisa atärməs n-Exya wa n-Enəsselmäɣ ɣas, ikkä teje ta n-Galila.

¹³ Izjär tayrəmt ta n-Nəširät, iglä izzäɣ ta n-Qäfärnaxum, a-wen tayrəmt hat asälim n-ejänš wa n-Galila däɣ-attayän n-teje ta n-Ÿabilun d-ta n-Naftali;

¹⁴ ämoos a-wen a ässiitbätän mäjräd wa ija ännäbi Saya† a-s innä:

¹⁵ «Ya käl-Ÿabilun, ya käl-Naftali!

Käwäneḍ-i hänen asälim d-ejänš wa n-Galila,
Käwäneḍ-i hin-əllanen i-ejänš wa n-Ÿurdəni,
säjdät!

Käwäneḍ-i n-käl-teje ta n-Galila əzzäɣän
inəzzulam,† säjdät!

¹⁶ Tamətte ta hät tihay, ämläwläw-dd fälla-s
ännur mäqqārän,
äddinät daɣ wi s-käla əzzäɣän tihay ti hänen
tamättant,
ašäl-i, äzzubbät-dd fälla-sän ännur.»

† **4:14 4:14** A-wa ännäbi dd-äzzarän i-Ÿisa, äloläy däɣ-isälan-net əssayät timaḍ n-awätay dat-tiwit-net. † **4:15 4:15** — Ÿur-käl-Älyähud, ere wärän ämoos ägg-Älyähud s-aläšäl meɣ ere wärän ilkem i-äddin-näsän, iket-net, änəzzalim a ämoos. A-wen-däɣ a fäl tiwsaten ti iyyäḍnen iket-näsnät, ti n-inəzzulam. — Ašäl-i-däɣ, änəzzalim, äkafär (ere wärän issen s-Mässinäɣ).

17 Ƴur-dihen-däx ad-issenta Ƴisa ämašal-net, ixattäb, ijanna i-äddinät: «Utabät fäl-a-s Tëmmənəya n-Mässinäx, tohäz-dd.»

*Inəttulab n-Ƴisa wi äzzarnen
(Marqəs 1:16-20; Luqa 5:1-11)*

18 Irjaš Ƴisa ašäl iyyän däx-asälim n-ejäňš wa n-Galila a-s inhäy əssin ayətmatän: Simyon wa s-itawänna Bətrus d-äñña-s Idris, təjjarän tātart-näsän däx-aman ed iməhhuyya n-imānan a ämoosän,

19 inn'-asän: «Əlkəmät-ahi, ad-käwän-äjäx meddēn sār-i dd-sadawnen äddinät i-ad-tän-äxləsäx.»

20 Oyyän titarren-näsän älwäqq-wen-däx, əlkämän-as.

21 Illa-hin i-dihen, oläs dax Ƴisa ahānay n-əssin ayətmatän iyyäd: Yaquub d-äñña-s Exya, han turäft n-aman əntāneđ d-abba-näsän Zäbdi, samākrasän titarren-näsän; ixr'-en-dd s-iman-net əntāneđ-däx.

22 Oyyän abba-näsän hakd turäft n-aman dihen-däx, əlkämän-as älwäqq-wen-däx.

*Äzozäy Ƴisa imarhinän däx-teje ta n-Galila
(Luqa 6:17-19)*

23 Älliil Ƴisa teje ta n-Galila iket-net, isayra äddinät däx-ihānan n-äddin wi n-käl-Älyähud, ixattäb isālan n-Älənžil n-Tëmmənəya n-Mässinäx, izizuy äddinät däx-turhənnawen-näsän d-älxiבän-näsän.

24 Intäj isəm-net dăḡ-ākall iket-net har äwwäd Surya. Tamawayän-dd sār-s imarhinän d-inayabän d-iməlsan d-wi təjrāw tašākärkärät d-inəbdan, izizuy-tän iket-dăḡ-näsän.

25 Dăḡ-asikəl-net, təlcam-as tamətte täjjeet han äddinät dd-falnen teje ta n-Galila d-tidbi ti n-märawät; iyyäd, Yärussalam d-Älyähudəyät d-illa-hin i-Ḣurdəni sihen ad-dd-falän.

5

Älxuḡbät wa ija Ḣisa fäll-afälla n-tadaḡt

1 Inhäy Ḣisa əjut n-tamətte ta has-təlkämät ḡas, iwwän tadaḡt tiyyät, äqqima, əkkän-t-dd inəḡḡulab-net, äqqimän edes-has;

2 idkäl mäjräd, ad-tän-isaxra, ijann'-asän:

Tisundad

(Luqa 6:20-23)

3 «Təndəd i-wi äzoḡnen iman-näsän dat-Mässinäḡ

ed Təmmənəya n-Mässinäḡ ti-näsän.

4 Təndəd i-wi äsninnen dăḡ-iman-näsän ed ad-ismaḡän ulhawän-näsän.

5 Təndəd i-wi äzednen ha tazidert ed ad-əkusən äkall.

6 Təndəd i-wi inaqq laḡ d-fad n-asəḡbat n-iqqud ed ad-äyyäwänän dăḡ-a-wa s-tammäḡän.

7 Təndəd i-wi s-ha tähanint ulhawän-näsän ed ad-hasän-aḡən Mässinäḡ tähanint.

8 Təndəd i-wi s-šäddijän ulhawän-näsän ed ad-ənhəyän Mässinäḡ.

9 Təndəd i-wi n-käl-älḡafyät ed ad-tän-iwār isəm: dăḡg-Mässinäḡ.

10 Təndəḍ i-wi taməḍraynen dəḡ-təssəba n-
iḡḡud-nəsän

dəḡ-erhet n-Mässinəḡ

ed Təmmənəya n-Mässinəḡ, ti-nəsän.

11 Təndəḍ-awän e-d kəwän-gaggärän äddinät,
tiḡəzzəbun-kəwän,

jannen fälla-wän s-bahu

e d t-illäm a läbasän dəḡ-äddimmät-in.

12 Dəwätät, talwəm dəḡ-iman-nəwän ed ad-ijät

marušät-nəwän dəḡ-älžännät,

älḡizabät-wen-dəḡ kəwän-säknen äddinät ašäl-
i-dəḡ,

a əssəknän i-ännäbitän wi hawän-dd-
əzzarnen.»

*Imumənän, tesəmt d-ännur a ämoosän i-
äddunya*

(Marqəs 9:50; Luqa 14:34-35)

13 «Kəwänəḍ a-s tesəmt n-äddunya məšan,
tesəmt, afäl tät-təjmäḍ temḍe-net, ma s-tät-e-
isəsməm əwadəm? Ad-əbas t-illa a tənfa ar ad-
hin-täḍf, əfkəlfəkəlän-tät äddinät.

14 Kəwänəḍ a-s ännur n-äddunya. Aḡrəm ya
iwarän afälla n-aḍay wär mad-iffär;

15 äddinät, wär särmisän tefätelt təzzar, əjən-
tät daw-əkoss, änn-ak, əsadəf əsikakän a fäll-
tät-e-siləyän i-ad-əsimäləwləw ännur-net ehän
d-a-wa t-ihän iket-net.

16 A-wen-dəḡ a fäl, imləwləwet ännur-nəwän
kəwänəḍ-dəḡ, s-əmmək-en-dəḡ, dat-äddinät
i-ad-ənhəyän imarkedän-nəwän, səmḡärän
Abba-nəwän-i ihän išənnawän.»

Alämär wa äynayän d-wa ärəwän

17 Inn'-asän Үisa daɣ: «Wär teɣalät näkk, oseɣ-dd i-ad-hin-əkkəsəɣ a-wa innä alämär wa n-ännäbi Mosa d-a-wa ənnän ännäbitän wi iyyäðnen, asətbat-net a-s dd-oseɣ wädden anäxas-net.

18 Äsidätteɣ-awän a-s ad-iba išənnawän d-äkall, wär-äba wäla-däɣ tahnəqget wäla tätbäqget tiyyät ɣas däɣ-alämär n-Mässinäɣ a ikkäs wär-itbet a-wa däɣ-s ätwännän iket-net.

19 A-wen-däɣ a fäl ere änmäšräyän i-alämär wa däɣ-sän ojärän təmməðrit, meɣ ittär ad-išənnəməšrəy äwadəm iyyän s-a-wen-däɣ, äwadəm-en, ənta a madän-umas wa ojärän iba n-təfärre däɣ-Təmmənəya n-Mässinäɣ mäšan, ere itamašalän a-wa innä alämär, isalmad äddinät a-wa inna i-ad-t-ämašälän əntəneð-däɣ, äwadəm-en, ad-umas ämizär däɣ-Təmmənəya n-Mässinäɣ.

20 Ekkasəɣ-käwän däɣ-tayðärt n-a-s afäl wär-ojer iqqud-näwän wa n-älɣulam n-Ätṭäwrät d-käl-faris, xäram-awän ujəš n-Təmmənəya n-Mässinäɣ.»

*Aḍkär, iji n-iman, kəssən d-tenäšše
(Luqa 12:57-59)*

21 «Wädden, təslam a-s imɣarän-näwän wi n-ibda, ätwänn'-asän, inna Mässinäɣ: <Wär jed iman ed ere ijän iman däɣ, iwär-t uḍlem dat-Mässinäɣ>,

22 mäšan näkk, ənneɣ-awän a-s: ere ijjäš aḍkär fäll-ənɣa-s däɣ, iwar-t uḍlem, ere innän

i-əŋŋa-s: <Amäros>, äniihäjja s-ad-ämawäy s-äššärexa wa mäqqārān s-itawānna Sinhidrin† i-ad-itwəšräx; ere daḡ innān i-əŋŋa-s: <Təkšäfad>, äniihäjja d-ad-t-äks efew wa n-zohännäma.

²³ Afäl təkkeḡ ehän n-ämudd wa mäqqārān, täwwayād takute-nāk, afäl älwäqq wa d-sānsed täkute-nāk fäll-tasəskärt ta n-tikutawen har dd-təkḡed a-s ikka härät jere-k d-əŋŋa-k,

²⁴ wär ketād, äyy'-et dədi-däḡ, əqqəl əŋŋa-k har hak-änš təzzar, təjəd takute-nāk i-Mässinäḡ.

²⁵ Kunta irwas-käy äwadəm, išk'-ak s-əlxəkum, uf'-ak ad-där-s tənəmknäd šik iket-di d-hin-tiwəḡäm əlxəkum ed əlxəkum, afäl t-in-täwwəḡäm, ad-käy-äj ere wa käy-äsiwārān uḡlem dəḡ-ifassän n-ägg-äššärexa, äj'-ik ägg-äššärexa dəḡ-ifassän n-älgomi, äj'-ik älgomi dəḡ-takärmüt.

²⁶ Äsidätteḡ-ak a-s edägg-en, afäl t-təjjäšād, wär t-dd-mad-təzjārād a təkkeḡ wär dd-təssəmdäd timzal n-har tämma ta käy-irwäs.»

Isälan n-əzzəna

²⁷ «Wädden, təslam a-s ätiwānna: <Wär jed əzzəna>,

²⁸ näkk ənneḡ-awän a-s ere ijän dəḡ-taməḡt wär-ədobän akäyad n-derhan, isälan əmdän, izn'-et dəḡ-ulh-net.

²⁹ Käyy, kunta tiṡṡ-nāk ta n-aḡil a käy-isifun abäkkəḡ, kukkərət-tät-dd, təjrəd-tät-in fälla-k

† **5:22 5:22** A-wa älzämäḡät n-inušämän d-imizārān n-käl-Işrayil wa itirən äššärexa, əntäneḡ a-s älqallitän, oşaxän daḡ tamətte d-əlxəkum d-äddin.

härwa wär tämešäläd abäkkad-wen-däx, ed uf'-ak, iji n-tiṭṭ tøjješäd älžännät, uhən tətwejäräd-in däx-temse tərda taḡəssa-näk.

³⁰ Kunta daḡ äfuss-näk wa n-aḡil a käy-isifun abäkkad, ənkəḡ-t, təjrəd-t-in fälla-k härwa wär tämešäläd abäkkad-wen-däx, ed uf'-ak, iji n-äfuss tøjješäd älžännät, uhən tøjjäšäd temse tərda taḡəssa-näk.»

Isälan n-aməzzi

(Mätti 19:9; Marqəs 10:11-12; Luqa 16:18)

³¹ «Təssanäm a-s ätwännä: <Ere irhän azəmməzzi n-hänne-s, äkf'-et-tät təkərḡe n-aməzzi təzzar>

³² məšan, näkk, ənneḡ-awän: ere äzmäzzäyän hänne-s s-wädden arämas a tät-ija tikər-as, ij'-et temäznit; ere daḡ wa ädobänän tamäḡt dd-tämmiizzäyät, izna.»

Isälan n-tihudawen s-bahu

³³ Ḋarät-a-wen-däx, inn'-asän: «Təslam a-s ätiwännä i-imḡarän-näwän wi n-ibda: <Wär mad-tärzəd tafləst, a-wa häḡäd s-Mässinäḡ s-ad-t-täjəd, äj'-e>»,

³⁴ məšan, näkk, ənneḡ-awän: wär heḡäm fäw. Wär heḡäm s-išənnawän ed əntäneḡ a-s tasäqqaymut n-təmmənukəla n-Mässinäḡ,

³⁵ wäla s-äkall ed ənta a-s isəkkukal n-iḡarän-net wäla s-Yärussälam ed ənta a-s aḡrəm wa n-Mässinäḡ-i n-ämänokal mäqqarän,

³⁶ wäla fäll-eḡäf-näk ed wär täddobed ad-səmlələd wäla ad-səkwələd wäla-däx iyyän ḡas däḡ-amzadän-näk.

³⁷ E-d käwän-issəstän äwadəm d-härät, ännät-as: <Ëyya> i-tidət, tənnəm: <Äbo> i-bahu, a tässewäđäm fäll-a-wen-däx, Iblis a dd-ifal.»

Ukəs n-eyä d-älxär
(Luqa 6:29-30)

³⁸ Inn'-asän daḡ: «Təslam a-s ätiwänna: <Tiṭṭ a təzzalät tiṭṭ, esen a itəzzalän esen>,

³⁹ mäšan, näkk, ənney-awän: əlxənät i-ere hawän-irhan a läbasän; afäl hak-istäx äwadəm fäll-täjomäst-näk ta n-aḡil, səgdəl-as daḡ ta iyyäđät.

⁴⁰ Afäl hak-iška äwadəm s-əlxəkum däx-təssəba n-tanäkəbbat-näk, äyy-as-in daḡ anäkəbba-näk i-ad-wär-ija a-wen,

⁴¹ afäl käy-äshäššäl ägg-əlxəkum aḡkul n-äzuk har əḍdəkuḍ n-kelumetär, awəy-as-t har əssin kelumetärän;

⁴² ere käy-idälän, təkfəd-t, wär tənneḍäd fäll-ere däx-k ittarän ämarwas.»

Ärhät äddinät
(Luqa 6:27-28, 32-36)

⁴³ «Təslam a-s ätiwänna: <Ärh änhäraj-näk, təknəsäd ašanjo-näk>

⁴⁴ mäšan, näkk, ənney-awän: ärhät išənjanəwän. [Äjät älhimmät i-wi hawän-tajjänen terk tittar, äjät a olaḡän i-wi där-wän okäḍnen], ädälät Mässinäx i-wi käwän-saməḍraynen, tiḡəzzəbun-kəwän.

⁴⁵ Dihen, ad-itbət a-s aratän n-Abba-nəwän-i ihän išənnawän a tämoosäm; ənta, isajmaḍ-dd täfukt-net fäll-äddinät wi läbasnen hakd wi

oläxnen, isasaway-dd akäsa-net fäll-imayḁdalän hagd inämäšrayän.

⁴⁶ Afäl wär tärhem ar imärhan-näwän, ma käwän-ibḁdan d-äddinät wi iyyäḁnen, əndek marušät-näwän? Inarmasän n-tiwse-däx, a-wen, tājjan-t.

⁴⁷ Afäl wär təjjəm isofan ar i-ayətma-wän, ma käwän-iḁlayän d-äddinät wi iyyäḁnen? Wädden inəzzulam†-däx, a-wen, tājjan-t.

⁴⁸ Umasät äddinät əmdanen, wär iwer älḁib ed Abba-näwän-i ihän išənnawän, imda, wär t-illa älḁib t-iwarän.»

6

Isälan n-tikutawen

¹ «Ajät ənniyät, wär-itumaset iqqud-näwän i-Mässinäx a jam i-ad-käwän-in-əjrähän äddinät ed afäl a-wen-däx a tājjan, wär mad-təkrəšäm marušät xur-Mässinäx-i n-Abba-näwän ihän išənnawän.

² E-d təkkatäd, wär wetäd täsinsäxt data-k šund a-wa tājjan älmunafexän däx-ihənan n-äddin wi n-käl-Älyähud d-tišarriten i-ad-tän-aməlän äddinät; äsidätteḁawän a-s marušät-näsän, imdä-dd xur-təmmal-ten-däx tän-tājjan äddinät.

† 5:47 5:47 — Xur-käl-Älyähud, ere wärän ämoos ägg-Älyähud s-aläšäl meḁere wärän ilkem i-äddin-näsän, iket-net, änəzzalim a ämoos. A-wen-däx a fäl tiwsaten ti iyyäḁnen iket-näsän, ti n-inəzzulam. — Ašäl-i-däx, änəzzalim, äkafär (ere wärän issen s-Mässinäx).

³ A äniihäjjän a-s, käyy, e-d təkkatäd, äj'-e dāḡ-ufār, wār-ilämmädet wāla-dāḡ āfuss-nāk wa n-tāšalje a-wa ikfa wa n-aḡil,

⁴ dihen, ad-tumas takute-nāk a iṣtarän, äkf'-ik Mässināḡ-i n-Abba-nāk ihannäyän wāla a-wa iṣtarän, timḡal n-emärked-nāk.»

Tamädilt n-Mässināḡ
(Luqa 11:2-4)

⁵ «E-d tēddalām Mässināḡ, wār tolehäm d-älmunafexän-i s-e-d tumadän, tējraz-asän tebädde dāḡ-ihānan n-äddin wi n-käl-Älyāhud d-ammās n-tiṣarriten i-ad-tän-in-əjrähän äddinät. Äsidätteḡ-awän a-s marušät-näsän, imdä-dd ḡur-təmmal-ten-dāḡ tän-täjjän äddinät.

⁶ Käyy, e-d tēddaläd Mässināḡ, əjjəš ider n-ehän-nāk, təḡfələd-t-dd fäll-iman-nāk, tēdləd Abba-nāk-i ättunkälän ed Abba-nāk-i ihannäyän wāla a-wa ijän dāḡ-atunkəl, ad-hak-äj erhet-nāk.

⁷ E-d tēddaläd Mässināḡ, wār täsjätäd mäjräd wārän infa härät šund a-wa täjjän inəzzulam†-i ḡur-ija a-s asjət n-mäjräd-en-dāḡ a dd-madän-isəmmənənnäd āfuss n-Mässināḡ, äkf'-en a-wa dāḡ-s əttärän.

⁸ Wār dār-sän tolehäm, a-wa s-tämiḡatäräm, issan-t Abba-nāwän iket-net härwa wār dāḡ-s t-tötteräm.»

Älmital n-tamädilt n-Mässināḡ

† 6:7 6:7 – ḡur-käl-Älyāhud, ere wārän ämoos ägg-Älyāhud s-alāšäl meḡ ere wārän ilkem i-äddin-näsän, iket-net, änəzzalim a ämoos. A-wen-dāḡ a fäl tiwsaten ti iyyäḡnen iket-näsnät, ti n-inəzzulam. — Ašäl-i-dāḡ, änəzzalim, äkafār (ere wārän issen s-Mässināḡ).

- 9 «E-d tæddaläm Mässinäḡ, ännät:
 <Abba-nänäḡ-i ihän išənnawän,
 10 səmyḡarнет äddinät isəm-näk wa šäddijän.
 Taset-dd Təmmənəya-näk,
 äjet erhet-näk fäll-ärori n-äkall,
 s-əmmək wa s-ija dəḡ-išənnawän.
 11 Äkf'-anäḡ isudar wi s-nämiḡatär ašäl-i-däḡ,
 12 äns-anäḡ uḡlemän-nänäḡ
 s-əmmək wa s-nənašš i-inaḡlamän-nänäḡ.
 13 Wär toyyed Iblis äžžurräbät-anäḡ
 isiḡəw-anäḡ dəḡ-abäkkəḡ,
 agəz-anäḡ dəḡ-s,
 [ed Təmmənəya, tärna hakd älxurmät, i-näk
 härkuk. Amin!]>
 14 Afäl naššäm i-äddinät wi käwän-ḡallämnen,
 ad-hawän-in-äns dəḡ Abba-näwän-i ihän
 išənnawän,
 15 mäšan afäl wär nəššəm i-äddinät wi käwän-
 ḡallämnen, wär hawän-in-e-äns dəḡ Mässinäḡ-i
 n-Abba-näwän ibäkkəḡän-näwän.»

Isälan n-äzum

- 16 «Ašäl wa d-tuzamäm i-ad-täḡbədäm
 Mässinäḡ, wär täsbänzäzäm šund a-wa täjjän
 älmunafəḡän-i sawärnen tekenzart idmawän-
 näsän i-ad-səlmədän äddinät a-s äzumän;
 äsidätteḡ-awän a-s marušät-näsän, imdä-dd
 ḡur-təmmal-ten-däḡ tän-täjjän äddinät,
 17 änn-ak, käyy, e-d täzumäd, ərdəb-in,
 säḡələd aḡutän
 18 i-ad-wär-iləmməd äwadəm a-s täzumäd i-
 ad-täḡbədäd Mässinäḡ ed igdäh-ak a-wa dəḡ s-
 Abba-näk-i ättunkälän, ihannäy a-wa ijän dəḡ-
 atunkəl, ad-hak-äj erhet-näk.»

Isälan n-ärrözäx wa n-tidöt
(Luqa 12:33-34)

¹⁹ «Wär tøjmeräm ärrözäx i-äddunya ed täddoobät tukmadt d-tenekt ad-t-täksš, äddooben daḡ imäkräḡän ad-t-akrən.

²⁰ Änn-ak, a-wa jammärad, öjmär-t i-älžännät-i wär ha tukmadt wäla tenekt wäla imäkräḡän t-äržänen wäla-i t-okärnen.

²¹ Ädduuttät a-s inözjam n-ulh n-äwadəm, wär töffilän edägg wa daḡ-itwär төla-net.»

Tihay d-ännur
(Luqa 11:34-36)

²² «Tiṭṭ n-ägg-adəm a-s tefätelt n-taḡəssa-net, afäl tolaḡ tiṭṭ-näk, ad-hannäy taḡəssa-näk iket-net,

²³ mäšan afäl ijraw härät tiṭṭawen-näk, adiš taḡəssa-näk daḡ, wär hönnöy härät. Үas kunta käyy ännur wa hak-ämoosnät tiṭṭawen-näk, iha tihay, adiš tidöt-däḡ a-s, ad-käy-ärməsnät tihay ässuksäḡnen.»

Iba n-inözjam
(Luqa 16:13; 12:22-31)

²⁴ «Wär t-illa äwadəm äddooben ad-ixdam i-əssin imälan: iyyät-i-däḡ, ad-akəḡ d-iyyän, ärh wa iyyäḡän meḡ daḡ ikf'-iman-net i-iyyän, iksən wa iyyäḡän. Wär-äddoobät äwadəm ad-ixdam i-Mässinäḡ, ošal daḡ ḡarät terše n-azrəf.

²⁵ A-wen-däḡ a-fäl hawän-janney: wär käwän-järräwnet inözjam n-a-wa mad-təksəm d-a-wa mad-təswəm d-a-wa mad-təlsəm; iman-näwän, ajän wädden ojärän tetäte? Ässexät n-taḡəssa-näwän daḡ, wädden ojär isəlsa?

26 Səjrähät ɣas igdaɣ-wi əlläynen dəɣ-əlhäwa, wär tədumun, wär təjlubun, wär təggärän dəɣ-ijändän məšan, əssodär-tän Abba-näwän-i ihän işənnawän. Ajän wädden tufäm-tän s-a əjjeen!

27 Əndek ɣas dəɣ-wän wa äddooben s-inəzjam-net ad-isiwəð təxrəst-net wäla s-a ogdähän d-əmm n-asənnan?

28 Adiş, mafäl käwän-əjrawän inəzjam n-a-wa mad-təlsəm? Səɣret-käwän täboyt n-işəkraş härät, ənhəywät-tät-ak, daggäl, wär zətt, wär zəmməy

29 məšan əsidätteɣ-awän a-s wäla əmänokal Suläyman hakd terşe-net iket-net, wär käla ojar täboyt-i-däɣ asəssihäɣ n-aşäl.

30 ɣas kunta Məssinäɣ isalsa teyəşşe n-işəkraş s-aşäl-i-däɣ təbdaj, aşəkka ad-hin-tiyar, täry s-əmmək-wen-däɣ, əb' ättäma n-ad-wär hawän-izzəzmäy käwäned? Təmmətkit ija immun-näwän!

31 Wär käwän-ɣälläbnet inəzjam har dd-təqqəläm jannem: <Ma mad-näkş? Ma mad-nəsəw? Ma mad-näls?>

32 Inəzjam şund-win-däɣ, inəzzulam a dəɣ-sän oşalnen, ɣälläbän-tän. Käwäned, Abba-näwän-i ihän işənnawän, wär t-illa a-s tämiyatäräm s-wädden, issan-t.

33 Ədgezät s-tizarät dəɣ-umäɣ n-Təmmənəya n-Məssinäɣ d-iqqud dəɣ-isälan-net, dihen, ad-hawän-in-isiwəð Məssinäɣ a-wa iyyädän iket-net.

34 Wär käwän-ɣälläbnet inəzjam n-aşəkka ed hak aşäl d-a-wa äwwäy dəɣ-inəzjam, hak aşäl-däɣ, təgdäh-as tämäxatert-net.»

7

Wär tozemäm äwadəm
(Luqa 6:37-38, 41-42)

¹ «Wär tozemäm äwadəm i-ad-wär kăwăn-itizəm äwadəm

² fäl-a-s, a-wa s-tozämäm äddinät wi iyyäḍnen a-s kăwăn-e-ažəmăn kăwăneḍ-dăḡ; a-wa s-kătăm äddinät wi iyyäḍnen a-s kăwăn-e-əkətən ɔntăneḍ-dăḡ.

³ Mafäl hannäyăd tezewt ta hăt tiṭṭ n-ăṇṇa-k, a-s ija a-wen, wăr hənnəyăd afăḡot wa ihăn tiṭṭ ta-năk?

⁴ Meḡ daḡ, ɔndek əmmək wa s-mad-tənnəd i-ăṇṇa-k: «Ayy-ahi ad-əkkəsăḡ tezewt dăḡ-tiṭṭ-năk», a-s ija a-wen, kăyy iman-năk, iha afăḡot tiṭṭ ta-năk.

⁵ Älmunafey yaden! Əkkəs-in afăḡot wa ihăn tiṭṭ-năk təzzar, dihen, ad-tudabed ahănay, tudabed ukəs n-tezewt ta hăt tiṭṭ n-ăṇṇa-k.

⁶ Əllan-t äddinät-i s-dăḡ-a-wa tăjjăn, wăr-əzleyăn d-iyyăḍan, wăr tăn-təkfem a šăddijăn ed hălăn ad-kăwăn-dd-əqqəlăn, aḍwən fälla-wăn; iyyăḍ, wăr-əzleyăn d-əlxənžărăn, wăr daw-săn-in-jerăm tisḡalen-năwăn ed ad-tănăt-əfkəlfəkəlăn.»

Ädəlăt Măssinăḡ
(Luqa 11:9-13; 6:31)

⁷ «Ädəlăt Măssinăḡ, ad-kăwăn-ăkf; əmmăḡăt, ad-təjrəwăm; äḡrăt-t, ad-hawăn-ăkawăn.

⁸ Ere idălăn, ad-ikrəš, ere immăḡăn ad-ijrəw; ere iḡrăn Măssinăḡ dăḡ-tămăḡatert t-tărmasăt, ad-has-tăt-ikkəs.

9 Ǝndek dāḡ-wān wa s-e-d dāḡ-s ittār rure-s tajella ad-t-ākf tāhunt?

10 Meḡ wa s-e-d t-idāl dāḡ-emān, ad-t-ākf taššālt?

11 Ƴas, kunta kāwāneḡ-i n-inällābāsān, tössanām isuf n-a-wa olāḡān i-aratān-nāwān, āb' ättāma n-ad-wār kāwān-ikfa Abba-nāwān-i ihān išənnawān a-wa ufān, afāl t-dālām dāḡ-s.

12 Tajjāt i-äddināt a-wa s-tārḡām ad-hawān-t-tajjān ed a-wen-dāḡ a innā alāmār wa n-ännābi Mosa d-ännābitān wi iyyādnen.»

Zābo wa härəwān d-wa kārruzān

(Luqa 13:24)

13 «Ĕjjəšāt tāmudre ta n-tidət s-emm wa kārruzān fāl-a-s ill'-ee zābo härəwān, olwan, ənta a tilal təššəm n-äddināt māšan, ajilal-net, əlhəllak,

14 a-s ija a-wen, emm wa kārruzān d-zābo wa sädidān, wār-əjjətān äddināt wi sār-s tajjāšnen māšan, tāmudre ta n-tidət a-s itixəd.»

Hak āwadəm d-imojjan-net

(Luqa 6:43-44)

15 «Ägəzāt iman-nāwān dāḡ-ännābitān wi n-bahu-i s-a-s kāwān-dd-tisən, jan iman-nāsān ikərwatān wār ih' äššar, a-s ija a-wen, tiḡəs ənsaynen a āmoosān.

16 Wār hawān-təmtəllənet, ad-tān-təzzəyām s-timašalen-nāsān. Ajān ewārwär, itiirəw-dd läḡnāb? Meḡ ajān ajärof itiirəw-dd tehäyne?

17 Ahəšk olāḡān, ad-dd-arəw aratān olāḡnen māšan erk ahəšk, wār dd-e-arəw a sāl aratān läbasnen.

18 Ahøšk olayān, wār-itirəw aratan läbasnen, ahøšk daḡ läbasān, wār-e arəw aratan olaynen.

19 E d t-illām ahøšk wārān itirəw aratan ih' älfäyda, ad-hin-ättänkäd, itwəjar-in däḡ-efew.

20 Emmək-wen-däḡ daḡ a-s ännäbitān wi n-bahu, timašalen-nāsān a-s tān-e-təzzəyām.»

*Äddinät wi ḡarränen isəm n-Emäli s-bahu
(Luqa 13:25-27)*

21 «Wädden äddinät iket-nāsān wi hi-jannänen: <Emäli, Emäli>, a he-əjjəšnen Təmmənəya n-Mässināḡ. Təmmənəya n-Mässināḡ, wār tät-e-ijjəš ar ere wa itamašalān erhet n-Abba-nin-i ihān isənnawān.

22 Ašäl wa ilkämān, ad-dd-əggədān äddinät äjjootnen, ənnən-ahi: <Emäli, Emäli! Wädden mäjräd wa däḡ-näloläy i-äddinät, käyy a t-ijän däḡ-imawān-nānāḡ? Wädden nəkkäs alšinān däḡ-äddinät s-isəm-näk? Wädden nəja tikunen äjjootnen s-isəm-näk?>

23 Äddinät-en, ašäl-en, ad-hasān-ännäḡ s-afälla: <Näkk ya wār käwān-əzzeyäḡ, əjəjat-ahi, inämäšrayān a tāmoosām.> »

*Isälan n-ihānan wi n-əssin
(Marqəs 1:22; Luqa 6:47-49)*

24 «Ere islān i-mäjräd-wa-däḡ s-iket t-jəḡ, ad-itamašal a-wa ənnəḡ, ad-alāh d-āhaləs ijrahān härät iḡāšān äkall har iwwäd tähunt i-ässas, idäy fälla-s ehān-net.

25 Ij' akāsa, ärtäynät timdöl d-anji fäll-ehān-en mäšan, wār-oḡa ed iday fäll-tähunt.

²⁶ Mašan wa islän i-mäjräd-in, äqqima wär t-ämešäl, oläh d-ere irmas iba n-tayötte idäyän ehän-net däḡ-tasənjit.

²⁷ Ij' akäsa, ärtäynät timḡel d-anji fäll-ehänen, oḡa, älhahäm-in s-iiyyät.»

²⁸ Iḡäs älxuṭbät-wen-däḡ ija Ḣisa tamötte, äqqälän-dd äddinät ḡas oran imawän

²⁹ fäll-əjjäruzät-i-däḡ hasän-ija a-wa isäḡra ed isaxr'-en s-älxikmät n-ere issanän a-wa iha wädden šund äḡulam wi n-Äṭṭäwrät.

8

U-jəri wa äzozäy Ḣisa

(Marqəs 1:40-45; Luqa 5:12-16)

¹ Ätrarä-dd Ḣisa taḡayt ḡas, tälkäm-as tamötte täjjeet.

² Däḡ-a-wen-däḡ ad-has-dd-ilkäḡ ähaləs ijraw jəri, irkäḡ data-s, inn'-as: «Äḡalim, afäl tärhed a-wen-däḡ, täddoobed ad-hi-šəšdöjäd.»

³ Izzäl äfuss-net, iḡäs-t, inn'-as: «Ärheex-t, išdaj.» Šäddij däḡ-jəri älwäqq-wen-däḡ.

⁴ Inn'-as Ḣisa ḡarät-a-wen: «Wär jed isälan i-äwadəm wäl' iyyän n-a-s näkk a käy-äzozäyän, əḡləw, səkən iman-näk i-u-tikutawen, tøjöd takute ta s-inna ännäbi Mosa däḡ-isälan n-təšədje n-käl-jəri i-ad-umas a-wen tajuhe i-tamötte n-a-s təzzäyäd.»

Änaxdim n-käbtän wa äzozäy Ḣisa

(Luqa 7:1-10)

5 Ijjäš Ƴisa ɔarät-a-wen aɣrəm wa n-Qäfärnaxum, ilkäɔ-as käbtän iyyän, ad-t-ilaqqäd, ijann'-as:

6 «Älyalim, äanaxdim-in insa ɣur-ehän, tæbdant tizzurt d-tisnant.»

7 Inn'-as Ƴisa: «Ad-t-asäɣ, zuzöyäɣ-t.»

8 Äwwežäb-as käbtän, inn'-as: «Aha-aha älyalim! Wär-änhäjjäɣ d-ad-tökköd ehän-in, tøjješäd-t, änn ɣas täfert, ad-izzöy äanaxdim-in

9 fäl-a-s näkk-i-hi, ællan-t imänokalän daw-t-ælleɣ, leɣ ɔaɣ näkk æssärdusa daw-i t-ællanen; e-d ænney i-iyjän: <Eglöw>, ad-iglöw; e-d ænnöɣ i-wa iyyädän: <Eyyäw>, ad-hi-dd-ass. Akli-nin ɔaɣ e-d has-ænney: <Äj a-wa>, ad-t-äj.»

10 Islä Ƴisa i-mäjräd-wen-däɣ ija käbtän ɣas, ijräs-as älxal-net; innäd-dd ɔarät-a-wen s-äddinät wi has-ælkammen, inn'-asän: «Äsidätteɣ-awän a-s, wäla däɣ-äkall wa n-Işrayil, wär käla enhäyäɣ ere s-ogdäh immun-net d-wa n-ähaləs-i-däɣ.

11 Ässiilmädäɣ-käwän a-s ilkam ad-dd-asən äddinät äjjootnen, dd-falnen emäynäj d-atäram ænɣöymən d-Ibrahim d-Isxaqq d-Yaqub däɣ-amäjaru wa madän-äj däɣ-Tæmmənöya n-Mässinäɣ.

12 A-s ij'-a-wen, äddinät wi s-äniihäjja a-s æntäned a ännufläyenen däɣ-Tæmmənöya n-Mässinäɣ, ad-hin-ætwøjärän däɣ-tihay ti n-ajäma, ad-hallän, zimækärkizän isenän fäl tämujrizt.»

13 Innä Ƴisa ɔarät-a-wen i-käbtän: «Eglöw, ijräw-ak Mässinäɣ a-wa s-tomänäd.» Izzäy äanaxdim-net ässaɣät-wen-däɣ.

Äzozäy Ƴisa taḍäggalt n-Bəṭrus d-imarhinän äjjootnen

(Marqəs 1:29-34; Luqa 4:38-39)

¹⁴ Ifäl Ƴisa dihen, ikkä ehän wa n-Bəṭrus. A-s hin-iwwäḍ, tənša taḍäggalt n-Bəṭrus, tärmastät tenäde.

¹⁵ Idäs afuss-net, tärza fälla-s tenäde, təbdäd, täsmäjarät-t.

(Marqəs 1:32-34; Luqa 4:40-41)

¹⁶ Toḍa täfukt Ƴas, ämewäyän-dd sār-s iməlšan äjjootnen, innä täfert Ƴas, əzzayän; äzozäy daḡ dihen e d t-illām ere ärhinän.

¹⁷ Ijä a-wen i-ad-itbət a-wa innä ännäbi Saya† a-s innä:

«İḍkäl fälla-näḡ älḡibän-nänäḡ,
äzozäy-anäḡ däḡ-turhənnawen-nänäḡ.»

Kəssən n-iman

(Luqa 9:57-62)

¹⁸ Inhäy Ƴisa aḡliḡəli wa t-dd-ja tamətte s-əjut Ƴas, innä i-inəṭṭulab-net, ad-əjləyän ejänš s-ašrut wa iyyädän.

¹⁹ İlkäḍ-as-dd älḡalim n-Äṭṭəwrät iyyän, inn'-as: «Äḡalim, e-s təkkeḍ-däḡ, əlkamäḡ-ak.»

²⁰ Inn'-as Ƴisa: «İbäggan lan tihaliwen, igḍaḍ lan iskak məšan, Ägg-ägg-adəm, wär ila wälä edägg däḡ-issənsä eḡäf-net.»

²¹ İggäd-dd ähaləs iyyän irhan alkum-has, inn'-as: «Äḡalim, äkf'-ahi turhajät n-ad-ägläḡ əḡkäḡ abba-nin, əqqələḡ-dd, əlkəmäḡ-ak.»

† **8:17 8:17** A-wa ännäbi dd-äzzarän i-Ƴisa, äloläy däḡ-isälan-net əssayät timaḍ n-awätay dat-tiwit-net.

²² Inn'-as Yisa: «Elkəm-ahi, tøyvəd fälla-k inəmmuttan ad-əzkən inəmmuttan-näsän.»

*Issəbdād Yisa aḍu-i-däx mäqqārən fäll-ejänš
(Marqəs 4:35-41; Luqa 8:22-25)*

²³ Änmäjjas Yisa turäft n-aman d-inəṭṭulab-net ḍarät-a-wen,

²⁴ wär-əhojən a-s aḍu-i-däx äşsoohen-da-däx dd-inkärən, ad-tibhilibəhlnät tinəzzämären i-turäft siha d-siha. A-s itäj a-wen-däx, Yisa ənta, ittas.

²⁵ Əssənkärən-t inəṭṭulab-net däx-eḍəs, ənnän-as: «Älyalim, agəz-anəx, nəhläk.»

²⁶ Inkär-dd, inn'-asän: «Ma kəwän-ässirmäxän? Təmmətkit ija immun-nəwän!» İbdād əlwəqq-wen, əsmähəḍ fäll-aḍu d-ejänš, səmmeḍ-in a-wen-däx iket-net.

²⁷ Əqqälän-dd xas inəṭṭulab oran imawän, jannen: «Uwwuww! Wa əwadəm s-wəla aḍu d-ejänš, sajadän-as, ma əmoos?»

*İməlsən wi n-əssin əzozäy Yisa
(Marqəs 5:1-20; Luqa 8:26-39)*

²⁸ Əsjän Yisa d-inəṭṭulab-net fäll-aşrut n-ejänš wa n-teje ta n-Gadara xas, əlkədän-as-dd əssin iməlsən əzəyən tiyənneren, janen təlləbəst-ta-däx s-əbas t-illa ere ihälän ad-dd-əj tiṭṭ-ten-däx hän.

²⁹ Ənhäyän Yisa xas, əxwätten əlsinän, ad-jannen: «Ya Rure-s n-Mässinäx, ma däx-nəx tərhəd? Ajän tissust-nənəx a-s dd-tosed iket-di dd-tiwəḍ təqqän n-a-wen?»

³⁰ Ḍann təhrut n-əlxənžərən däx-attayän n-dihen,

³¹ dälän alšinän Yisa, ənnän-as: «Kunta takkäsäd-anəx dəx-əkall, suk-anəx tahrut ta n-əlxənžərən.»

³² Inn'-asän: «Äglät!» Əzjərən alšinän meddən-ənnin, əjjäsän əlxənžərən, ad-dd-titrəktərikän, wa-dəx n-afälla n-taɖaxt, tiðəwän dəx-əjəns, tattän-tän aman.

³³ Oşälän imədanän-nəsän s-axrəm, jän isälan n-a-wa ijän d-a-wa dd-işreyän fäll-iməlsän wi n-əssin i-əddinät.

³⁴ A əndərrän, axrəm iket-dəx-net da-dəx dd-izjərən s-Yisa, ənhäyän-t əddinät xas, ad-t-təddälän dəx-ad-ifəl əkall-nəsän.

9

Əzozäy Yisa anəbdon iyyän (Marqəs 2:1-12; Luqa 5:17-26)

¹ Ijjəş Yisa darät-a-wen turäft n-aman, ijläy ejəns s-taxrəmt ta-net.

² Diha-dəx hin-əwwəɖän a-s əddinät-da-dəx, əmisawäyän ənəbdon insan fäll-asəftəx. İnhäy Yisa immun-nəsän xas, innä i-anəbdon: «Alyaq-in, wär təkkesäd aṭṭama, ibəkkaɖän-nək, ətwənsän-ak.»

³ Diha-dəx d-innä a-wen-dəx, a dd-əggädän əlxulam n-Əṭṭawrät, ad-jannen dəx-iman-nəsän: «Wa ənta, əskafär.»

⁴ İlmäd Yisa xur-iman-net a-wa ihän inəzjam-nəsän, a-wen-dəx a fäl hasän-inna: «Ma itajjän erk ənniyät-wa-dəx dəx-ulhawän-nəwän?»

⁵ Ma ojarän täräḡse jer-ad-tənnəd i-āwadəm: <Ātwānšān-ak ibākkaḡān-nāk>, d-ad-has-tənnəd: <Ībdəd, ərjəš?>

⁶ Ašāl-i, ässiilmädäḡ-kāwān a-s Ägg-ägg-adəm, ijraw fäll-ārori n-ākall turhajät n-tenäšše n-ibākkaḡān.» Innä Ḳisa ḡarät-a-wen i-anābdon: «Ībdəd, əḡkəl asəftäḡ-nāk, əqqəl ehän-nāk.»

⁷ İbdād, iqqäl ehän-net.

⁸ Tärmäḡ tamətte ta tənḡyät a-wa ijän, ad-tiimələn äddinät Mässinäḡ-i ikfän dägg-adəm tädabit togdähät d-a-wa-däḡ.

*İyrä-dd Ḳisa Mätti i-ad-umas änätṭalib-net
(Marqəs 2:13-17; Luqa 5:27-32)*

⁹ İfāl Ḳisa dihen ḡarät-a-wen, inhäy änarmas n-tiwse s-isəm-net Mätti äqqiima däḡ-edägg n-älxidmät-net, iyr'-e, inn'-as: «Īlkəm-ahi»; ibdād Mätti, ilkām-as.

¹⁰ Äsmäjarät Mätti Ḳisa s-ehän-net ḡarät-a-wen. İtaḡyāma Ḳisa däḡ-edägg wa n-imənsiwān a-s erk äddinät ḡan inarḡasān n-tiwse äjjootnen da-däḡ, osän-dd, änḡaymān dār-s ənta d-inəṭṭulab-net.

¹¹ Īnhäyän-t ḡarät däḡ-käl-faris t-əllanen dihen ḡas, ənnän i-inəṭṭulab-net: «Ma isaharän älḡalim-nāwān imənsiwān d-inarḡasān n-tiwse d-erk äddinät-wi-däḡ?»

¹² İsl'-asän Ḳisa ḡas, innä: «Äddinät ässoxätnen, wār-ämḡatārān s-läxtur; imarḡinän a sār-s ämiḡatārnen.»

¹³ Inn'-asän daḡ: «Ma ämoos älmäḡna n-a-wa s-inna Mässinäḡ däḡ-mäjräd-net:

«Ojār a-s ħur-i la tāhanint idəm uhən tikutawen.»
 A-wen älmäḡna-net a-s, näkk, wār dd-ämešäläḡ
 s-äddinät wi ordänen iman-näsän iqqud,
 inäsbäkkadān a-s dd-ämešäläḡ i-ad-tān-
 äḡləsäḡ.»

Isālan n-āzum

(Marqəs 2:18-22; Luqa 5:33-39)

¹⁴ Osän-dd inəṭṭulab n-Exya Ƴisa ɗarät-a-wen, ənnän-as: «Mafäl näkkəneɗ d-käl-faris nətuḡam dehiyyän, a-s ija a-wen, inəṭṭulab wi-näk, wār tuzamän?»

¹⁵ Issäḡläy-tän Ƴisa tangalt dəḡ-hasän-inna: «Ajän käl-tuksest ilzam-tän āzum tän-āzizäkänzārän a ikka āmaḡlay ill'e jere-sän? İlkamän išilan-wi dəḡ-tän-mad-ifəl āmaḡlay, dihen, ad-əjrəwän s-āzum.

¹⁶ Wār t-illa ere itəgğatän tikəst i-temälsit wäššārät s-taswəɗt n-tabdoḡt täynayät; afäl ija a-wen, ad-dd-tärkəb taswəɗt ta täynayät temälsit, təj amənd ojārän wənnin.

¹⁷ Äddinät, wār təjjən aman n-läḡnəb äynaynen, äxxiimmärnen dəḡ-ijdad; ere ijän a-wen har käfän aman-ənnin dəḡ-ijdad, ad-has-səbbuqqen ijdad-net, ifut dəḡ-läḡnəb hakd-dəḡ dəḡ-ijdad. Aman n-läḡnəb äynaynen, äxxiimmärnen, iddidän äynaynen a dəḡ-tän-itajj äwadəm, dihen, wār-e ifut məssi-sän dəḡ-wi wəla wi.»

Isālan n-elle-s n-Žayrus d-taməɗt ta dd-izajjār ašni

(Marqəs 5:21-43; Luqa 8:40-56)

18 Ämmiijräd ʒisa i-tamøtte dāḡ-isālan-win-dāḡ a-s a øndärrän-dāḡ, iyyän dāḡ-imännähädän n-taḡrømt-en-dāḡ da-dāḡ t-dd-osän, irkäḡ data-s, inn'-as: «Talyaḡt-in, iket tät-äba mäšan nidawet sär-s, sønsød fälla-s äfuss-näk, ad-dd-tøddär.»

19 Ibdäd ʒisa, äddew dār-s ønta d-inøḡṡulab-net.

20 Iгла har šik-dāḡ tamäḡt tiyyät lat märaw iwøtyan d-øssin ijammäḡ-tät ašni da-dāḡ dd-mälät ḡara-s, ḡäs afär n-eräswäy-net

21 ed a-s täjj a-wen-dāḡ, janna dāḡ-iman-net: «Afäl ḡäsäḡ wäla-dāḡ eräswäy-net, ad-øzzøyäḡ.»

22 Innäḡ-dd sär-s ʒisa, inhäy-tät, inn'-as: «Talyaḡt-in, wär tøkkesäd äṡṡäma, äzozäy-käm immun-näm.» Tøzzäy tamäḡt ässaḡät-wen-dāḡ.

23 A-s hin-iwwäḡ ʒisa d-inøḡṡulab-net ehän n-emännähäd, inhäy imäwatän n-tiḡnab ti n-uḡøf n-iba d-äddinät wi hasän-hallänen, äšikäläl a-wen-dāḡ iket-net, ja tākat dāḡ-išønnawän.

24 Omär s-ad-øzjārän äddinät fälla-s ed inn'-asän: «Tarat, wär tät-äba, eḡøð ḡas a ja.» Jän-t tekäškäšt.

25 Tøzjär fälla-s tamøtte ḡas, ijjäš ehän wa dāḡ-tønsa talyaḡt, irmäs-tät-dd s-äfuss, tønkar-dd.

26 Èntäjän isālan n-a-wen-dāḡ dāḡ-teje-ten-dāḡ iket-net.

Imøddoryal wi n-øssin äzozäy ʒisa

27 Ašäl iyyän, irjaš ʒisa a-s t-äḡrän øssin imøddoryal, äšixären, jannen-as: «Ya Ägg-Dawød, aḡøn-anäḡ tāhanint!»

28 Iwwäḡ-in ʒisa ehän wa ikka, øjjäšan-t-dd fälla-s imøddoryal ønnin n-øssin ḡas, inn'-asän: «Ak tidøt-dāḡ a-s tøflasäm a-s äddøbøḡ ad-aräḡ

tiṭṭawen-nāwān?» ʔnnān-as: «Ālyalim, nēflas a-wēn.»

²⁹ Iḏās ʔisa tiṭṭawen-nāsān, inn'-asān: «Itwəjjet-awān a-wa dār-ogdāh immun-nāwān.»

³⁰ Āmerānāt tiṭṭawen-nāsān māšan, ikna asəmmāhəḏ dāḡ-sān, inn'-asān: «He kāwāneḏ! Wār jem isālan n-a-wa ijān dāḡ-āwadəm wāl' iyyān»,

³¹ māšan, əzjārān ehān fälla-s ḡas, əffāyān isālan dāḡ-ākall iket-net.

Isālan n-amālšon wa āzozāy ʔisa

³² Diha-dāḡ d-əḡlān iməddorḡal, a-s amālšon iyyān s-ikras alšin wa t-ihān iləs-net da-dāḡ sār-s dd-āwwāyān āddināt.

³³ Ikkās dāḡ-s ʔisa alšin wa t-ihān, ad-itamājrad. Təqqāl-dd tamətte ḡas tor' emm, janna: «Wār kāla ātwānhāy šund a-wa-dāḡ dāḡ-ākall wa n-Išrayil.»

³⁴ Māšan, kāl-faris əntāneḏ a jannen: «A-wa tārna n-Iblis-i n-āmānokāl n-alšinān a-s itakkās alšinān dāḡ-āddināt.»

Təmyāre n-tāhanint ta oḏān ʔisa i-tamətte

³⁵ Āllil ʔisa ḏarāt-a-wen iḡārman d-tidbi iket-nāsnāt, isaḡra dāḡ-ihānan n-āddin wi n-kāl-Ālyāhud, ixattāb Ālənžil wa n-Təmmənəya n-Māssināḡ, izizuy āddināt dāḡ-turhənnawen d-ālyibān.

³⁶ Inhāy ʔisa tamətte ta tājjet has-təlkāmāt ḡas, tānḡ'-e tāhanint-net; inhāy fälla-sān aləḏdeš d-ezārri, olāhān-as ḡas d-tihatten wāren la amāḏan.

³⁷ Innäq-dd s-inəttulab-net, inn'-asän: «Ašəkrəš ägğolät, əttəxam ijjet məšan, wär-əjjətän inaxdimän t-oläyнен.

³⁸ Ädälät mässi-s n-ašəkrəš i-ad-dd-išəmmişəl inaxdimän oläyнен ašəkrəš-net.»

10

Ämašal wa issäxläf Yisa inəmmušal-net (Marqəs 3:13-19; Luqa 6:12-16)

¹ Iyrä-dd Yisa qarät-a-wen inəttulab-net wi n-märaw d-əssin, ikf'-en tärna n-ukəs n-alšinän däx-äddinät d-azuzi n-äddinät däx-turhənnawen d-älxibän.

² Ismawän n-inəttulab wi n-märaw d-əssin äsnäfrän da: Simyon wa s-itawänna Bətrus d-əñña-s Idris; Yaquub wa n-ägg Zäbdi d-əñña-s Exya;

³ Fəlibb d-Bärtälämma; Tomi d-Mätti wa n-änarmas n-tiwse; Yäqub ägg Älfa d-Tade;

⁴ Simyon wa n-Käna d-Yähudəs wa n-Isxaryut-i t-e-isəssäxdärän.

Äšmašäl Yisa inəttulab-net i-ad-äxəbän (Marqəs 6:7-13; Luqa 9:1-6)

⁵ Əntäned-den-däx inəttulab wi n-märaw d-əssin äšmašäl Yisa s-innä: «Wär təkem tiwsaten ti n-inəzzulam,† wär təjješäm axrəm n-käl-Sämari;

† **10:5 10:5** — Yur-käl-Älyähud, ere wärän ämoos ägg-Älyähud s-aläšäl mex ere wärän ilkem i-äddin-näsän, iket-net, änəzzalim a ämoos. A-wen-däx a fäl tiwsaten ti iyyäqnen iket-näsnät, ti n-inəzzulam. — Ašäl-i-däx, änəzzalim, äkafär (ere wärän issen s-Mässinäx).

⁶ wär төккөм ар тамөтте та n-käl-Işrayil tässujjalät şund tihatten.

⁷ Däx-tekle-näwän, äxtəbät i-äddinät a-s Təmmənəya n-Mässinäx, tohäz-dd.

⁸ Zuzəyät imarhinän, sənkaräm-dd inəmmuttan, şəşdəjäm äddinät wi ijrāw jəri, төккөсәм алşinän däx-iməlşan; ännuymät n-Mässinäx wa təjrāwäm bännan, äkfät-t i-äddinät bännan.

⁹ Wär tiwəyät oräx, wäla azrəf, wäla totəyya däx-färtəmatän-näwän,

¹⁰ wär tiwəyät şäkköş, wäla anäkäbba säl wa təlsäm, wäla tifädelen säl ti säläm, wäla tāborit ed, wär t-ih' äşşäk a-wen, hak ānaxdim-däx, ärhuj-as älxaqq n-tide-net.

¹¹ Ayrəm d-tadäbayt təjjäşäm-däx, səstənät d-ere wa s-äniihäjja ad-çur-s təzzubbem, təzzubbem çur-s har aşäl wa d-tässawädam tekle.

¹² Ehän təjjäşäm-däx, äjrät fälla-s ässälam;

¹³ afäl käwän-äsbärräkän məssaw-s, sänstät fälla-sän älxer wa täwwayäm; kunta day wär käwän-äsbärräkän məssaw-s, äglät d-älxer-näwän.

¹⁴ Ehän, wäla ayrəm, tosäm-däx, har wär käwän-äsbärräkän məssaw-s, meç unjäyän s-asjəd i-mäjräd-näwän, əzjərät-t, täbbäkbäkäm iðarän-näwän i-ad-wär käwän-iləttäx wäla äboqqal-net.

¹⁵ Äsidätteç-awän a-s ehän-en-däx, meç ayrəm-en-däx, aşäl wa ilkämän, tojär tisanant ta t-madät-tärməs ta tärmäsät içarman wi n-Sodoma d-Gomora.»

*Ilkam älyizabät
(Marqəs 13:9-13; Luqa 21:12-17)*

¹⁶ Inn'-asän day: «Ēnhəywät, näkk da-däx kăwän-äšimašälän i-ad-talähäm d-tihatten əllanen jer-tiḡəs; udayät i-iman-năwän šund taššälen, ijjöšet-kăwän älyafyät wa ihän tidäberen.

¹⁷ Agəzät iman-năwän däx-dägg-adəm; ad-kăwän-əjən däx-ifassän n-əlxəkum, əjən däx-wän tiwit däx-ihănan n-ăddin wi n-käl-Älyăhud.

¹⁸ Däx-təssəba n-isəm-in wa kăwän-iwarän, ad-hawän-aškən äddinät s-gəfărän d-imănokälän, tättärmăsăm-dd sâr-săn, məšan ad-umas a-wen əssəbab fäl tămoosăm tjuhawen-in, təjəm isălan-in i-tiwsaten ti n-inəzzulam.

¹⁹ Afäl təttärmăsăm, wăr təšăwwašät däx-isălan n-a-wa mad-tənnəm d-əmmək wa s-tăn mad-tənnəm, ed afäl tăbokăm i-măjräd, ad-kăwän-itwəkf a-wa mad-tənnəm,

²⁰ fäl-a-s wădden kăwăneḡ a maden-ämmăjräd, Unfas wa n-Abba-năwän a madän-ämmăjräd däx-idäggan-năwän.

²¹ Ad-isəttärməs əwadəm äŋŋa-s i-ad-ämmät, isəttärməs abba rure-s i-ad-ämmät, ännăbdădän aratän d-imărawän-năsän, əjən iman n-imărawän-năsän;

²² ad-dăr-wän akəḡdän äddinät iket-năsän däx-ăddimmät n-isəm-in wa kăwän-iwarän məšan ere ibdədän s-ăššahät däx-immun-net, ad-iḡləs.

²³ Afäl kăwän-äqquzäben äddinät däx-aḡrəm iyyän, jawăḡät-asän s-iyyän; äsidätteḡ-awän a-s, a-s dd-e-săḡləyăm iḡărman n-Işrayil iket-năsän, iqqal-dd Ägg-ägg-adəm.»

24 «Wär t-illa änätṭalib ufan älḡalim-net wāla akli ufan māssi-s,

25 igdāh ḡas i-änätṭalib, ad-ättiilāl älḡalim-net, ättiilāl daḡ akli māssi-s. Kunta äddināt wāla māssi-s n-ehän, jān-as isəm Abälzābil, a-wen Iblis, äb' ättāma n-a-wa he-ənnən fäll-inalkimān-net; ad-fälla-sän ənnən a ojarān a-wa ənnän fäll-māssi-s n-ehän.»

*Uksaḡāt Māssināḡ wādden dāḡg-adəm
(Luqa 12:2-7)*

26 «Ənneḡ-awän: Dāḡg-adəm, wär tān-tāksuḡām. Wär t-illa a ättunkälān s-wādden ad-dd-infiləl, wär t-illa a iffarān s-wādden ad-dd-iffukkār.

27 A-wa hawän-janneḡ dāḡ-takše, ännāt-t s-afälla dat-äddināt iket-nāsān; a-wa hawän-äsmātāktākāḡ, sāqqəyyāt-t fäll-afälla n-ihānan.

28 Wär tāksuḡām dāḡg-adəm-i wāren äddoobāt ar tenāḡe n-taḡəssa, wär-äddoben tenāḡe n-iman; änn-ak, uksaḡāt Wa äddoben ad-ihlök iman hakt taḡəssa dāḡ-žohännāma.

29 Ḣur-wän, wādden igḡaḡ əssin, tämma ḡas a nazzän? Hakt a-wen-dāḡ, wär-ilkem ad-dāḡ-sän oḡa iyyän, a ikkās Abba-nāwän wär otes s-a-wen,

30 wāla amḡadän n-iḡāfawän-nāwän, äḡḡinän.

31 Wär tārməḡām, tojarām abrök n-igḡaḡ älqim.»

(Luqa 12:8-9)

32 «Ere äsjāyhän dāḡg-adəm a-s näkk a t-ilän, ad-səjjəyhāḡ näkk-dāḡ Abba-nin-i ihän išənnawän a-s äwadəm-en, i-nin;

³³ ere daḡ wa hi-äkkuddälän dat-dägg-adəm, ad-t-əkkuddäläḡ näkk-däḡ dat-Abba-nin-i ihän išənnawän.»

*Täkoba wädden älher
(Luqa 12:51-53; 14:26-27)*

³⁴ Oläs daḡ, inn'-asän: «Wär teḡalät älḡafyät ad-dd-äwwäyäḡ s-äkall, täkoba, wädden älḡafyät a sär-s dd-äwwäyäḡ.

³⁵ Näkk, oseḡ-dd i-ad-ibḡəw ähaləs d-ti-s, təbḡəw talyaḡt d-ma-s, təbḡəw tamḡt d-tadäggalt-net,

³⁶ umasän käl-ehän n-äwadəm išənja-net.

³⁷ Ere hi-ässöfän ti-s meḡ ma-s, a-di, wär-änhäjja ad-umas änätḡalib-in, ere daḡ wa hi-ässöofän rure-s meḡ elle-s, wär-änhäjja ad-umas änätḡalib-in.

³⁸ Ere wa wärän äsdäw i-aḡkul n-tajəttewt-net ta n-tamättant, ilkəm-ahi, a-di, wär-änhäjja d-ad-umas änätḡalib-in.

³⁹ Ere wa wärän idgeḡ ar däḡ-igguḡ n-iman-net däḡ-äddunya-ta-däḡ, ad-ifut däḡ-älžännät, mäšan, wa irḡän äfota däḡ-iman-net däḡ-äddunya-ta-däḡ, däḡ-äddimmät-in, äwadəm-en, ad-iḡləs däḡ-älaxärät.»

*Hak äwadəm d-a-wa has-jän imojjan-net
(Marqəs 9:41)*

⁴⁰ Inna daḡ: «Ere käwän-äsbärräkän, näkk a äsbärräk, wa hi-äsbärräkän, wa hi-dd-äsmašälän a äsbärräk.

⁴¹ Ere äsbärräkän ännäbi däḡ-təssəba n-a-wa s-iqqäl ännäbi, əlkamän däḡ-s imraš šund wi mad-ijrəw ännäbi; ere äsbärräkän ere oḡadän

dat-Mässinäx dāx-tössəba n-iqqud-net, ilkam ad-ijrəw imraš šund wi mad-ijrəw ere oḡadān dat-Mässināx.

⁴² Ere wa issəswān wāla-dāx alkas n-aman sāmmednen i-yyān dāx-inəttulab dāx-tössəba n-a-wa s-āmoos ānəttalib-in, āsidätteḡ-awān a-s, wār t-e-ijmāḡ marušāt n-emärked wa āmešäl.»

11

Isəstanān wi ija Exya wa n-Enəsselmāx dāx-isālan n-Ḣisa

(Luḡa 7:18-35)

¹ Issəmdā Ḣisa asəmmətār n-inəttulab-net wi n-māraw d-əssin ḡas, ifāl dihen, ad-isayra āddināt, ixaṡṡāb dāx-iḡārman wi n-teje-ten-dāx.

² Iha Exya takārmuṡ a-s islā ijitān n-Ālmaseḡ, āšmašāl sār-s hārāt dāx-inəttulab-net

³ i-ad-has-t-dd-səstənān kunta ənta a-s Wa s-ātwānnā ilkam ad-dd-ass meḡ ilkam ere sāl ənta. Osān-t-dd inəttulab-win-dāx, əllāḡen-as a-wa innā Exya.

⁴ Āwwežāb-asān Ḣisa, inn'-asān: «Ḣqqəlāt Exya, suḡəlām-as a-wa s-təslām d-a-wa tənḡāyām;

⁵ ānnāt-as: iməddoryal hannāyān; inəbdan rajjāšān, wi ijrāw jəri tišdajān, imḡaj sallān; inəmmuttan nakkārān-dd; tilāqqiwen, sallānāt i-Ālənžil.

⁶ Təndəḡ i-ere wa dāx-i wārān ij' āššāk.»

A-wa innā Ḣisa fäll-Exya wa n-Enəsselmāx

7 Ʒglän meddøn-winnin dd-ämešälnen Ʒas, ädwännät Ʒisa i-tamøtte dāƷ-isälan n-Exya, inn'-asän: «Ak, a-s tøjäräm s-tenere, ma tønħäyäm? Ak tezewt äsiwälawäl adu a tønħäyäm? Äbo!

8 Adiš ma tökkäm i-ad-t-tønħeyäm? Ak ähaləs äsisahäƷän ašäl a tønħäyäm? Ʒnhøywät-tän-ak äddinät wi sasahaƷnen ašäl, ihänan n-imänokalän a əzzaƷän?

9 Adiš ma tökkäm i-ad-t-tønħeyäm? Ak ännäbi a tønħäyäm? Tidøt lab a-s ännäbi, ässiilmädäƷ-käwän a-s ere ojärän tumast n-ännäbi a tønħäyäm.

10 Ʒnta-en-däƷ a fäl innä ølkøttab n-MässinäƷ: <Ʒnhøy! ÄzizäräƷ-ak anämmašul-in wa he-iknøn tabarät-näk.>

11 ÄsidätteƷ-awän a-s wär torew tamädt ähaləs wär-ojer Exya wa n-EnøsselmäƷ mäšan hakd-a-wen-däƷ, wär t-illa ere t-wärän ojer dāƷ-Tømmønøya n-MässinäƷ.

12 Ʒur-ašäl wa dd-osa Exya har ašäl-i-däƷ, ija amjär äšsoohen fäll-ujøš n-Tømmønøya n-MässinäƷ; amjär-en, wär dāƷ-s ikärrøš ašäl ar äddinät wi økfärnen

13 fäl-a-s, ännäbitän wi dd-äzzarnen i-Exya iket-näsän, hakd-däƷ alämär wa n-ännäbi Mosa, äloläy a-wen-däƷ iket-net dāƷ-isälan n-Tømmønøya n-MässinäƷ hundäƷ har ašäl-i-däƷ n-äzzäman wa n-Exya wa n-EnøsselmäƷ.

14 Kunta fäw ad-täqbeläm s-a-wen-däƷ, ällexeƷ-awän a-s dāƷ-ännäbitän, ønta a-s ännäbi Ʒøli wa s-ätwänna ilkam ad-dd-aləs uƷøl.

15 Ämära, ere ilän timøzzujen s-islä-däƷ, isäjdət!»

16 Oläs daḡ Ḡisa, inn'-asän: «Ak, mi dār-mad-sənnəfäqqäḡ əzzurəyyät ta-däḡ? Täniḡäqqä ḡas d-älžämaḡät n-aratän janen aḡrəf däḡ-təfärre, jannen iyyäḡ i-wi iyyäḡnen:

17 <Ənhəywät, käwäneḡ, wär lem asäfar;

nəwät-awän taḡänibt, tunjäyäm s-dällol!

Nənžär-awän tiswal n-tisnant mäšan,

wär tətṭefäm iba!>

18 Exya, äzzäman wa dd-osa, wär-itətt imənsiwän olaḡnen, wär-isəss aman n-läḡnəb äxxiimmärnen, ənnän fälla-s äddinät: <Ih'-e alšin>,

19 işräy-t-dd Ägg-ägg-adəm, ənta itihär dār-wän a-wa tättäm d-a-wa sässäm, ḡas tənnäm däḡ-s: <Wa ənta, insäy, iräf aman n-läḡnəb wi äxxiimmärnen, inarmasän n-tiwse d-älfusaḡ wi iyyäḡnen a-s imidiwän-net.> Äsidätteḡ-awän a-s:

<Särho wa dd-ifälän Mässinäḡ,

ijitän n-äwadəm a t-isatbatän.> »

Iḡärman wi fäll-äsmäqqa Ḡisa (Luqa 10:13-15)

20 Äsmäqqa Ḡisa ḡarät-a-wen fäll-iḡärman wi däḡ-ija tikunen äjjootnen mäšan, äsḡärän-as ulhawän-näsän, unjäyän ätubän.

21 Inn'-asän: «Iməskay käl-Qorazin d-käl-Bäṭsäyda, älmäṣṣibät ḡas a fälla-wän maden-iḡəw ed ənnär iḡärman wi n-Tir d-Säyda

əzzäxän inəzzulam† a dəx-jänät tikunen-ti-däx jänen xur-wän, äru d-əlsän šakutän, əblənbulun dəx-ezəd fäl təmyäre n-tätubt-näsän.

²² A-wen-däx a fal hawän-jannex a-s ašäl wa ilkämän, ad-käwän ijjəš äddäyyät ojarän wa ijjäšan iğarman wi n-Tir d-Säyda.

²³ Käwäned-i-š əzzäxnen aɣrəm wa n-Qäfarnaxum, ma təxeläm? Tordam a-s aɣrəm-näwän ad-itimɣar har awəð išənnawän? Xəram-awän! Änn-ak, ad-təhələm ider, wär käwän-dd-e-tawäx a säl temse ed tikunen ti jänen xur-wän, ənnar janät dəx-aɣrəm wa n-Sodoma, äru d-ätubän imuzäxän-net, äqqayəm aɣrəm-näsän iday har ašäl-i-däx.

²⁴ A-wen-däx a fäl hawän-jannex, a-s ašäl wa ilkämän, ad-käwän-ijjəš äddäyyät ojarän wa ijjäšan aɣrəm wa n-Sodoma.»

Älyibadät n-Ÿisa i-Abba-net
(Luqa 10:21-22)

²⁵ İdkäl Ÿisa mäjräd, innä: «Abba, käyy-i n-Emäli n-išənnawän d-äkall, timələx-käy fäl-a-s härätän-wi-däx, təffärät-tän i-iməssorha d-imusänän n-äddunya-ta-däx mäšan, täsnäfaläläd-tän-dd wäla i-aratän.

²⁶ Tidət Abba, käyy a tiimələx ed ädduuttät a-s ənta-den-däx erhet-näk wa ähusken.»

Ämašal wa s-dd-osa Ÿisa d-täsonfat ta ihakk

† 11:21 11:21 — Ÿur-käl-Älyähud, ere wärän ämoos ägg-Älyähud s-aläšäl meɣ ere wärän ilkem i-äddin-näsän, iket-net, änäzzalim a ämoos. A-wen-däx a fäl tiwsaten ti iyyädnen iket-näsnät, ti n-inəzzulam. — Ašäl-i-däx, änäzzalim, äkafär (ere wärän issen s-Mässinäx).

²⁷ Innä Ƴisa i-äddinät darät-a-wen: «Wär t-illa a-s wädden ij'-e Abba-nin dāḡ-ifassän-in, wär t-illa ere hi-ijan muzəyät imdan kunta wädden Abba, wär t-illa daḡ ere ijan muzəyät imdan i-Abba kunta wädden näkk-i n-Rure-s-i t-dd-ifälän d-ere wa s-ärheḡ ad-has-t-zuzəyāḡ.»

²⁸ Inn'-asän daḡ: «Eyyäwät iket-dāḡ-nāwän kāwāneḡ-i äsifägga äzuk wa tällinjem, ad-hawän-sunfāḡ,

²⁹ mašälät erhet wa-nin, təyyəm-ahi ad-kāwän-sāḡrāḡ ed näkk, äzeedāḡ, hahi-tazidert, wär hi-iha əkkəbru; ənta-den-dāḡ a-wa hawän-ha täsonfat n-iman-nāwän, täḡləsäm.

³⁰ A-wa fälla-wän ärheḡ, wär-äzzay, amišəl n-erhet-in daḡ, i fäsuusän.»

12

Isälan n-ašäl wa n-əssəbət-i n-täsonfat (Marqəs 2:23-28; Luqa 6:1-5)

¹ Ašäl iyyän n-əssəbət-i n-ašäl wa n-täsonfat, iräs Ƴisa d-inəṭṭulab-net išəkraš n-älkäma. Eḡlan dāḡ-a-wen-dāḡ a-s älluzän inəṭṭulab, ad-nakkädän tiḡäḡänen n-älkäma, taffäzän tiblalen-näsnät.

² Ənhäyän-tän härät dāḡ-käl-faris ḡas, ənnän i-Ƴisa: «Ənhəy, äḡtəl inəṭṭulab-näk ed išl'-en a wärän itətwəjj dāḡ-ašäl wa n-əssəbət-i n-täsonfat.»

³ Inn'-asän: «Adiš kāwāneḡ wär täḡrem dāḡ-əlkəttab a-wa ij' ämänokal Dawəd ašäl wa d-älluz ənta d-ejhän-net?

⁴ Ätwänn'-anāḡ, ijjäš ənta d-ejhän-net ehän n-Mässināḡ, ad-tattän tijəlwen-ti n-tikutawen

s-innä alämär wa n-ännäbi Mosa, wär t-illa ere s-xälal tetäte-näsnät a säl käl-tikutawen? Tijəlwen-tin-däḡ, wär has-xälalnät ənta wäla ejhän-net mäšan, älluḡ ḡas, ikš'-enät ənta d-meddēn wi dār-äddew.

⁵ Ajän wär täḡrem däḡ-alämär a-s ašäl wa n-əssəbət-i n-täsonfat, käl-tikutawen wär hasän-ämoos anməšri i-a-wa innä alämär afäl əxdämän däḡ-ehän n-ämudd wa mäqqārän, ed əjrawän s-ad-ənməšrəyän i-färəḡän wi ätiwäḡtäsnen i-ašäl wa n-əssəbət-i n-täsonfat.

⁶ Ässiilmädäḡ-käwän a-s ehän n-ämudd wa mäqqārän, ill'-e jere-wän ere t-ojärän.

⁷ Xäxx, ənnar təssanäm älmäḡna n-a-wa innä Mässinäḡ a-s innä:

‹Ojär a-s ḡur-i la tähanint idəm uhən tikutawen›, iket-di-š, wär səḡlimäm bännan inəṡṡulab-wi-däḡ wären əḡšed härät.

⁸ Ägg-ägg-adəm, a ännihäḡän däḡ-a-wa s-ila ägg-adəm s-ad-t-äj d-a-wa s-wär ila s-ad-t-äj däḡ-ašäl wa n-əssəbət-i n-täsonfat.»

Äzozäy Ȳisa ähaləs s-äqqur äfuss-net däḡ-ašäl wa n-əssəbət-i n-täsonfat

(Marqəs 3:1-6; Luqa 6:6-11)

⁹ Ifäl Ȳisa dihen, ikk' ehän n-äddin wa n-käl-Älyähud.

¹⁰ Diha-däḡ d-t-ijjäš a-s ähaləs iyyän da-däḡ s-äqqur äfuss-net. Äggädän-dd äddinät iyyäd s-Ȳisa, ənnän-as: «Ak xälal meḡ xäram ad-izuzəy äwadəm iyyän däḡ-ašäl wa n-əssəbət-i n-täsonfat?» Äsarü ḡas fäl t-əssəḡlämän a-s tammäḡän.

11 Äwwežäb-asän Үisa, inn'-asän: «Әndek дәғ-wән wa s-afäl tođa tehäle ta n-iyyät ila дәғ-anu дәғ-ašäl wa n-össöböt-i n-täsonfat, ad-däғ-s tät-äyy har akөy ašäl-en төzzar?

12 UҺөн kәwәneđ, wәр төjrehäm a-s ägg-adөm ufa arөzzej s-a äjjeen? Ässiilmädäғ-kәwән a-s wәр t-illa a ässixrämän iji n-a olaxән дәғ-ašäl wa n-össöböt-i n-täsonfat.»

13 Innä Үisa җarät-a-wen i-ähalөs wa s-äqqur äfuss-net: «Әzzөл äfuss-näk.» Izzäl ähalөs äfuss-net, izzäy, oläh äfuss-net ässayät-wen-däғ d-äfuss-net wa iyyäđән wәр-ijrew härät.

14 Әzjärән käl-faris edägg-en ғas, әnmәнһäyән jer-iman-näsән дәғ-isälan n-өmmөk wa s-mad-өjөн iman-net. Ilmäд Үisa a-wa läbasән has-kittөwән ғas, ifäl dihen, iglä.

Үisa a-s әnämmašul n-Mässinäғ wa s-ätwәнna

15 Däғ-tekle-net, өlkämән-as-dd imarhinән äjjootnen, äzozäy-tән iket-däғ-näsән.

16 Härwa wәр-ifel dihen-däғ, äsmätär-tән hul-lan d-ad-wәр jen isälan n-ere wa ämoos i-әwadөm wäl' iyyән.

17 Ämoos a-wen inna a ässiitbätән a-wa innә әnnäbi Saya† a-s innә, innә Mässinäғ:

18 «Әnta da әnaxdim-in wa әsnäfrәнäғ,
өnta a өkneғ tärha,
өnta a дәғ-әsriwән iman-in.
Ad-fälla-s sänsäғ Unfas-in,

† 12:17 12:17 A-wa әnnäbi dd-äzzarән i-Үisa, әloläy дәғ-isälan-net өssayät timađ n-awätay dat-tiwit-net.

isessiḡəd inəzzulam† dāḡ-iqqud i-Mässināḡ.

¹⁹ Wār t-mad-ijjəš əjad,
wār mad-isəqqəy bännan,
wār t-illa ere has-madän-isəll əsiḡəyya
dāḡ-tišarriten bännan.

²⁰ Wār mad-ärz wäla-dāḡ tezewt
a-wa-dāḡ has-ija iba n-əddāḡwa
Wār mad-isəmməkət wäla-dāḡ tefätelt,
ad-isəjār ätṭäma äddinät wi əbrärnen,
əj iqqud dāḡ-edəgg iket-net.

²¹ Isəm-net a madän-isəjār inəzzulam ätṭäma.»

*Tärna ta n-Ḳisa, wār toher härät d-ta n-Iblis
(Marqəs 3:20-30; Luqa 11:14-23; 12:10)*

²² Äwwayän-dd äddinät s-Ḳisa ɗarät-a-wen
amälšon əsidärḡäl alšin wa t-iḡän, ikras daḡ iləs-
net; əzozäy-t, oläs ahänay, ad-itaməjrad.

²³ Əqqälän-dd äddinät ḡas oran imawän,
äkuunän, jannen: «Ämmukkän ənta-i-dāḡ a-s
Ägg-Dawəd wa s-ätwänna!»

²⁴ Əslän käl-faris i-a-wen ḡas, ənnän: «A-wa
Abälzäbil, Iblis wa n-ämänokal n-alšinän a t-
iḡan; ənta a t-ikfän tärna ta s-itakkäs alšinän
dāḡ-äddinät.»

²⁵ Ilmäd Ḳisa ḡur-iman-net a-wa zinəzjumän,
inn'-asän: «E d t-illäm əddəwəl s-dd-əqqälän
məssaw-s əknasän jer-iman-näsän, ad-t-iba,

† **12:18 12:18** — Ḳur-käl-Älyähud, ere wärän ämoos
əgg-Älyähud s-aləşäl meḡ ere wärän ilkem i-äddin-näsän,
iket-net, ənəzzalim a ämoos. A-wen-dāḡ a fäl tiwsaten ti
iyyädnen iket-nəsän, ti n-inəzzulam. — Aşäl-i-dāḡ, ənəzzalim,
əkafär (ere wärän issen s-Mässināḡ).

umas timšar; aɣrəm daɣ wälä ehän wa s-dd-əqqälän mössaw-s əknasän jer-iman-näsän, wär-e ähaj ibdad.

²⁶ Afäl dd-ıqqäl İblis isattäɣ iməššerəkän-net siha d-siha, iman-net ɣas a iknas; ere iknasän d-ıman-net ya, wär t-illa əmmək s-ähoja ibdad.

²⁷ Kunta daɣ tənnäm näkk, tärna n-Abälzäbil wa n-ämänokal n-alšinän a-s tän-takkäsäɣ däɣ-äddinät, adiš, inəttulab wi-näwän, ma ämoos isəm wa s-tän-takkäsän däɣ-äddinät? Inəttulab-näwän-en-däɣ, a-s ilkam ad-äjjayhən fälla-wän, sədləmän-käwän,

²⁸ mäšan, kunta näkk, tärna n-Unfas n-Mässinäɣ a-s takkäsäɣ alšinän däɣ-äddinät, äniihäjja a-s ässiilmäd-käwän a-wen a-s Təmmənəya n-Mässinäɣ, təll'-ee jere-wän.

²⁹ Wär t-illa ere äddooben uješ n-ehän n-ähaləs n-anäkfor, awəy ilalän n-ehän-net ar s-ad-t-ıkrad təzzar; dihen, ad-udabät teräzze n-ehän, awəy a-wa t-ihän.

³⁰ Ere hi-wärän irha-däɣ, a-di, ašänjo-nin; ere daɣ wa hi-wärän itilal s-asdu, ašəmmähəs ɣas a t-išlan.»

Abäkkad wa s-wär t-təlla tenäšše-net amäɣlol

³¹ Inn'-asän daɣ: «Ässiilmädäɣ-käwän a-s abäkkad ämešäl ägg-adəm d-asəkkufär ija-däɣ, äddoobät Mässinäɣ ad-has-t-in-änš mäšan ere äskafärän däɣ-isälan n-Unfas Šäddijän-däɣ, wär-ilkem ad-has-in-ätiwänša.

³² Ere innän a läbasän fäll-Ägg-ägg-adəm-däɣ, äddoobät ad-ıjrəw tenäšše n-a-wen mäšan, ere wa innän a läbasän däɣ-isälan n-Unfas

Šaddijän, wär-ilkem ad-has-in-ätiwänša dāḡ-
äddunya wāla ālaxārät.»

*A-wa ijänna ägg-adəm a isalmadän s-a-wa
ihän ulh-net*

(Luqa 6:43-45)

³³ Oläs daḡ, inn'-asän: «Ahəšk olayän, a-
s mad-t-tasəd, aratän-net daḡ i olaynen; erk
ahəšk daḡ, a-s t-mad-t-tasəd, aratän-net daḡ, i
läbasnen; ahəšk, aratän-net a-s ititwəzzəy.

³⁴ Ya kāwāneḡ-i n-taššälen-i-dāḡ! Kāwāneḡ-i
n-inälläbäsän, əndek əmmək wa s-äddoobät ad-
dd-izjār məjräd olayän imawän-nāwän? A-wa
iḡkārän ulh n-ägg-adəm a dd-izajjārän emm-net.

³⁵ Äwadəm-wa oläḡän, miḡaw n-ulh-net a
dāḡ-dd-itakkäs a-wa oläḡän mäšan, enälläbäs
ənta, tälläbäst n-ulh-net a dāḡ-dd-itakkäs a-wa
läbašan.

³⁶ Ässiilmädäḡ-kāwän a-s ašäl wa ilkämän e-d
t-təlläm taxxalt d-tašujəšt inna äwadəm, ad-tät-
izəl dat-Mässinäḡ.

³⁷ Iyyät-i-dāḡ, ad-käy-iḡləs məjräd-näk, meḡ
daḡ, məjräd-näk iman-net, a käy-madän-isiḡəw,
iwär-käy uḡlem.»

Irrum wa jän käl-faris i-ḡisa

(Marqəs 8:11-12; Luqa 11:29-32)

³⁸ Äwwežäbän-as iyyäḡ dāḡ-älḡulam n-
Äṡṡawrät d-käl-faris, ənnän-as: «Äḡalim, äj
data-näḡ iji n-Mässinäḡ, nənhäy.»

³⁹ Äwwežäb-asän, inn'-asän: «Əzzurəyät-
ta-dāḡ n-tenälläbäst n-temäznit, wär täksuḡ
Mässinäḡ; wär təmmäḡ ḡas ar ad-ətwəjjən ijitän

n-Mässināḡ data-s māšan, təlmədet a-s wār-ilkem dāḡ-s iji n-Mässināḡ sāl wa n-ännābi Yunəs.

⁴⁰ Emmək-wa-dāḡ s-kāla ikkās Yunəs kərəḡ išilan d-kərəḡ ihādan dāḡ-tāsa n-emān wa māqqārān, əmmək-wen-dāḡ daḡ a-s mad-ikkəs Ägg-əgg-adəm kərəḡ išilan d-kərəḡ ihādan dāḡ-ider n-ākall.

⁴¹ Ašāl wa n-tebādde, ad-dd-ənkārān käl-ayrəm wa n-Nəniba, səḡləmān käl-əzzurəyāt-ta-dāḡ, ed ašāl wa d-hasān-ixtāb ännābi Yunəs, ātubān. Sājdāt! Ašāl-i-dāḡ, ənhəywāt-ak, ill'-ee jere-wān ere ojarān Yunəs, māšan hakd-a-wen-dāḡ, tunjāyām s-ad-tutabām.

⁴² Ašāl wa n-tebādde, ad-dd-tənkār təmānokalt ta s-kāla tāxkām dāḡ-ākall wa n-ajus s-isəm-net Saba, tājjāyh fäll-käl-əzzāman-i-dāḡ, səḡləm-tān dāḡ-āššərəḡa ed, ənta təfāl-dd ākall ujęjān i-ad-səjəd i-iməjridān n-tayətte wi itājj āmānokal Sulāyman. Sājdāt! Ašāl-i-dāḡ, ənhəywāt-ak, ill'-ee jere-wān ere ojarān āmānokal Sulāyman, māšan hakd a-wen-dāḡ, tunjāyām s-asjəd-has.»

*Elhəllak wa ihān iba n-tātubt təmdat
(Luqa 11:24-26)*

⁴³ Olās daḡ, inn'-asān: «E-d izjār alšin āwadəm, ad-ākk tinariwen i-ad-dāḡ-snāt immāḡ i-edāgg dāḡ-əssunfa māšan, ad-has-t-iba;

⁴⁴ afāl has-t-āba, ad-änn i-iman-net: <Nākk-i-dāḡ, ma hi-idgazān, əqqələḡet ḡas ehān-in wa dd-fälāḡ.> Afāl dd-iqqāl edāgg wa ifāl s-tizarāt, ad-t-dd-ass wār t-ih' āwadəm, ifraḡ, ämmujnāt.

⁴⁵ Igləw älwäqq-wen, awəy-dd əssa alšinän iyyäd t-ojärnen tälläbäst, əjjəšan äwadəm-ənnin-däx, əzzäxän däx-s; umas a-s talxa n-äwadəm-en ta täzzarät, təššäm i-ta təšräyät.» Inn'-asän qarät-a-wen: «Ənta-den-däx a-wa dār-mad-taläh talxa n-əzzurəyät-ta-däx n-tenälläbäst.»

Anna d-ayətma n-ÿisa
(*Marqəs 3:31-35; Luqa 8:19-21*)

⁴⁶ Ämmiijräd ÿisa i-tamətte dihen-däx a-s ma-s d-ayətma-s da-däx dd-əbdädnen dat-emm n-ehän, äšmašälän-dd sār-s äwadəm i-ad-hasän-t-dd-iḡār.

⁴⁷ Osä-dd äwadəm-en ÿisa, inn'-as: «Anna-näk d-ayətma-k, əbdadän-ak dat-emm n-ehän, ärhan ahänay-näk.»

⁴⁸ Äwwežäb ÿisa i-äwadəm-en, inn'-as: «Mi iqqalän anna-nin, mi iqqalän ayətma-ḡ?»

⁴⁹ Izzäl äfuss däx-tanämhāla n-inəṭṭulab-net təzzar, innä: «Ənhəywät-tän-ak, anna-nin d-ayətma-ḡ!

⁵⁰ E d t-illäm ere itamašälän erhet n-Abba-nin-i ihän išənnawän, ənta a-s äṇṇa-ḡ, ənta a-s wälätma-ḡ, ənta a-s ma-ḡ.»

13

¹ Izzār ÿisa ašäl-wen-däx, ikk' asälim n-əjänš, äqqima.

² Täddew-dd sār-s tamətte täjjeet, ijjäš-as turäft n-aman, äqqima däx-s, täqqimä-dd tamətte ənta təbdad däx-asälim n-aman, täsijäd-as.

³ Issäxläy-tän tangalen äjjootnen. Ij'-asän tiyyät dāḡ-hasän-innä:

Tangalt ta n-änäsdamu
(*Marqəs 4:1-9; Luqa 8:4-8*)

⁴ «Käla izjār änäsdamu iyyän i-ad-iddumət ašəkrəš-net.

Älwäqq wa d-itidumut, oḡänät tiblalen tiyyäḡ dāḡ-äbara, äkkukkären-tänät-dd igḡaḡ, əksän-tänät.

⁵ Oḡa ašār iyyän jer-tihun, äffoqqät-dd šik ed wār-intem dāḡ-äkall,

⁶ täsmäqqät-dd täfukt jənnəj-s, təssärya isəffuqqa, äqqur-in a-di iket-net ed wār-əntemän ikewän-net dāḡ-härät.

⁷ Oḡa ašār iyyän dāḡ-tabəññənt, tədwäl-dd fälla-s tabəññənt, təzmäd-as.

⁸ Oḡa ašār wa iyyäḡän dāḡ-äkall olayän, ikräš aratan, ijä tiboläsen s-tiyyäḡ teməḡe n-tablalt a tänät-iwarän, tiyyäḡ säḡisät timərwen, tiyyäḡ kərəḡät timərwen.

⁹ Ere ilän timəzzujen s-islä-dāḡ, isäjdet!»

Äddälil n-tangalen
(*Marqəs 4:10-12; Luqa 8:9-10*)

¹⁰ Əssəstänän-t inəṭṭulab-net ḡarät-a-wen d-äddälil wa fäl isaylay äddinät tangalen.

¹¹ Äwwežäb-asän, inn'-asän: «Käwäneḡ, təjrawäm turhajät n-ujreh n-əddäraj wa n-isälan n-Təmmənəya n-Mässināḡ mäšan, äddinät wi iyyäḡnen, wār jen a-wen.

12 Äwadəm wa s-išwār ifhäm härät, ad has-iwwaḍ musnät har isəssikəy məšan, wa s-wār t-illa a ijrah, wār t-in-ikka härät, änn-ak, ad-däx-s ämahäx wäla a-wa əndärrän itṭäf.

13 Ənta-den-däx a-wa fäl saḡläyäx äddinät tangalen i-ad-:

<Əswaḍän, wār hənniyän;
äsižadän, wār səllən;
wār t-illa daḡ a jarrähän.> »

14 Ämoos a-wen a ässiitbätän a-wa fälla-sän inna ännäbi Saya† a-s innä, innä Mässinäx:

«Äddinät! Ad-salläm, wār järrehäm;
ad-təkyadäm, täsibälaläxäm, wār t-illa a hannäyäm.»

15 Ənta daḡ a innän a-s, innä Mässinäx:

«Tamətte-ta-däx, täsxär-ahi ulh-net;
täzmäzzaj'-ahi iman-net,
täsdärxäl-ahi iman-net
i-ad-äbas hannay, äbas sall,
i-ad-wär jarräh härät
fäl iba n-tärha-i-däx ja n-ad-sär-i dd-tənnäd,
tutab, zuzəyäx-tät.»

16 Inna Yisa ḍarät-a-wen i-inəṭṭulab-net: «Təndəḍ-awän käwəneḍ ed hannäynät tiṭṭawen-näwän, sallänät daḡ timəzzujen-näwän.

17 Ässiilmädäx-käwän a-s, äsdärhänän ännäbitän äjootnen d-imayḍalän ahänay n-a-wa hannäyäm məšan, wār t-ənhəyän; äsdärhänän məsällät n-a-wa s-sälläm məšan, wār has-əslen.»

† 13:14 13:14 A-wa ännäbi dd-äzzarän i-Yisa, äloläy däx-isälan-net əssayät timaḍ n-awätay dat-tiwit-net.

*Älmäyna n-tangalt ta n-änäsdamu
(Marqəs 4:13-20; Luqa 8:11-15)*

18 Säjdät ämära i-älmäyna n-tangalt ta n-änäsdamu:

19 «Äbara wa dăḡ-ođänät tiblalen, ənta a-s äddinät wi sällänen i-isälan n-Təmmənəya n-Mässinäḡ mäšan, wär tän-järrähän, as'-en-dd Iblis, ilbəy-dd dăḡ-ulhawän-näsän a-wa s-əslän.

20 Tihun ti jer-ođänät tiblalen, əntänäteḡ a-s äddinät wi s-e-d isla iyyän dăḡ-sän i-mäjräd n-Mässinäḡ, ad-ihliləy, iqbəl-t šik mäšan,

21 wär t-itəyy ikraš ikewän dăḡ-ulh-net; ad-äj äzzäman əndərrän äkoyäd dăḡ-s, mäšan afäl dd-tosa tissust meḡ osä-dd älyizabät dăḡ-təssəba n-mäjräd n-Mässinäḡ, ad-hin-ibbuṭṭəl a-wa s-omän.

22 Tabəññənt ta jer-ođänät tiblalen, ənta a-s äddinät wi s-e-d isla iyyän dăḡ-sän i-mäjräd n-Mässinäḡ, ad-has-izməd dăḡ-ulh-net s-tärha n-wälät-äddunya d-eyläł n-tärha n-ajmur-net, wär t-illa a sār-s dd-isayṣal.

23 Äkall wa olăḡän dăḡ-ođänät tiblalen, ənta a-s äddinät wi s-e-d isla iyyän dăḡ-sän i-mäjräd n-Mässinäḡ, ad-t-ijräh, ijješ-as-t älfäyda. Tarəw-dd sār-s tiyyät tablalt temede n-tablalt, tarəw-dd sār-s tiyyät sädisät timərwen n-tablalt, tarəw-dd sār-s daḡ tiyyät kərəḡät timərwen n-tablalt.»

Isälan n-əttäḡam d-terk teyəsše

24 Issäḡläy-tän-dd Ḳisa daḡ tangalt tiyyät dăḡ-hasän-innä: «Təmmənəya n-Mässinäḡ, täniḡäqqa d-ähäləs iyyän infärän əttäḡam olăḡän dăḡ-ašəkrəš-net.

25 Ija ehäḍ, ɵṭṭäsän äddinät ɣas, osä-dd ämiksän iyyän ašəkrəš wa n-älkäma äddomät ähaləs-ənnin, infär däɣ-s erk idommän, iglä.

26 Äsfäqqät-dd ašəkrəš wa n-ɵttäɣam wa oläɣän, oräw, tədwäl-dd daɣ terk teyəšše edes-has.

27 Ənhäyän inaxdimän n-mässi-s n-ašəkrəš terk teyəšše ta dd-tədwälät ɣas, osän-t, ənnän-as: <Mässi-näɣ, ajän wädden käyy ɵttäɣam olayän ɣas a tənfaräd däɣ-ašəkrəš-näk, əndek siha s-dd-ha terk teyəšše ta t-hät ämära?>

28 Inn'-asän: <A-di imojjan n-ere hi wärän irha.> Ənnän-as inaxdimän-net: <Adiš, nəlbəyet-tät-in?>

29 Inn'-asän: <Aha-aha! Wär jem a-di, ed afäl tɵttäräm ad-hin-təlbəyäm terk teyəšše, ham miši n-ad-hin-təlbəyäm daɣ älkäma.>

30 Äyyät-tän ad-ədwälän issənän-essän har äzzäman wa n-amili n-išəkraš, dihen, ad-ännäɣ i-wi tiləynen išəkraš, ad-dd-əlbəyän terk teyəšše s-tizarät, əjən-tät tikärrad, təzzaɣ, säryən-tät, sədwən-ahi-dd ɗarät-a-wen älkäma, əjən-t däɣ-ejänd-in.> »

Təmmənəya n-Mässinäɣ, a əndärrän a-s sän̄ta, timyar

(Marqəs 4:30-32; Luqa 13:18-19)

31 Issäɣläy-tän-dd daɣ ɗarät-a-wen tangalt tiyyät, inn'-asän: «Təmmənəya n-Mässinäɣ, toläh d-temätäwt äddomät äwadəm däɣ-ašəkrəš-net.

32 Temätäwt-ten-däɣ, ənta a tojərät təmmətkit däɣ-idommän mäšan, tədwäl-dd, täqqäl ahəšk

ojärän tiyöššawen n-ašəkrəš iket-nəsənät har
zattän igdađ iskak-nəsän dəḡ-iləktan-net.»

(Luqa 13:20-21)

³³ Issäyläy-tän-dd tangalt tiyyät daḡ, inn'-asän:
«Təmmənəya n-Mässināḡ, toläh d-takmöttet n-
täzza təssärtäy tamäđt d-kärađ ännäfäḡatän n-
ejel n-älkäma i-ad-ikəf iket-net.»

(Marqəs 4:33-34)

³⁴ Tangalen a dəḡ-issäḡra Ḳisa isəlan-wi-dəḡ
iket-nəsän, wär t-illa a inna i-tamötte s-wädden
tangalen a dəḡ-hasän-t-inna.

³⁵ Ämoos a-wen a ässiitbätän a-wa innä
ännäbi n-Mässināḡ iyyän, innä Mässināḡ:
«Ad-säḡləyäḡ äddinät tangalen,
äjäḡ isəlan s-ad-dd-täxläk äddunya-dəḡ,
ättunkälän.»

*Älmäḡna n-tangalt ta n-əttäḡam d-terk
teyöšše*

³⁶ Ifäl Ḳisa tamötte, ijjäš ehän ḡas, əkkän-
t-dd inəṭṭulab-net, əttärän dəḡ-s ad-hasän-arr
tangalt ta n-terk teyöšše.

³⁷ Inn'-asän: «Ägg-ägg-adəm ənta, a
äddomen əttäḡam wa oläḡän,

³⁸ äddunya a-s ašəkrəš-net; əttäḡam wa
oläḡän a-s aratän n-Təmmənəya n-Mässināḡ,
terk teyöšše a-s aratän wi n-Iblis.

³⁹ Iblis a-s ämiksän wa äddomen terk teyöšše
dəḡ-ašəkrəš, amili n-išəkraš a-s sämdo n-
äddunya, änjälösän a-s imalayän n-ašəkrəš.

⁴⁰ Emmək-wen-dəḡ s-dd-tatälbay terk teyöšše,
tämmädkäl, tətwejär-in dəḡ-efew, əmmək-wen-
dəḡ a he-ijən ašäl wa d-tamänd äddunya.

41 Ašäl-en, ad-išəmmišəl Ägg-ägg-adəm änjälosän-net i-ad-hin-aləmän däḡ-Təmmənəya-net äddinät wi šinməsrəynen imidiwän-näsän d-wi tamašalnen a läbasän, ədkəlän-tän,

42 əjrən-tän-in däḡ-tahəst-i däḡ-tän wär mad-išləw ar tahäla, zıməkärkizän isenän fäl tämujrizt.

43 Ašäl-en, äddinät wi oḡädnen dat-Mässinäḡ, ad-fälla-sän äj Mässinäḡ ännur-net, əjən asmäḡmäḡ wa täjj täfukt däḡ-Təmmənəya n-Abba-näsän.

Ere ilän timəzzujen s-islä, isäjdet!»

Wär t-illa a-s wädden tojār-t Təmmənəya n-Mässinäḡ

44 Inn'-asän Ȳisa daḡ: «Təmmənəya n-Mässinäḡ, toläh d-əjänd n-oräḡ inbalän däḡ-ašəkrəš iyyän. Təgla tanfust har ašäl wa d-fällas oḡa ähaləs iyyän. A-wa-däḡ has-ja tedäwit, ikn'-e ufär i-ad-wär sār-s iləmməd äwadəm wäl' iyyän. Iglä ḡarät-a-wen, ättužžär-in a-wa ila iket-net i-ad-udabät akäraš n-ašəkrəš-en-däḡ däḡ-inbal oräḡ-wənnin-däḡ.»

45 Oläs daḡ, inn'-asän: «Təmmənəya n-Mässinäḡ, toläh d-u-mamäla itammäḡän i-timäḡwanen n-tilällaten,

46 ijrāw tiyyät təknaḡt əlləllu ḡas iglä, ättužžär-in a-wa ila iket-net, iqqäl-dd, izžəns'-et.»

47 Inn'-asän daḡ: «Təmmənəya n-Mässinäḡ, toläh d-tätart jārän iməhhuyya n-imānan däḡ-əjäns i-ad-sār-s dd-ärməsän tulaten n-imānan äjjootnen,

48 təḡnäy tätart ḡas, əntäšän-tät-dd s-asälim n-aman, ad-biḡḡun imānan s-iiyän-iiyän, hak

iyyän d-əzzənəf-net. Jän wi əfrännən dəḡ-deketän-näsän, jārän-in fälla-sän wi hasän wär iha älfäyda.

⁴⁹ A-wen-dəḡ dəḡ a madän-äj ašäl wa d-tamänd äddunya, a dd-asən änjälosän, əbdəwän imaydalän d-inälläbäsän,

⁵⁰ əjrən-in inälläbäsän dəḡ-tahəst ta-dəḡ tän-wär mad-išləw ar tahäla, zıməkärkizän isenän fäl tämujriṭ.»

⁵¹ Issəstän Yisa inəṭṭulab-net dərat-a-wen, inn'-asän: «Ak a-wa hawän-ənnəḡ, təjrahäm-t meḡ?» Ənnän-as: «Əyya, nəjrah-t.»

⁵² Inn'-asän: «E d t-illäm älxalim n-Äṭṭawrät iknan afäham n-a-wa ämoosän isälan n-Təmmənəya n-Mässinəḡ, irḡa sār-sän, ad-has-iwwad musnät äynayän fäll-wa ärəwän ila, afäl ija a-wen, ad-aläh d-abba n-eḡewən dd-itakkäsän härätän äynaynen d-i ärəwnen dəḡ-ijändän-net.»

*Äsyärän käl-Nəşirät ulhawän-näsän i-Yisa
(Marqəs 6:1-6; Luqa 4:16-30)*

⁵³ Issəmda Yisa tənna n-tangalen-tin-dəḡ ḡas, ifäl dihen,

⁵⁴ ikkä təḡrəmt ta dəḡ-idwäl. Issäḡra dihen dəḡ-ehän n-äddin wa n-käl-Älyähud, äkunän äddinät iket-näsän dəḡ-a-wa isəḡra, əqqälän-dd ḡas oran imawän, jannen: «Wa, əndek siha s-t-dd-ha təlxuləma-ta-dəḡ d-tikunen ti itäjj?

⁵⁵ Ajän wädden a-wa rure-s n-mənizye wa-dəḡ nəzzäy? Wädden ma-s, Märyäma? Ayətma-s: Yaqub, Yusəf, Simyon d-Hudd?

⁵⁶ Ajän wädden šätma-s da-däḡ t-öllänen jere-näḡ? ʔas əndek siha s-t-dd-iha a-wa-däḡ itäjji iket-net?»

⁵⁷ Jän-as a-wen-däḡ s-t-əzzayän asäkor, unjäyän sār-s omänän. Inn'-asän: «Ännäbi, wär t-illa edägg s-wädden ätiwäsämyär däḡ-s ar däḡ-äkall-net d-ḡur-käl-ehän-net.»

⁵⁸ Igdäl-as iba n-immun-näsän ad-ḡur-sän äj tikunen äjjootnen.

14

Tamättant n-Exya wa n-Enösselmäḡ (Marqəs 6:14-29; Luqa 9:7-9)

¹ Äzzäman-en-däḡ ad-dd-iwwäd mawmaw n-ʔisa Harudəs wa n-ämänokal n-teje ta n-Galila.

² Issäḡrā-dd käl-əlxəkum-net, inn'-asän: «Ähaləs-wa-hi s-sälläḡ, Exya wa n-Enösselmäḡ dd-olasän tanäkra jer-inəmmuttan, a-wen-däḡ a t-ikfän tärna n-tikunen ti itamašal.»

³ Innä Harudəs a-wen fäl-a-s ənta iman-net a ästärmäsän Exya, ij'-e däḡ-tišəm təzzar ij'-e däḡ-takärmüt, däḡ-təssəba n-Harudəyät ta n-hänne-s n-äñḡa-s Fəlibb däḡ-s ohäḡ Harudəs.

⁴ Äzzäman-en-däḡ ad-äsmäqqa Exya fäll-Harudəs, inn'-as: «Wär hak-xälal ad-tärkəbäd hänne-s n-äñḡa-k.»

⁵ Ad-itammäḡ ya Harudəs i-äsaru fäl t-issänḡa mäšan, äksuḡ tamətte ed iket-net tössan a-s Exya, ännäbi a ämoos.

⁶ Təgla tanfust har ašäl wa n-isəkta n-tiwit n-ämänokal Harudəs. Ašäl-en, däḡ-äzzäho wa

ijän, tögğäd-dd elle-s n-Harudöyät, ad-dalläl dat-imäjarän wi-dd-osänen; ijräz a-wen i-ämänokal.

⁷ Däx-tedäwit-net, iyr'-et-dd, ijjäš-as ärkäwäl n-ad-tät-äkf a-wa däx-s mad-töttär, a ämoos-däx.

⁸ Təglä talyaqt, töttär äddäbara däx-ma-s, tontäj-tät-dd ma-s, tønn'-as, änn'-as: «Ärheey däx-k eḡäf n-Exya insa däx-aḡäwa.» Təglä tämawaqt, ja isälan däx-ämänokal.

⁹ Ənxäsän iman n-ämänokal mäšan, äbas äddoobät uḡel s-a-wa inna, ed ihäḡ-as s-ad-tät-äkf a-wa däx-s mad-töttär, a ämoos-däx, dat-imäjarän-net. Omär ḡarät-a-wen s-ad-itwəjj a-wa tärha.

¹⁰ Issəglä äwadəm wa inakkäḡän iḡäfawän n-käl-takärmüt wi länen s-tamättant, inkäḡ-dd eḡäf n-Exya,

¹¹ äwwäy-t-dd insa däx-aḡäwa; ikf'-e i-talyaqt, täwwäy-t talyaqt i-ma-s.

¹² Osän-dd inəṭṭulab n-Exya ḡarät-a-wen, əḡkälän tafəkka-net, əḡkän-tät; əkkän Ḳisa, jän däx-s isälan.

*Səmmos afdän n-ähaləs wi äsyäwän Ḳisa
(Marḡəs 6:30-44; Luḡa 9:10-17; Exya 6:1-14)*

¹³ Əjjäšan isälan n-iba n-Exya Ḳisa ḡas, ifäl teje-ten-däx däx-turäft n-aman, ikkä tenere n-iman-net mäšan, əslän-t äddinät ḡas, fälän-dd iḡärman, älliilän asälim n-ejäns, əlkamän-as.

¹⁴ Izjär-dd Ḳisa turäft n-aman, inhäy tamətte-ta-däx täjjet has-dd-təlkämät ḡas, tänx'-e tähanint-net, ad-däx-sän izizuy wi n-inaxyabän.

¹⁵ Ja takkäšt ḡas, ohäzän-t-dd inəṭṭulab-net, ənnän-as: «Älḡalim, tenere a nəha, ij'-anḡ

ehäđ, səfəl iman-näk tamötte, ad-täkk tidbi-ti ohäznen žänš-dd a təkša.»

¹⁶ Inn'-asän Үisa: «Wär ämḡatārān s-ad-əkkən edägg. Un, šäksät-tän käwāneđ iman-nāwān.»

¹⁷ Ənnān-as: «Wär nətṭef ar səmmosät tijəlwen d-əssin imānan.»

¹⁸ Inn'-asän: «Awəyät-ahi-dd a-wa tətṭäfäm.»

¹⁹ Omār ɗarāt-a-wen s-ad-əqqaymən äddinät fäll-teyəšše, idkäl tijəlwen ti n-səmmosät d-imānan wi n-əssin, äjožäy išənnawān, ämmoy i-Mässināḡ; äfräsfārās tijəlwen, änkäɗnäkäɗ imānan təzzar, ikfä a-wen-däḡ iket-net i-inəttulab-net, äzunān-t jer-äddinät.

²⁰ Əksän iket-däḡ-nāsän har əyyəwānān, äsdāwān-dd a-wa dd-təjläš tamötte, osān-t iɗnāy mārāw deketān d-əssin n-tijəlwen d-imānan.

²¹ Səmmos afdān n-āwadəm däḡ-wär äɗɗinnät tiɗeɗen wāla arātān a ikšän ašäl-wen-däḡ.

Räjjoš n-Үisa fäll-aman

(Marqəs 6:45-52; Exya 6:15-21)

²² Izzəlzäm Үisa ɗarāt-a-wen inəttulab-net uješ n-turäft ta n-aman i-ad-has-izarān s-efäyy n-ejānš wa iyyäɗān, ad-isagla ənta tamötte.

²³ Issəglä tamötte ḡas, iwwān tadaḡt tiyyät, ad-itəddal Mässināḡ. A-s toɗa tāfukt, wär dd-əqqima däḡ-edägg-ənnin-däḡ, ar ənta ḡas.

²⁴ A-s ija a-wen, turäft n-aman ta däḡ-əglän inəttulab täsisägdäh ejānš māšan, inkär-dd fälla-sän aɗu äwwiḡwäḡān turäft, bähhälnät-as tināzzämären siha d-siha.

²⁵ Igl' ehäđ ḡas, ilkäm-asän-dd irjaš fäll-aman.

26 Īnhäyän-t inəttulab, ikk'-en-dd irjaš fäll-aman ɣas, ärmäxän, ad-jannen: «Os'-anäx ämättänkul iyyän», ad-nađđawän iɣaran.

27 Ässewäl-asän šik, inn'-asän: «Meddön, änsət ənniyät-näwän, näkk a-wa; wär tärmexäm.»

28 Iggäd-dd Bətrus dəx-a-wen-däx, innä i-Ÿisa: «Älyalim, kunta käyy a-wa, amär s-ad-käy-in-äkkäx, näkk-däx, ärjašäx fäll-aman.»

29 Inn'-as Ÿisa: «Eyyäw!» Izjār-dd Bətrus turäft n-aman, ikkä-dd Ÿisa irjaš fäll-aman.

30 Inhäy Bətrus əşşuhu n-ađu fäll-ejäns ɣas, irmäx, əqqälän-t aman alämaž älwäqq-wen-däx, ad-isaxarat, ijanna: «Ya Älyalim! Agəz-ahi.»

31 Irmäs-t-dd Ÿisa s-äfuss, inn'-as: «Təmmətkit ija immun-näk, ma itajjän äššäk dəx-ulh-näk.»

32 Ejjäšän-dd turäft fäll-inəttulab wi iyyäđnen ɣas, ibdäd ađu.

33 Īnhäyän wi äqqimänen dəx-turäft a-wen ɣas, ärkäxän data-s, ənnän-as: «Tidət-däx a-s käyy a-s Rure-s n-Mässinäx.»

Äzozäy Ÿisa imarhinän dəx-teje ta n-Žännäšarät

(Marqəs 6:53-56)

34 Täsjän turäft n-äman-näsän älwäqq-wen-däx dəx-teje ta n-Žännäšarät.

35 Ezzäyän-t käl-axrəm-en ɣas, ošälän, jän isälan dəx-attayän-en, ad-sär-s dd-tiwəyän äddinät e d t-illäm ere ärhiinän.

³⁶ Laqqädän käl-aḡrəm Ḡisa dāḡ-ad-tän-äyy, ad-äḍəsän kud-dāḡ afär n-eräswäy-net, ed ere t-iḍäsän-dāḡ, ad-izzöy.

15

Alkum i-agna (Marqəs 7:1-13)

¹ Osän-dd käl-faris iyyäd d-härät dāḡ-älḡulam n-Äṭṭäwrät dd-falnen Yärussälam Ḡisa,

² önnän-as: «Mafäl tinmöšrəyän inəṭṭulab-nāk i-agna wa hanāḡ-dd-oyyän imärawän-nänāḡ? Tattän wär-ässerädän ifassän-näsän s-əmmək wa s-t-ifrəḍ agna-nänāḡ.»

³ Äwwežäb-asän Ḡisa, inn'-asän: «Ad-kāwän-səstənāḡ: kāwänəḍ-š, mafäl tinmöšrəyäm i-alämär wa n-Mässināḡ, tajjäm agna-nāwän jənnəj-s?»

⁴ Wädden Mässināḡ innä:

‹Səmyär ti-k d-ma-k›,
innä dāḡ:

‹Ere äbodärän ti-s meḡ ma-s, adiš, ämmätet.›

⁵ Təssanäm s-a-wen-dāḡ iket-net mäšan, iyyäd dāḡ-wän, saḡren äddinät a-s äddoobät äwadəm ad-änn i-ti-s d-ma-s: ‹A-wa s-äsidärhänāḡ ad-kāwän-ədhələḡ sär-s, jeḡ-t takute i-Mässināḡ.› Ija ḡur-wän a-s ere innän a-wen-dāḡ i-imärawän-net, ad-äbas t-iwar älxaqq-näsän.

⁶ Ənhəywät ḡas a-wa kāwän-išlän: təsbäṭṭäläm-in a-wa inna Mässināḡ, jäm a-wa hawän-inna agna-nāwän dāḡ-edägg-net.

⁷ Älmunafexän yaden! Tidət a-wa fälla-wän innä ännäbi Saya† a-s innä, innä Mässinäx:

⁸ <Tamətte ta-hi, idlay-net xas

a-s hi-tässiimxär

ulh-net, ujəj-ahi;

⁹ Älxibadät-wa hi-täjj d-tikutawen ti hi-täjj,

mälaxəna xas

ed a-wa säxren fäll-ismawän n-Mässinäx,

wär ämoos xas ar färəḏän dd-äxtasän i-iman-näsän.> »

A-wa isaməḏasän ägg-adəm

(Marqəs 7:14-23)

¹⁰ Ixrä-dd Yisa tamətte s-iman-net ɗarət-awen, inn'-as: «Säjdät, təjrahäm a-wa hawän-janney:

¹¹ wädden a-wa itajjäsän emm n-ägg-adəm a t-isaməḏasän, a-wa dd-itəffalän ammas n-ulh-net ijänna s-emm-net a t-isaməḏasän dat-Mässinäx.»

¹² Ohəzän-t-dd inəttulab-net, ənnän-as: «Käyy ya, a-wa tənned, ikma käl-faris hullan.»

¹³ Inn'-asän Yisa: «E d t-illäm eməxt s-wädden Abba-nin-i ihän išənnawän a t-äddomen, ilkam, ad-hin-ättälbäy.

¹⁴ Äyyät käl-faris d-iman-näsän, olähän xas d-imalwayän ɗärxalnen; emədderxəl ya ilwayän amidi-net, ejəḏäl xas a əkkan issənän-essän ɗəx-anu.»

¹⁵ Iggäd-dd Bətrus, inn'-as: «Fassär-anəx tangalt-ta-ɗəx jed. »

† 15:7 15:7 A-wa ännäbi dd-əzzarän i-Yisa, äloläy ɗəx-isälan-net əssayät timəḏ n-awätay dat-tiwit-net.

16 Inn'-asän Yisa: «Ŷas käwäneḍ-däḡ, wär t-illa a tøjrahäm härwa?

17 Ajän wär tøjrehäm a-s äsink esäk? A-wa isuk äwadəm emm-net, täsa-net ḡas a itakk, ijärt-in ḍarät-a-wen däḡ-täkoyt

18 mäšan, mäjräd wa dd-izajjärän emm n-äwadəm, ulh-net a dd-itəffal, ənta-den-däḡ a-wa t-isaməḍasän dat-Mässinäḡ

19 fäl-a-s ulh n-ägg-adəm, a dd-itəffal erk ənniyät, iji n-iman, əzzəna, iba n-täkrakiḍt, tikra, tajuhe n-bahu, təkkuḑära.

20 Əntäneḍ-den-däḡ härätän wi saməḍasnen äwadəm, wädden tetäte wär-ässeräd ifassän-net.»

Äzozäy Yisa elle-s n-taməḍt tiyyät (Marḡəs 7:24-30)

21 Ifäl Yisa edägg-en ənta d-inəṭṭulab-net ḡas, ikkä teje ta hän iḡärman wi n-Tir d-Säyda.

22 Ill'-ee dihen-däḡ a-s šik-däḡ, taməḍt tiyyät ila äkall wa n-Xäna da-däḡ t-dd-tosät, ad-t-laqqäd, saḡärat, jann'-as: «Älḡalim! Ya Ägg-Dawəd, aḍən-ahi tähanint; elle-ḡ tällubbäḍ, issəkn'-et älšin wa tät-ihän aḡäna.»

23 Wär t-illa a has-inna Yisa. Əggädän-dd sār-s inəṭṭulab-net, ənnän-as: «Säḑəl-anäḡ taməḍt-ta-däḡ, täsḡäf-anäḡ, e-s nəkka-däḡ, täseḡärät ḍara-näḡ!»

24 Inn'-asän Yisa: «Näkk tamətte ta n-käl-Işrayil-i toolähät d-tihatten ässujjälnen a-s hi-dd äšmašäl Mässinäḡ. A-wa säl əntäneḍ, wär hi-sār-s-dd-äšmašäl.»

²⁵ Mășan hagd a-wen-däx, tökk'-e-hi-dd tamädt, tärkäx data-s, tønn'-as: «Älyalim, äkkəs-ahi tekäriđt.»

²⁶ Äwwežäb-as Yisa, inn'-as: «Wär-änhäjja ad-dd-ikkəs äwadəm amənsi daw-aratän, ijär-t-in i-iyäđan?»

²⁷ Tønn'-as tamädt: «Älyalim, tidət məšan, a-wen wär-ikkəs a-s afäl älwäqq wa d-itätt məssi-s n-ehän, äddooben iyyäđan ad-äkkämen a-wa ititrökkin.»

²⁸ Ja mäjräd-wen-däx xas, inn'-as Yisa: «Tamädt! Immun-näm, tidət-däx a-s i mäqqärän; äjet a-wa töttäräd.» Təzzäy elle-s däx-tamäzäyyat-ten-däx.

Äzozäy Yisa imarhinän äjjootnen

²⁹ Ifäl Yisa teje-ten-däx xas, ikkä asälim n-ejänš wa n-Galila, iwwän dihen tađaxt tiyyät äqqima fälla-s.

³⁰ İkkän-t-dd äddinät äjjootnen äwwaynen inəbdan d-iməddorxal d-inaxyabän d-äddinät s-əkradän ilsawän-näsän d-imarhinän äjjootnen, əssənsän-tän daw-ıdarän-net; äzozäy-tän iket-däx-näsän.

³¹ Äkunän äddinät däx-a-wa ija ed hannäyän a-s, wi s-käla əkräsän ilsawän-näsän, tamäjrädän; inaxyabän, tazzäyän; inəbdan, rajjäšän; iməddorxal, hannäyän. Tənhäy tamətte a-wen xas, ad-t-timəl, janna: «Təmmal i-Emäli wa n-İşrayil.»

*Äsyäwän Yisa əkkož afđän n-äwadəm
(Marqəs 8:1-10)*

³² Ikkäs-dd Ƴisa inəttulab-net s-takše, inn'-asän: «Naqq'-ahi tähanint n-tamətte-i-däx; a ilan kärađ išilan, təlcam-ahi, äbas əttafän äddinät a əksän, wär-äddobex ad-tän-sägläx älluzän s-əmmək-wa-däx, ad-hasän-indär ad-hin-awədän ihänan-näsän fäl iba n-ässhät.»

³³ Ənnän-as inəttulab-net: «Əndek diha d-mad-nəjrəw tijəlwen äšsikšänen tamətte jat əjut-wa-däx däx-tenere-ta-däx?»

³⁴ Inn'-asän: «Maniket tijəlwen təttäfäm?»
Ənnän-as: «Əssayät, nəttaf dađ härät n-imänan.»

³⁵ Äsɣäyma Ƴisa tamətte iket-net,

³⁶ idkäl darät-a-wen tijəlwen ti n-əssayät d-a-wa t-əkfän däx-imänan, ämmoy i-Mässinäx, äfräsfäräs annin-däx iket-net təzzar, ikf'-e i-inəttulab i-ad-t-užanän jer-äddinät.

³⁷ Təkša tamətte ta təllät dihen-däx hundäx har təyyəwän iket-däx-net, äsdəwän-dd inəttulab a-wa dd-əjläšan äddinät, osän-t idnay əssa deketän.

³⁸ Əkkoz afdän n-əwadəm däx-wär äddinnät tiđeđen d-aratän a ikšan ašäl-wen-däx.

³⁹ Issəglä Ƴisa tamətte darät-a-wen təzzar, ijjäš turäft n-aman, ikkä teje ta n-Magadan.

16

*Edəwänne wa ija Ƴisa d-käl-äddin
(Marqəs 8:11-13; Luqa 12:54-56)*

¹ Ašäl iyyän, osän-dd härät däx-käl-faris d-käl-sadus Ƴisa, jän-as asəstan däx-otasän irrum-net, i-ad-əjrəwän äsarü fäl t-əssədlämän, ənnän-as:

«Äj data-näx iji n-Mässinäx hanäx-issətbätän a-s tidət-däx a-s Mässinäx a käy-dd-äšmašälän.»

² Äwwežäb-asän, inn'-asän: [«Ajän wädden e-d täbok täfukt i-ejäḍäl har tənähäyäm a-s šäggaḡ, ad-tənnəm: <Ašəkka, wär-e iwət ajəнна.>

³ Afäl äffäw har tənähäyäm ajəнна ikannä-dd, ad-tənnəm: <Ašäl-i, ad-iwət ajəнна, ənhəywät-ak, käwal-dd.> Käwäneḍ-i s-e-d təküädäm išənnawän, ad-təlmədäm a-wa dd-imälän, mafäl hawän-indar ad-täḡrəm išmal n-äzzämanän wi jänen, təfhəməm älmäḡna-näsän?]

⁴ Käl-əzzurəyät-ta-däx, tenälläbäst n-temäznit, wär tömmäx ḡas ar i-ad-ətwəjjən ijitän n-Mässinäx data-s mäšan, təlmədet a-s wär däx-s ilkem iji n-Mässinäx säl wa n-ännäbi Yunəs.» Inn'-asän ḡisa a-wen ḡas, ifäl-tän, iglä.

*Təmmətkit n-immun n-inəṭṭulab
(Marḡəs 8:14-21)*

⁵ Ijläy ḡisa ənta d-inəṭṭulab-net ejänš s-ašrut wa iyyädän. Əglan fäll-ejänš-en-däx a-s dd-əktän inəṭṭulab-net a-s wär-əwweyän äzzad däx-tijəlwen.

⁶ Əjläyän ejänš ḡas, inn'-asän ḡisa: «He käwäneḍ! Ağəzät iman-näwän däx-täzza ta n-käl-faris d-käl-sadus.»

⁷ Inn'-asän ḡisa a-wen ḡas, ad-tinmənnin jer-iman-näsän: «A-wa, a-wa däx s-wär nəwwey tijəlwen a fäl hanäx-itajj mäjräd-wa-däx.»

⁸ İlmäd ḡisa ḡur-iman-net a-wa däx-zinəzjumän, inn'-asän: «Mafäl tinmənnim? <A-wa, a-wa däx s-wär nəwwey tijəlwen a

fäl hanäx-itajj mäjräd-wa-däx, tömmötkit ija immun-näwän.

⁹ Adiš, käwäneḍ har ämära-däx, wär t-illa a tøjrahäm? Ajän töttewäm-in sëm mosät tijelwen-ti täzunäm i-sëm mos afdän n-ähaləs? Maniket deketän dd-täsdawäm däx-a-wa dd-töjläš tamötte?

¹⁰ Adiš töttewäm-in əssayät tijelwen-ti s-äsyawänäx əkkoḗ afdän n-ähaləs, maniket deketän dd-töjläš tamötte?

¹¹ Ma hawän-igdalän ad-təfhämäm a-s wädden tijelwen a däx-hawän-ässewäläx? A hawän-ənnəx: «Agəzät iman-näwän däx-täzza ta n-käl-fariš d-käl-sadus.» »

¹² Inn'-asän Yisa a-wen xas, əfhämän a-s wädden isälan n-täzza ta n-tijelwen a däx-hasän-ässewäl, änn-ak, ämmijräd-asän däx-isälan n-ad-agəzän iman-näsän däx-a-wa säxren käl-fariš d-käl-sadus.

*Tajuhe ta ija Bəṭrus däx-isälan n-Yisa
(Marqəs 8:27-30; Luqa 9:18-21)*

¹³ Ikkä Yisa ḍarät-a-wen aḡrəm s-itawänna Qäyšära wa n-Fəlibb. Dihen-däx ad-issəstän inəṭṭulab-net, inn'-asän: «Ma jannen äddinät, mi ämoos Ägg-ägg-adəm?»

¹⁴ Ənnän-as: «Iyyäd jannen: käyy a-s Exya wa n-Enəsselmäx; iyyäd jannen: käyy a-s ännäbi Yəli; iyyäd fäw a jannen: käyy a-s ännäbi Yirmiya† meḡ iyyän däx-ännäbitän dd-olasän uḡəl.»

† 16:14 16:14 A-wa ännäbi dd-əzzarän i-Yisa, äloläy däx-isälan-net säḍisät timaḍ n-awätay dat-tiwit-net.

15 Inn'-asän: «Käwäned-š, ma tønnäm, mi ämoosä?»

16 Iggäd-dd Bəṭrus, inn'-as: «Käyy a-s Älmasex wa n-Rure-s n-Mässinäḡ-i iddärän.»

17 Inn'-as ʃisa: «Simyon ägg Exya, təndəḡ-ak ed isälan wi s-iket tän-jed, wädden ad-dd-təkkasäd dəḡ-eḡäf-näk, Abba-nin-i hän išənnawän a hak-tän-dd-äsnäfalälän.

18 Näkk dəḡ, ənneḡ-ak: isəm-näk Bəṭrus,† ässiilmädəḡ-käy a-s fäll-tähunt-ten-dəḡ, ad-mad-ädyäḡ älkänisät-in s-älaxärät wäla Iblis, wär fälla-s mad-ikrəš ašäl;

19 ad-käy-äkfäḡ isyar n-Təmmənəya n-Mässinäḡ, a təgdäläd fäll-ärori n-äkall, ad-itwəgdəl dəḡ-išənnawän, a təqbäläd fäll-ärori n-äkall, ad-itwəqbəl dəḡ-išənnawän.»

20 Äsmähäd ʃisa ḡarät-a-wen s-äššahät dəḡ-inəṭṭulab-net i-ad-wär-ənnen i-äwadəm wäl' iyyän a-s ənta a-s Älmasex.

Issəlmäd ʃisa inəṭṭulab-net s-tamättant-net d-tanäkra-net

(Marḡəs 8:31-9:1; Luḡa 9:22-27)

21 ʃur-ašäl-wen-dəḡ, ad-issəntä ʃisa asəlmad n-inəṭṭulab-net a-s ilzam-t ad-äkk Yärussäläm, inhəy dəḡ-s tersəmmawen äjjootnen jer-ifassän n-inušämän wi n-Išrayil d-imänokalän n-kältikutawen d-älḡulam n-Äṭṭäwrät; ad-əjən iman-net mäšan, ašäl wa s-kəraḡ ḡarät tamättant-net, ad-dd-inkär jer-inəmmuttan.

† 16:18 16:18 Älmäḡna n-isəm-net dəḡ-Tälyunanit: Tähunt.

22 Ij'-asän Yisa mäjrad-wen-däx xas, ikkäs-t-dd Bətrus s-takše, ad-itikləwləw fälla-s, ijann'-as: «Älyalim, ogäz-käy Mässinäx! A-wen ya, wär t-illa əmmək s-käy-irmäs.»

23 Ikna Yisa akäyad däx-Bətrus, inn'-as: «Šenkəš fäll-i Iblis-wa, käyy əssəbab n-anməšri a hi-tämoosäd ed inəzjam-näk, i n-dägg-adəm wädden i n-Mässinäx.»

*Alkum i-Yisa Älmasesx
(Marqəs 8:34-9:1; Luqa 9:23-27)*

24 Inna Yisa ɗarät-a-wen i-inəttulab-net: «Ere irhän alkum-hahi-däx, adiš, iksənet iman-net, äjet fäll-tamättant šund ta n-tajəttewt təzzar, ilkömet-ahi.

25 Wa wärän itəttär ar əmmək s-ogäz iman-net däx-äddunya-ta-däx, ad-ifut däx-älžännät mäšan, wa irdän äfota däx-iman-net däx-äddunya-ta-däx, däx-äddimmät-in, ad-ijjəš älzännät.

26 Ma s-infa ägg-adəm ad-irbäx äddunya iket-däx-net, a-s ija a-wen, äfota däx-älaxärät? Ajän ma t-illan s-äddoobät äwadəm ad-t-äkf i-ad-sär-s ixləs iman-net däx-temse?

27 Ašäl wa dd-mad-iqqəl Ägg-ägg-adəm däx-älxurmät n-Abba-net äddeew d-änjəlosän-net, ašäl-en, hak äwadəm d-a-wa has-jän imojjan-net.

28 Ässiilmädäx-käwän a-s han-käwän äddinät əbdadnen diha-däx, wär-e iba, wär-ənhəyän Ägg-ägg-adəm ijjaš Təmmənəya-net.»

17

*Tihusay n-älxurmät n-ÿisa Älmasex
(Marqəs 9:2-13; Luqa 9:28-36)*

¹ Sädis išilan ɗarät a-s inna a-wen-däx, iɣräd-d Bətrus d-Yaqub d-Exya wa n-äŋŋa-s n-Yaqub s-edes, ikka dār-sän taɗaxt tiyyät šəjreet.

² Əllan-t dihen-däx a-s ijjäš data-sän ini äynayän, ämmuttäy, äsmäxmäx idəm-net šund täfukt, jän-dd imälsan-net təmölle ta n-ännur äsimäxmäxän.

³ A əndərrän ännäbi Mosa d-ännäbi Ƴəli da-däx hasän-dd-änfalälnen, falän-dd išənnawän, ad-taməjradän d-ÿisa.

⁴ Iggäd-dd Bətrus, innä i-ÿisa: «Älyalim, ufa ad-nəzzäx ɣas diha-däx, kunta tärɗed s-a-wen, ad-əkresäx kəraɗ ihəktan: wa-näkk, wa n-Mosa d-wa n-Ƴəli.»

⁵ Hərwa-däx ämmiijräd a-s, tejäräkt tiyyät täsimäxmäxät da-däx tän-dd-təlsät s-tele-net, ijmäd-tät-dd eməsli innän:

«A-wa Rure-ɣ wa əkneeɣ tərha,
ənta a däx-äsriwän iman-in, säjdät-as!»

⁶ Əslän inəttulab i-eməsli-wen-däx ɣas, händ-d äbbunbəyän iket-däx-näsän a-wa-däx hasän-təja tərəmməxt.

⁷ Ikk'-en-dd Ƴisa, issənsä ifassän-net fälla-sän, inn'-asän: «Wär tərmeɣäm, ənkərat-dd.»

⁸ A-s dd-əɗkälän idmawän-näsän, wär t-illa ere hannäyän ar Ƴisa.

⁹ Ätrarän-dd taḍaxt ɣas, inn'-asän Ƴisa: «Wär jem isälan n-a-wa hawän-dd-änfalälän ašäl-i-däx i-äwadəm wäl' iyyän, har ašäl wa dd-mad-inkär Ägg-ägg-adəm jer-inəmmuttan.»

¹⁰ Ʒsəstänän-t ḍarät-a-wen, ənnän-as: «Mafäl jannen älyulam n-Ättäwrät a-s ännäbi Ƴəli a ilan s-ad-dd-ass təzzar, isrəy-t-dd Älmasex?»

¹¹ Äwwežäb-asän, inn'-asän: «Tidət, ännäbi Ƴəli a ilan s-a-dd-ass, isəssiḡəd härät iket-net,

¹² mäšan, ässiilmädäx-käwän a-s ännäbi Ƴəli, äru dd-osa, äkkuddälän-t dägg-adəm, jän-as a-wa s-ärhän. A-wen-däx has-jän a-s ilkam daḡ, ad-t-əjən i-Ägg-ägg-adəm.»

¹³ Inn'-asän a-wen ɣas, əfhämän inəttulab a-s Exya wa n-Enəsselmäx a-s hasän-iha ti-net.

*Äzozäy Ƴisa alyaq n-amälšon
(Marqəs 9:14-29; Luqa 9:37-43a)*

¹⁴ Älwäqq wa dd-iqqäl Ƴisa d-inəttulab-net tamətte, ikk'-e-hi-dd ähaləs iyyän, irkäx data-s a t-ilaqqäd, ijann'-as:

¹⁵ «Älyalim, adən tähanint i-rure-x, təjraw-t tašäkärkärät t-saknet aḡäna hullan. E-d t-tärmäs, ad-itidəw däx-efew, itidəw däx-aman dehiyyän.

¹⁶ Äwwäyäx-t-dd s-inəttulab-näk mäšan, indär-asän ad-t-zuzəyän.»

¹⁷ Innäq-dd Ƴisa ḍarät-a-wen s-inəttulab-net, inn'-asän: «Ya əzzurəyät-i-däx wärät tomen s-Mässinäx, tänimäšräy-as, hundäx har əmme

өлөҕҥ jere-wän, əşbaräx-käwän? Awəyät-ahi-dd alyad.»

¹⁸ Os'-e-hi-dd alyad, äsmähäd Үisa дәҕ-alšin i-ad-t-izjār; izjār-t, izzäy ässaḡät-wen-däx.

¹⁹ Əkkäsän-dd inəṭṭulab ḡarät-a-wen Үisa s-ässaxät d-wär ḡur-s t-illa äwadəm s-takše, ənnän-as: «Alšin-wənnin-hi, mafäl hanäx-indär ad-t-nəkkəs дәҕ-alyad?»

²⁰ Inn'-asän: «Təmmətkit-i ija immun-näwän a hawän-igdalän s-a-wen; ənnar wädden a-wen, ässiilmädäx-käwän a-s afäl ogdäh immun-näwän d-temätäwt ta tojārät təmmətkit дәҕ-idommän har tənnäm i-aḡax-wa-däx: <Haan дәҕ-edägg wa hed, təddəkäd dihen>, ad-äj a-wa has-tənnäm; ad-äbas t-illa fäw a hawän-indarän. [

²¹ Alšin daḡ šund wa-hi, wär t-itəkkəs ar tamädilt n-Mässinäx d-äzum.]]»

*Äsihe wa s-əssin d-itajj Үisa isälan n-tamättant-net d-tänäkra-net
(Marḡəs 9:30-32; Luḡa 9:43-45)*

²² Älwäqq wa dd-iqqäl Үisa d-inəṭṭulab-net teje ta n-Galila, inn'-asän: «Ägg-ägg-adəm, išwar ättermäš, ijješ ifassän n-ägg-adəm,

²³ ad-əjən iman-net mäšan, ašäl wa n-käraḡ, ad-dd-inkär jer-inəmmuttan.» Ənxäsän iman n-inəṭṭulab a-s hasän-innä a-wen-däx.

Isälan n-tiwse

²⁴ Ijjäš Үisa d-inəṭṭulab-net tayrəmt ta n-Qäfärnaxum ḡas, osän-dd inarmasän n-tiwse n-ehän n-ämudd wa mäqqārän Bəṭrus, ənnän-as:

«Ajän älyxalim wa-näwän, wär-ihökk tiwse ta n-ehän n-ämudd wa mäqqärän?»

²⁵ Inn'-asän Bətrus: «Ihakk'-et lab.» Ijjäš-dd Bətrus ehän fäll-Ÿisa ɣas, iššəšwār-as Ÿisa, issəstän-t, inn'-as: «Ma torded Simyon, mi ilan s-ad-itəzzal tiwse i-imänokalän n-äddunya: ak imäjarän meɣ käl-äkall a lanen s-ad-hasän-əzəlän tiwse?» Inn'-as Bətrus: «Imäjarän.»

²⁶ Inn'-as Ÿisa: «Adiš käl-äkall, wär tän-təlzem.

²⁷ Ämära, i-ad-wär näqqen iyäfawän n-äddinät n-ehän n-ämudd wa mäqqärän ramməsnen tiwse, äkk ejäns, tərməsäd-dd däɣ-s emän iyyän, tarəd emm-net, ad-däɣ-s tøjrewäd ärriyal n-azrəf, tökkəsät-t-dd, təzləd fälla-näɣ näkk d-käyy.»

18

Tārha n-mijraw

(Marqəs 9:33-37; Luqa 9:46-48)

¹ Ohäzän-dd inəttulab Ÿisa älwäqq-wen, ənnän-as: «Ma ämoos äwadəm wa ojärän däɣ-Təmmənəya n-Mässinäɣ?»

² Iɣrä-dd Ÿisa ara əndärrän s-iman-net, ij'-e jere-sän,

³ inn'-asän: «Ässiilmädäɣ-käwän a-s a tökkäsäm wär tutabäm, taləhəm d-aratan, xəram-awän ujəš n-Təmmənəya n-Mässinäɣ.

⁴ Ere wa äsräsän iman-net har aläh d-ara-wa-däɣ, ənta a-s wa ojärän däɣ-Təmmənəya n-Mässinäɣ;

⁵ ere daɣ wa äsbälälän ara šund wa-däɣ, däɣ-äddimmät-in, näkk a äsbäläl.»

*Wär jem a he-isidəwän əwadəm dəx-abäkkad
(Marqəs 9:42-48; Luqa 17:1-2)*

⁶ «Aratän dəx wi sār-i omännen, ere hasän-ämoosän əssəbab n-tanməšrayt-dəx, əwadəm-en, iššäm-as-in, ad-tətwäqqən təhünt ta mäqqārät s-itəzzad älkäma dəx-err-net, itwəjär-in dəx-ider n-əjärew wa səmmän, əksən-t aman.

⁷ Tamäskoyt äddunya dəx-təssəba n-tinməšrayen ti dəx-s tajjänen fäl-a-s, wär t-illa əmmək fäw s-mad-täqqayəm äddunya-ta-dəx wär dəx-s änmäšräyän äddinät, mäšan, amäskoyt əwadəm wa madän-umas əssəbab n-tanməšrayt-ten-dəx.

⁸ Käyy, kunta äfuss-näk mex ađär-näk a käy-isifun abäkkad, adiš, ənkäd-t-in, təjrəd-t-in fälla-k härwa wär tämešäläd abäkkad-wen-dəx, ed uf'-ak, ad-təjjəšäd älzännät jeed äfuss, mex ađär, uhən leed əssin ifassän-näk d-əssin idarän-näk, tətwəjäräd-in dəx-efew wa s-härkuk ähijäljäl;

⁹ kunta dəx tiṭṭ-näk a käy-isifun abäkkad, adiš, kukkərət-tät-dd, təjrəd-tät-in fälla-k härwa wär tämešäläd abäkkad-wen-dəx, ed uf'-ak, ad-təjjəšäd älzännät jeed tiṭṭ, uhən ad-leed sanatät tiṭṭawen, tətwəjäräd-in dəx-žohännäma, temse ta s-härkuk tähijäljäl.

¹⁰ He käwäned! Wär läkkähät wäl' iyyän dəx-aratän-win-dəx ed ijmad-t äššäk a-s əbdadän änjälosän-näsän hak ässaḡät dat-Abba-nin-i ihän išənnawän i-ad-tän wär-itəddis härät. [

¹¹ Ägg-ägg-adəm, osä-dd i-ad-iḡləs äddinät wi ässujälnen.]»

*Isälan n-tehäle ta tässujjälät
(Luqa 15:3-7)*

¹² Inn'-asän Yisa darät-a-wen: «Ad-kāwān-səstənāḡ: ma tēnnām? Kunta ila āwadəm temede n-tehäle, har dāḡ-snät tässujjäl tiyyät, ma he-āj? Wādden ad-āyy ti n-təzzayät timərwen d-təzzayät əfradnät fäll-tiḡayen, isəssəjjəl ta hin-odän?

¹³ Afäl-tät dd-ijrāw, ad-āj tedāwit tojārät ta ija a-s ila ti n-təzzayät timərwen d-təzzayät wāren ässujjäl.

¹⁴ Emmək-wen-dāḡ daḡ a-s mad-äddāwät Abba-nāwān-i ihän isənnawān ed wār-irha fāw ad-iba wäl' iyyän ḡas dāḡ-aratān-net.

*Isälan n-tenāšše jer-imumənän dāḡ-älkānisät
(Luqa 17:3)*

¹⁵ Afäl kāy-idlām āḡḡa-k, äkk'-e, səlmədäd-t s-a-wa hak-iḡšād jere-wān əssin-ewān ḡas. Afäl hak-äsjäd, adiš jed-t dāḡ-tabarät ta tolāḡät, wār t-illa daḡ a iḡasän temiḡt-nāwān

¹⁶ māšan, afäl unjāy s-asjəd-hak, əqqəl-t-dd täddewād d-āwadəm, meḡ əssin, dāḡ-təssəba n-ad-ājJayhän äddinät i-a-wa itawānnen iket-net ed

«Hārät iket-net, ufa ad-ila sānatät meḡ kāraḡät tijuhawen.»

¹⁷ Afäl jed a-wen-dāḡ uhən-dāḡ har āmāra-dāḡ, unjay s-asjəd-hawān, sərrəwrəw-as s-älkānisät. Afäl has-təmməjräd älkānisät har unjāy s-asjəd-has, umaset data-k šund ānāzzalim n-amājar, meḡ šund ānarmas n-tiwse.

18 Äsidätteḡ-awän a-s a-wa təkṛädäm fäll-ärori n-äkall-i-däḡ, ad-itwəkrəd ašäl wa ilkämän, a-wa toräm daḡ fäll-ärori n-äkall-i-däḡ, ad-amar daḡ ašäl wa ilkämän.

Tartit däḡ-tamädilt n-Mässinäḡ

19 Ässiilmädäḡ-käwän daḡ a-s fäll-ärori n-äkall-i-däḡ, edägg däḡ-änmārdän əssin däḡ-wän fäll-talya, a tämoos-däḡ, har dälän Abba-nin-i ihän išənnawän, ad-äj a-wa däḡ-s əttärän

20 fäl-a-s edägg iket-net däḡ-äžžimmäḡän əssin, meḡ kāṛad inəṭṭulab-in, däḡ-äddimmät n-isəm-in, əlleḡ jere-sän.»

Tenäšše d-iba-net

21 Ohāz-t-dd Bəṭrus älwäqq-wen, inn'-as: «Älyalim! Har maniket ihändäggan d-hitəwar tenäšše i-änḡa-ḡ hi-iḡdallämän? Ak, ajän əgdähän əssa ihändäggan?»

22 Inn'-as Ḳisa: «Äbo, wär-ənneḡ har əssa ihändäggan, a hak-janneḡ, našš'-as har əssayät timərwen janen əssa inəḡfusän.»

23 Issäḡläy-tän Ḳisa tangalt, inn'-asän: «Təmmənəya n-Mässinäḡ, tänifäqqa d-ämänokal dd-issäḡrän äddinät wi irwäs i-ad-has-sidənən a-wa tän-irwäs, əzəlän-as.

24 Han isälan n-a-wen-däḡ a-s dd-ittəlwäy äanaxdim-net iyyän irwas azrəf-i-däḡ äjjen.

25 Mäšan ma n-əmmək! Indär-as ad-izəl azrəf-wen-däḡ ḡas, omär mässi-s s-ad-hin-änš ənta d-hänne-s d-aratän-net d-a-wa ila däḡ-ilalän iket-net i-ad-inmiwəḡ ənta d-ehäre-net.

26 Isl' äanaxdim i-a-wen ḡas, ošäl s-mässi-s, irkäḡ dat-mässi-s, ad-t-ilaqqäd, ijann'-as:

⟨Ya mässä-χ, əşbär fäll-i tene-ta-däχ, təkföd-ahi täqqän täynayät i-ad-hak-əzələχ ehäre-näk iket-däχ-net.⟩

²⁷ Tänyä tähanint-net mässä-s χas, äsdärfät, inš'-as-in a-wa t-irwäs iket-net.

²⁸ Mäšan, diha-däχ dd-izjār ānaxdim-ənnin-däχ fäll-mässä-s, ad-ämmoqqäs d-iyyän däχ-imidiwän-net dār-ännixdäm irwas hārät n-azrəf, äkbättät-t s-täkorsäyt, oχay-as, ijann'-as: ⟨Əzəl-ahi ehäre-in wa käy-ihän.⟩

²⁹ Irkäχ-as amidi-net, ad-t-ilaqqäd, ijann'-as: ⟨Əşbär fäll-i, ad-hak-əzələχ ehäre-näk.⟩

³⁰ Unjäy s-ad-has-isəjəd, ilwäy-t, äswäj-j'e däχ-takärmüt i-ad-tät-iha har has-izəl a-wa t-irwäs iket-net.

³¹ Ənhäyän inaxdimän wi iyyädnen dār-ännixdäm a-wa ija amidi-näsän χas, əknän iman-näsän tisanant, əglän, jän isälan n-a-wa ijän iket-net däχ mässä-sän.

³² Issäχr'-e-hi-dd mässä-s, inn'-as: ⟨Käyy ānaxdim n-enälläbäs a tämoosäd! Ajän wädden təlχädäd-ahi χas, oyyeχ-ak-in a-wa käy-ärwäsäχ iket-net.⟩

³³ Adiš, ma hak-igdalän, ad-tadənäd tähanint şund ta hak-ođänäχ i-amidi-näk?⟩

³⁴ Ijjäš-t adkär hullan fäll-akli-net-wen-däχ, issäχrä-dd gärditän-net i-ad-t-in-əjārän däχ-takärmüt, äqqayəm ihannäy däχ-s aχāna har izəl a-wa t-irwäs has-in-oyya ihənnin iket-däχ-net.⟩

³⁵ Innä daχ qarät-a-wen: «Əlmədät a-s şund a-wen-däχ a hawän-mad-äj Abba-nin-i ihän işənnawän, afäl wär tənmənsim jer-iman-nawän s-ulh imdan.»

19

Aməzzi d-iba-net (Marqəs 10:1-12; Luqa 16:18)

¹ Issəmdä Yisa tənna n-isälan-win-däx ças, ifäl teje ta n-Galila, ikkä tidbi ti hin-əllanen i-ejänš wa n-Ÿurdəni däx-teje ta n-Älyähudəyät;

² əlkämän-as-dd äddinät äjjootnen, äzozäy däx-sän wi ärhinnen.

³ Däx-a-wen-däx ad-dd-əbdädän käl-faris iyyäd data-s, orämän-t s-asəstan däx-innä a wärän itətwənn, ənnän-as: «Däx-a-wa innä alämär-nänäx, ak ajän xälal i-ähaləs, ad-izəmməzzəy hənne-s fäl-äsaru, a ämoos-däx?»

⁴ Äwwežäb-asän, inn'-asän: «Adiš kəwəneḍ wär täxrem däx-əlkəttab n-Mässinäx edəgg wa däx-ätwänna a-s:

<S-tizarät a-s dd-ixläk Ämaxlak äddunya, ähaləs d-tamäqt a dd-ixläk.> »

⁵ Inn'-asän daç:

« <Təssəba n-a-wen-däx a fäl mad-ifəl ähaləs ti-s d-ma-s,

asäx d-hənne-s, umasän fäll-əssin-essän, tiyyät taçəssa.

⁶ Ad-äbas ämoosän əssin äddinät, ämoosän tiyyät taçəssa.>

A-wen-däx a fäl, a-wa osäx Mässinäx i-ad-umas iyyän härät, wär t-ibəḍḍəwet ägg-adəm.»

⁷ İnnän-as: «Adiš mafäl ijanna ännäbi Mosa a-s:

<Afäl irha ähaləs azəmməzzəy n-hənne-s, ilzam-t ad-tät-äkf təkərḍe n-aməzzi təzzar, izəmməzzəy-tät?> »

8 Inn'-asän Yisa: «A-wa hawän-innä ännäbi Mosa, inn'-awän-t dāḡ-təssəba n-tāḡart-i jän ul-hawän-nāwän; ənnar wädden a-wen, s-tizarät a-s dd-täxläk äddunya, wädden a-wen a dd-äzzäbbät Mässinäḡ.

9 Ässiilmädäḡ-kāwän a-s ere hin-äzmäzzäyän hänne-s a-s, ija a-wen, wädden tikra a has-təja, oläs adubən n-iyyät, izna.»

10 Eḡḡädän-dd inəṭṭulab-net, ənnän-as: «Šä-mad a-wen-däḡ a ijan, adiš, ufa ḡas, äqqiima äwadəm wäla adubən.»

11 Inn'-asän Yisa: «Wädden äddinät iket-näsän a äddobätnen ujreh n-mäjräd-wa-däḡ, wi ikfa Mässinäḡ turhajät-net ḡas, a t-jarrähnen.

12 Tidət, wädden äddinät iket-näsän a əjrawnen turhajät-ten-däḡ n-ad-äqqaymən wär-ädobänän: iyyäḍ, a-s dd-əwän-däḡ, əjrawän s-a-wen; iyyäḍ, əḡdälän-asän-t imidiwän-näsän-i tän-jänen imudäšan, əkkäsän-tän dāḡ-meddən; iyyäḍ daḡ, unjäyän s-adubən dāḡ-təssəba n-Təmmənəya n-Mässinäḡ.

Ere äddoben ujreh n-mäjräd-wa-däḡ, ijrähett.»

*Ija Yisa älbäraka dāḡ-aratän
(Marqəs 10:13-16; Luqa 18:15-17)*

13 Ämmewäyän-dd ḍarät-a-wen aratän s-Yisa i-ad-tän-isəwär ifassän-net, ittär-asän dāḡ-Mässinäḡ a dāḡ-sän ijän älbäraka; ənhäyän inəṭṭulab äddinät wi tän-dd-äwwäyenen ḡas, äkläwläwän fälla-sän.

14 Ixtäl-tän Үisa, inn'-asän: «Äyyät aratän adhi-dd-өккөн, wär tän-in-täwwexäm fäll-i, fäl-a-s, Төммөнөya n-Mässinäx, äddinät wi dār-sän äñifäqqänen a-s tät-ihakk.»

15 Äswär-tän ifassän-net darät-a-wen, ija däx-sän älbäraka təzzar, ifäl edägg-en.

Äddunya mex äläxärät

(Marqəs 10:17-31; Luqa 18:18-30)

16 Iгла Үisa har šik-däx ähaləs iyyän da-däx t-dd-ikkän, inn'-as: «Äļxalim, ma ämoos emärked wa s-lex s-ad-t-äjäx i-ad-əjrəwäx tämudre ta täxlälät?»

17 Inn'-as Үisa: «Mafäl hi-sastanäd d-emärked s-täddobed iji-net? Milxaw, Mässinäx xas a olağan. Ämāra, kunta tärhed ad-təjrəwäd tämudre täynayät, adiš, mašäl alämārän n-Mässinäx.»

18 Inn'-as ämawaḍ: «Win-š alämārän, ma ämoosän?» Inn'-as Үisa: «Entäneḍ da: Wār jed iman, wār jed əzzəna, wār tokeräd, wār täjjəyhäd s-bahu,

19 səmyär ti-k d-ma-k, tärhed anhāraj-näk s-tārha ta jed i-iman-näk.»

20 Innä ämawaḍ-en i-Үisa: «Äxḍaläx i-a-wen-däx iket-net; ma t-illan ḍax hin-oḍanäx?»

21 Inn'-as Үisa: «Kunta tärhed ad-dd-təmdəwäd s-iba n-älyib dat-Mässinäx, əgləw, tužžär-in ehäre-näk, təkfəd-t i-tiläqqiwen i-ad-təkrəšäd ärrəzäx däx-älžännät; dihen, əqqəl-dd, əlkəm-ahi.»

22 Isl' ämawaḍ i-a-wen-däx xas, ənxäsän iman-net, inkär iglä ed a-wa ila däx-ehäre, tikunen.

Tämudre ta täxlälät d-ärrözäx wa n-tidət

23 Innä Yisa ɖarät-a-wen i-inəttulab-net: «Äsidätteɣ-awän a-s izzəwät ad-ijjəš ere irzaɣän Təmmənəya n-Mässinäx.

24 Ojär täräxse ta ija ad-ijjəš amnəs s-tiɥ n-änazmay uhən, ad-ijjəš ere irzaɣän Təmmənəya n-Mässinäx.»

25 Əslän inəttulab i-a-wen ɣas, əqqänän iɣäfawän-näsän, ənnän-as: «Adiš mi madän-iɣləs?»

26 Ikyäd dəx-sän Yisa, inn'-asän: «A-wen, wär t-äsmäkkänän dəgg-adəm, məšan Mässinäx ənta, äddoobät-t ed wär t-illa a has-indarän.»

27 Iggäd-dd Bətrus, inn'-as: «Näkkänəɖ-i-š-i oyyänen a-wa nəla iket-net nəlkäm-ak, əndek isälan-nänäx, ma s-ilkam ad-t-nəjrəw?»

28 Inn'-asän Yisa: «Äsidätteɣ-awän a-s ašäl wa dd-mad-təzzubbət äddunya-ta täynayät-i dəx-mad-ixkəm Ägg-ägg-adəm dəx-älxurmät-net fäll-härät iket-net, ad-täqqayməm kəwänəɖ-i hi-əlkännen fäll-mərəwät tisəqqima n-təmmənukəla d-sänatät, təšräxäm tiwsaten ti n-mərəwät d-sänatät n-İşrayil.

29 Ere oyyän ihänan-net d-ayətma-s d-šätma-s d-ti-s d-ma-s d-məddana-s d-išəkraš-net dəx-äddimmät-in, ilmədet a-s ad-ijrəw a-wa hin-oyyä ija teməde n-anəɖfus, ijrəw dəx tämudre ta täxlälät.

30 Älwäxla a-s a äjjeen dəx-wi äzzarnen ašäl-i-dəx, ad-ijjəš ajilal, a äjjeen dəx dəx-wi hänen ajilal ašäl-i-dəx, ad-izar.»

20

Isälan n-mässi-s n-ašəkrəš d-inaxdimän-net

¹ Issäxläy-tän Ƴisa tangalt ɗarät-a-wen, inn'-asän: «Təmmənəya n-Mässinäx, täniƒäqqa d-ähäləs ilan ašəkrəš-net; äffäw-t Ƴas, ifäl ehän-net, immäx i-inaxdimän issäxdäm ašəkrəš-net n-läxnäb.

² Änmännäk dār-sän fäll-timzal n-ärriyal n-azrəf i-ašäl təzzar, ässok'-en ašəkrəš-net i-ad-t-əxdəmän.

³ Ij' agdəlset Ƴas, oläs azəjor, ijrāw iyyäd äqqimnen ädiwännen wär-išla häřät, iɗkäl-tän;

⁴ əntäned-ďäx, inn'-asän: «Äglät käwäned-ďäx täxdəmäm dāx-ašəkrəš-in wa n-läxnäb, ad-käwän-äkfäx älxaqq n-tide-näwän»;

⁵ əglän, əxdämän. Təjä tarähut Ƴas, oläs aɗkul n-iiyäd, oläs dāx iji n-a-wen s-tezzar.

⁶ Təglä takkäšt Ƴas, izjār dāx, inhäy iyyäd əbdadnen wär tän-išla häřät, inn'-asän: «Käwäned ma s-təbdadäm ašäl iket-net, wär t-illa a käwän-išlan?»

⁷ Ənnän-as: «Wär t-illa ere hanäx-ikfan əššäxəl.» Inn'-asän: «Äkkät käwäned-ďäx ašəkrəš-in, təxdəmäm dāx-s.»

⁸ Todä täfukt Ƴas, issäxřä-dd mässi-s n-ašəkrəš änazraf-net, inn'-as: «ƒxər-dd in-axdimän, təzləd-asän, sänt s-wi dd-əšräynen har təkkəd wi dd-äzzarnen.»

⁹ Əjrāwän wi dd-osänen šamad təgla takkäšt timzal-näsän; hak iyyän ijraw ärriyal n-azrəf wa ämoosän timzal n-ašäl.

10 Osän-dd ɗarät-a-wen wi dd-äzzarnen s-älxidmät ija ɣur-sän a-s, ad-ajärän inaxdimän-wi dd-əšräynen timzal mäšan, əjrawän əntäneɗ-däɣ ärriyal n-azrəf šund wa əjrawän inaxdimän wi n-tišrayät däɣ-älxidmät.

11 Əjrawän timzal-näsän ɣas, äbjänjänän fäll-mässi-s n-ašəkrəš, ad-has-jannen:

12 <Ajän wädden inaxdimän-wi dd-əšräynen, iyyän n-ässäɣät ɣas a jän əxdamän, a-s ija a-wen näkkäneɗ, ašäl imdan a nəja nəxdam, siknənniwət-anəɣ täfukt. ɣas əndek əmmək wa s-ila a-s ad-där-sän nagdäh timzal?>

13 Innä mässi-s n-ašəkrəš i-iiyän däɣ-sän: <Amidi-nin, wär-əkšəɣ älxaqq-näk, wädden ärriyal n-azrəf a fäll-nənnäfhäm, əkfey-ak-t, ma tärhed daɣ?>

14 Ərməs ehäre-näk, təgləd. Ma däɣ-käy-ikma a-s äsisəgdähäɣ-käy däɣ-azrəf-in käyy-i dd-äzzarän, tajjad däɣ-i erk asəwaɗ, d-wa dd-išräyän?

15 Ajän wädden a-wa ehäre-nin s-äddoobey ad-has-äjəɣ a-wa s-ärheɣ. Ma däɣ-käy-ikma a-s olaxəɣ?> »

16 Innä ɣisa ɗarät-a-wen: «Əlmədät a-s s-əmmək-wen-däɣ a-s äddinät wi hänen ajilal, ad-izarän mäšan, wi äzzarnen, ad-əjjəšan ajilal.»

Əsihe wa s-kərəɗ d-itajj ɣisa isəlan n-tamättant-net d-tanäkra-net

(Marqəs 10:32-34; Luqa 18:31-34)

17 Älwäqq wa d-irmäs ɣisa tamdujt ta n-Yărussalam, ikkäs-dd inəttulab-net s-takše, inn'-asän:

18 «Ἐnhøywät, näkkäneḍ-da-hi äjožäyinen, nökka Yärussälam-i-däx mad-ättärmäs Ägg-ägg-adəm i-ad-ijjəš ifassän n-imänokalän n-käl-tikutawen d-älγulam n-Ättäwrät; ad-t-sidəwən däx-äššärexa-näsän, əxtəsän-as tamättant,

19 əjən-t däx-ifassän n-inəzzulam†-i t-maden-äj tekäškäšt, əjən däx-s tiwit s-ebärtäk, əşləbän-t fäll-tajəttewt i-ad-ämmät mäšan, ašäl wa n-käraḍ ḍarät tamättant-net, ad-dd-inkär jer-inəmmuttan.»

*A-wa təttär ma-s n-dägg-Zäbdi däx-Ḣisa
(Marqəs 10:35-45)*

20 Däx-a-wen-däx, ad-dd-tosa hänne-s n-Zäbdi Ḣisa, ənta d-məddana-s wi n-əssin, tärkäx data-s, tənn'-as tärha a däx-s təttär härät iyyän.

21 Inn'-as Ḣisa: «Ma tärhed?» Tənn'-as: «Ἐssin ilyaḍän wi leex, əntänəḍ da, äj'-ahi ärkäwäl n-a-s ašäl wa dd-mad-täqqələḍ däx-Təmmənəya-näk, ad-säqqayməḍ iyyän daw-aγil-näk, säqqayməḍ wa iyyäḍän daw-täšäljenäk.»

22 Äwwežäb-as Ḣisa, inn'-as: «Käwänəḍ, wär təssenäm a dār-sästanäm. Ajän näkk, kara n-tisnant wa s-ilkam ad-t-äswäx, täddoobem tesäse-net?» Ἐnnän-as dägg-Zäbdi: «Näddoobät-t.»

† 20:19 20:19 — Ḣur-käl-Älyähud, ere wärän ämoos ägg-Älyähud s-aläšäl mex ere wärän ilkem i-äddin-näsän, iket-net, änəzzalim a ämoos. A-wen-däx a fäl tiwsaten ti iyyäḍnen iket-näsnät, ti n-inəzzulam. — Ašäl-i-däx, änəzzalim, äkafär (ere wärän issen s-Mässinäx).

²³ Inn'-asän Yisa: «Tidət lab a-s ad-tənhəyäm älɣizabät šund wa mad-ənhəyāɣ məšan, dəɣ-isālan wi n-taximit daw-aɣil-in d-təšalje-nin, wadden näkk a ihakkän a-wen; Abba-nin a t-ihakkän i-wi s-t-äsmäjnät.»

Mijraw wa n-tidət

²⁴ Eslän inəttulab wi iyyädnen n-māraw i-a-wen ɣas, ijjäš-tän əlhäm fäll-ayətma-win-dəɣ n-əssin.

²⁵ Iyr'-en-dd Yisa iket-näsän s-iman-net, inn'-asän: «Təssanäm a-s imənokalän äxkämän fäll-käl-äkall-näsän s-əššahät; käl-əlxəkum dəɣ, wär lämmedän fäll-käl-äkall

²⁶ məšan, kəwəwəd, wär jem a-wen; wa dəɣ-wän irhän mijraw, umaset ənaxdim i-imidiwän-net,

²⁷ ere dəɣ-wän irhän təzert, umaset akli n-imidiwän-net təzzar,

²⁸ s-əmmək wa s-Ägg-ägg-adəm, wär dd-əmesäl s-əddunya i-ad-has-əxdəmən äddinät, əmešäl-dd sār-s i-ad-ixdəm ənta iman-net, äkf iman-net, ämmät i-ad-isəddärfət äddinät äjjootnen dəɣ-ibəkkaḏän-näsän.»

Iməddorɣal wi n-əssin əzozäy Yisa (Marqəs 10:46-52; Luqa 18:35-43)

²⁹ A-s dd-izjār Yisa d-inəttulab-net taxrəmt ta n-Žərriko, təlkäm-as tamətte təjjeet.

³⁰ Iгла har a əndərrän, əssin iməddorɣal da-dəɣ, äqqiimän dəɣ-asālim n-zäbo wa dd-ija. Eslän a-s Yisa a okayän ɣas, ad-saɣären, jannen: «Ya Ägg-Dawəd, aḏən-anəɣ təhanint!»

³¹ Ƴattäl-tän tamøtte i-ad-hin-susømän mäšan, äšyären dāḡ-išønnawän: «Ya Älyalim, Ägg-Dawød, aḍøn-anäḡ tähanint!»

³² Isl'-asän Ƴisa, ibdäd, iḡr'-en-dd, inn'-asän: «Ma s-tärham ad-hawän-t-äjäḡ?»

³³ Ænnän-as: «Älyalim, arr tiṭṭawen-nänäḡ i-ad-nønhøy.»

³⁴ Täny'-e tähanint-näsän, idäs tiṭṭawen-näsän, ämeränät ässaḡät-wen-däḡ, oläsän ahänay; ølkämän-as ḍarät-a-wen.

21

Uješ n-Ƴisa i-aḡrø m wa n-Yärußsälam

(Marqøß 11:1-11; Luqa 19:28-40; Exya 12:12-19)

¹ Ohäz-in Ƴisa d-inøṭṭulab-net Yärußsälam, iha ämära taḡrømt ta n-Bätfaži, edes i-taḍayt ta täsijätät ihøßkan wi n-øzzäytun, äßmaßäl øssin dāḡ-inøṭṭulab-net,

² inn'-asän: «Äkkät tadäbayt ta n-data-wän, tøjjaßäm-tät ḡas, ad-däḡ-s tøjrwäm teßeḍt tøkrafät s-t-illa äza-net edes-has; arät-tät-dd, tølweyäm-ahi-tät-dd ønta d-äza.

³ Ere hawän-innän härät, ännät-as: «Älyalim a dāḡ-sän ilan øßsäḡøl,» afäl has-tønnäm a-wen, ad-hawän-dd-äyy teßeḍt hakd d-äza-net.»

⁴ Ämoøß a-wen a ässiitbätän a-wa innä ännäbi n-Mäßinäḡ a-s innä:

⁵ «Ännät i-käl-Yärußsälam: Ænhøywät, ikk'-iwän-in ämänokal-näwän, ikk'-iwän-in s-ømmøk wärän inbej tiṭṭ, eßeḍ ḡas a inay

ara n-teşeđt ƣas a inay.»

⁶ Eǵlän inəŧŧulab, jän a-wa hasän-inna Ƴisa;

⁷ wätän-as-dd teşeđt d-äza-net, əstäjän-asän isəlsa-näsän təzzar, inäy Ƴisa äza.

⁸ Ad-fattäƣ ya tamətte iket-net, isəlsa fäll-tabarät-ta ija, nakkädän-dd iyyäđ ileđleđän dăƣ-ihəşkan, säs'n-en-tän dăƣ-zäbo-wa ija i-asəmyar-net.

⁹ Täseƣarät tamətte-ta has-täzzarät hakd ta has-təlkämät, janna:

«Ozana!

Näkfet Mässinäƣ semƣar

dăƣ-təssəba n-Ägg-Dawəd,

Ija Mässinäƣ älbāraka dăƣ-wa dd-osän dăƣ-isəm
n-Emäli,

Imƣaret isəm n-Emäli dăƣ-işənnawän iket-dăƣ-
näsän!»

¹⁰ Ijjäş-dd Ƴisa Ƴärussälam ƣas, ämramär aƣrəm iket-dăƣ-net, hak äwadəm-dăƣ, ibdad, ijanna i-amidi-net: «Ma ämoos äwadəm-wa hanäƣ-dd-ijjäsän?»

¹¹ Ad-janna tamətte ta təlkämät i-Ƴisa: «A-wa Ƴisa, ännäbi wa dd-ifälän Näşirät ta n-Galila.»

Işşəşdäj Ƴisa ehän n-ämudd wa mäqqärän

(Marqəs 11:15-19; Luqa 19:45-48; Exya 2:13-

22)

¹² Ijjäş Ƴisa darät-a-wen ehän n-ämudd wa mäqqärän ihän Ƴärussälam, ad-dăƣ-s isattäƣ ättužžar d-imäžänšan-näsän, äsbäräƣwäl tisəskar ti n-käl-amähaş n-izärfan, ijjar-in tisəqqima n-ättužžar n-tidäberen,

¹³ isattäƣ-tän, ijann'-asän: «Wädden iktab a-s, innä Mässinäƣ:

⟨Ehän-in, ad-umas ehän n-tittar⟩;
mäšan kăwāneḏ jām-t, tasəssihärt n-
imäkräḏän.⟩

¹⁴ Iha Ƴisa ehän n-ämudd-en-däḡ a-s t-dd-osän
iməddoryal d-inəbdan, äzozäy-tän.

¹⁵ Eggädän aratan hanen ehän n-ämudd-en-
däḡ, ad-saḡären, jannen:

«Ozana!

Näkfet Mässinäḡ semḡar däḡ-təssəba n-Ägg-
Dawəd!»

Ənhäyän imänokalän n-käl-tikutawen d-
älḡulam n-Äṭṭäwrät tikunen-ti s-iket tänät-ija,
əslän i-a-wa jannen aratan ḡas, ijjäš-tän älhäm
fäll-Ƴisa.

¹⁶ Eggädän-dd sär-s, ənnän-as: «Ajän käyy, wär
selləḏ i-a-wa jannen aratan-wi-däḡ?» Inn'-asän
Ƴisa: «Salläḡ-asän.» Oläs, inn'-asän: «Ajän wär
täḡrem a-wa innä Mässinäḡ däḡ-əlkəttab-net, a-s
innä:

⟨Imawän n-aratan d-imärkäsän
ad-dd-zajjār təmmal i-Mässinäḡ.⟩ »

¹⁷ Ifäl Ƴisa edägg-en ḡas, odwa tadəbayt ta n-
Bitanya.

Ahəšk wa ilyän Ƴisa
(*Marqəs 11:12-14, 20-26*)

¹⁸ Äffäw, iqqäl Ƴisa Ƴärussälam däḡ-a-s älluz.

¹⁹ Däḡ-tekle-net, inhäy ahəšk n-ašar iḡtan däḡ-
asälim n-zäbo, ikk'-e-hi-dd mäšan, wär fälla-s
ijrew ar ifärketän, wär t-hen aratan. Imməjräd
i-ahəšk, inn'-as: «Ija Mässinäḡ a-s wär-ilkem ad-
torawäd!» Äqqur-in ahəšk-en s-iiyyät älwäqq-
wen-däḡ.

20 Ænhäyän inøttulab a-wen ƣas, äqqänän iƣäfawän-näsän ad-jannen: «Ændek ømmøk wa s-hin-äqqur ašar wa-däƣ s-iyyät?»

21 Inn'-asän Ƴisa: «Äsidätteƣ-awän a-s afäl itbat immun-näwän, wär t-illa äššäk t-ihan, ad-tudabem iji n-a-wa jex i-ašar-wa-däƣ, tøglem fäw har afäl tønnäm i-ađax wa-däƣ: <Tälbäy-dd däƣ-edägg wa hed, täƣtød däƣ-ejärew wa səmmän dihen>, ad-äj a-wa tønnäm.

22 A däƣ-däläm Mässinäƣ s-ulh omanän-däƣ, ad-hawän-t-äkf.»

Mäjräd wa ija Ƴisa d-imänokalän n-käl-tikutawen däƣ-ehän n-ämudd

(Marqøš 11:27-33; Luqa 20:1-8)

23 Ijjäš Ƴisa ehän n-ämudd wa mäqqärän, isaxra tamøtte dihen a-s t-dd osän imänokalän n-käl-tikutawen d-inušämän n-Išrayil, ønnän-as: «Mi käy-ikfän turhajät n-amišøl n-tikunenti-däƣ? Mi käy-ikfän tärna-ta-däƣ s-täjjäd a-wa täjjäd?»

24 Äwwežäb-asän Ƴisa, inn'-asän: «Ad-hawän-äjäƣ näkk-däƣ asøstan iyyän, afäl hi-täwwežäbäm, ad-hawän-älläƣex näkk-däƣ ere wa hi-ikfän turhajät ta s-tamašäläƣ a-wa täjjäƣ.»

25 Inn'-asän: «Mi dd-äšmašälän Exya wa n-Enøsselmäƣ i-ad-isølmäƣ äddinät däƣ-aman? Ak Mässinäƣ a t-dd-äšmašälän meƣ dägg-adøm ƣas?» Inn'-asän a-wen ƣas, øqqälän-dd, ämmiizäƣän jer-iman-näsän, jannen: «Afäl has-nønna: <Mässinäƣ a t-dd-äšmašälän>, ad-hanäƣ-änn: <Adiš, mafäl wär tomenäm s-a-wa hawän-innä.>

²⁶ Afäl has-nønna daḡ dāgg-adəmə ḡas a t-dd-āšmašlən, ad-fälla-nāḡ tiḡəw tamətṭe-ta-dāḡ ed təkkaḡ ikeṭ-net āššāk a-s Exya ānnābi n-Māssināḡ a āmoos.»

²⁷ Ǝqqālän-t-dd, ənnän-as: «Wär nəssen.» Inn'-asän ḡisa: «Adiš nākk-dāḡ, wär hawän-e-ällāḡeḡ ere wa hi-ikfän tārna ta s-tājjāḡ a-wa tājjāḡ.»

Aratän wi n-əssin

²⁸ Innä ḡisa ḡarät-a-wen i-āddinät wi has-āsiḡādnen: «Ma tənnäm dāḡ-tanfust-ta-dāḡ? Ätwānna, kälä t-illa āhaləs ilan əssin aratän. Ašäl iyyän, iḡrā-dd dāḡ-sän wa iššämän, inn'-as: <Alyad-in, ašäl-i, äkk ašəkrəš wa n-lāḡnāb, tāxdəmän dāḡ-s.>

²⁹ Inn'-as rure-s, wär-igla māšan, a əndərrän ḡarät-a-wen, ämmujrāz, ikk' ašəkrəš, ixdäm dāḡ-s.

³⁰ Iḡrā-dd daḡ wa s-əssin, inn'-as a ənnin-dāḡ innä i-wa äzzarän. Inn'-as rure-s, igla māšan, a-s dd-təšräy tanfust, wär-igla.

³¹ Ämära, əndek dāḡ-sän wa ämešälän erhet n-abba-net?» Ǝnnän-as äddinät: «Un, wa äzzarän.» Inn'-asän ḡisa: «Äsidätteḡ-awän a-s kāwāneḡ-i hannāyāḡ, ad-hawän-izarän käl-tiwse d-tälkäxbaten uješ n-Təmmənəya n-Māssināḡ.

³² Exya, a-s kāwän-dd-osa, issəkn'-iwän tabarät ta n-iqqud māšan, tunjäyäm tomänäm s-a-wa hawän-innä, a-s ija a-wen käl-tiwse

d-tälkäxbaten, omännän sär-s; täjjihäm i-a-wen-däḡ iket-net mäšan, wär tätubäm, tamөнәм s-a-wa hawän-innä.»

Inaxdimän wi n-inälläbäsän
(Marqəs 12:1-12; Luqa 20:9-19)

³³ Issäḡläy Үisa tamөtte tangalt tiyyät däḡ-innä: «Säjdät! Käla t-illa ähaləs ilan təfärre-net, ij'-as afəraj, ija däḡ-s ašəkrəš n-läḡnəb, ija daḡ däḡ-ašrut-net iyyän, edəgg wa däḡ-iḡimməw läḡnəb, iday däḡ-s edəgg n-soro i-ämagaz-net; ifär-t ɖarät-a-wen i-inəsduma iyyäɖ təzzar, ikk' äkall iyyän.

³⁴ Täwwäɖ-dd täqqän n-amili n-ašəkrəš ḡas, äšmašäl-dd s-inəsduma inaxdimän-net, i-ad-has-dd-awəyän folät-net däḡ-a-wa dd-oräw ašəkrəš;

³⁵ mäšan, änaxdim sär-sän dd-äšmašäl-däḡ, ad-t-ärməsän, ad-tithəkken meḡ jän iman-net meḡ t-əkfän sämmäjori n-tihun.

³⁶ Oläs-dd daḡ ašəmmišəl n-inaxdimän iyyäɖ sär-sän, issəlkäm-asän-dd daḡ i-äjjootnen ojärnen wi sär-sän äšmašäl s-tizarät; jän-asän a өnnin-däḡ jän i-wi hasän-dd-äzzarnen.

³⁷ A-s təšräy tanfust, rure-s iman-net a sär-sän dd-äšmašäl ed, inna däḡ-iman-net: <Ənta ya i n-rure-ḡ, änihäjja s-ad-t-səmyärän.>

³⁸ Mäšan, өnhäyän inəsduma rure-s wa dd-imalän ḡas, änmännän jer-iman-näsän: <Ənhəywät-ak, amäkkasu-net; əyyäwät, näjet iman-net i-ad-hanäḡ-dd-täqqəl tākasit-net.>

³⁹ Osä-dd ḡas, өrmäsän-t, əzjärän dār-s ašəkrəš, äḡän-t kərəf.»

⁴⁰ Inn'-asän Үisa: «Ma tordam, wi-däx in-axdimän, ma hasän-mad-äj mässi-s n-ašəkrəš afäl tän-dd-osa, ənta iman-net?»

⁴¹ Ənnän-as äddinät: «Adiš, afäl dd-osa iməkkərukaḍ-wi-däx, wär hasän-e-aḍən tähanint, ad-tän-ilhəs iket-däx-näsän, aləs tefert n-ašəkrəš-net i-iyyəḍ t-e-əkfənen folät-net afäl dd-äwwäḍ äzzäman wa n-amili n-ašəkrəš.»

⁴² Inn'-asän Үisa: «Adiš kəwəneḍ, kəla wär täxrem edəgg wa innän däx-əlkəttab n-Mässinäx a-s:

‹Tähunt ta hin-järän əlbännatän s-ənnän wär tənfa härät,

ənta a-s a-s təšräy tanfust,

təmoos tähunt ta tufät n-aχməär hakkät əššahät ehän;

a-wen iket-net Mässinäx ad-t-ijän i-ad-umas

təqqän n-eχäf dat-tiṭṭawen-nänäx.› »

⁴³ Inn'-asän Үisa: «Janneχ-awän əməra a-s däx-təssəba n-a-wen-däx a fäl, Təmmənəya n-Mässinäx, ad-däx-wän tättərməs, tət-wəkf i-tamətte tiyyät madät-təmašäl a-wa hasän-tənnä däx-erhet n-Mässinäx.» [

⁴⁴ Tähunt-ta-hi, ere fälla-s oḍän, ad-ərrəzrəz; ere fäll-toḍa daχ, ad-t-təlkəz.]

⁴⁵ Əslän imənokalän n-käl-tikutawen d-käl-faris i-tangalen-tin-däx tän-issäxläy Үisa χas, əlmädän a-s əntäneḍ-en-däx a-s iha ti-näsän.

⁴⁶ Əttärän ad-t-ərməsän məšan, əksuḍän tamətte ed, təkkas əššək a-s Үisa, ənnäbi a-əmoos.

22

*Isälan n-amäjaru wa mäqqārān
(Luqa 14:15-24)*

¹ Issäxläy Yisa day tamøtte tangalen dāx-isälan n-Tømmønøya n-Mässināx, innā:

² «Tømmønøya ta n-Mässināx, äddoobät äwadəm ad-tät-isənnəfāqq d-tanfust n-ämānokāl isidubunān rure-s. Ašāl wa d-itājj a-wen, äsmājarāt-dd äddināt äjjootnen s-ehān-net.

³ Ämmujnāt-dd hārät iket-net xas, äšmašäl inaxdimān-net s-äddināt wi dd-iyra s-azli ašäl-wen-dāx; māšan, unjäyān iket-dāx-nāsān s-ad-dd-asən.

⁴ Oläs sār-sān ašəmmišəl n-eklan sāl winnin-dāx äzzarnen, inn'-asān: <Äglät, ännāt i-äddināt: täwwäxām-ahi, imənsiwān, ämmujnen, əssānxāx-awān a-wa iddären iket-net jer-wa n-iwan hakd wa n-taxsiwen; əyyāwät šik, kāwāneḍ xas a-s iqqal azli ämära.>

⁵ Wār jen texäre ta tān-dd-ija hārät, iglä hak iyyān dāx-əššaxəl-net: wa ikkān ašəkrəš-net, wa ikkān mamāla-net;

⁶ əggādān-dd iyyāḍ fāw, ərmāsān hārät dāx-inaxdimān wi dd-äšmašäl ämānokāl, äsmāḍrāyān iyyāḍ, jān iman n-iyyāḍ.

⁷ Ejjāšān isälan ämānokāl xas, ijjäš-t älhām, iyra-dd ejhān n-əssārdusa-net, issəgl'-en i-ad-əlhəsān imājjan n-iman-win-dāx, səntəsān aḡrəm-nāsān.

⁸ Innā ḍarāt-a-wen i-inaxdimān-net iyyāḍ: <Imənsiwān wi n-azli, əskārān-dd, māšan

äddinät wi dd-äsmäjareχ sār-sän, wär där-sän
änhäjjän,

⁹ äglät ämära, ilalät tišarriten n-aχrəm ti dāχ-
tažämmayän äddinät, ere där-tämmoqqäsäm-
dāχ, səmməjurum-t-dd s-ehän-in.>

¹⁰ Ällilän inaxdimän tišarriten iket-dāχ-
näsnät, äsdāwän-dd a-wa əjrāwän dāχ-äddinät
iket-net jer-wi n-erk äddinät hakd-dāχ wi n-
iməssorha, idnäy ehän tamətte.

¹¹ Ijjäš-dd ämänokal fäll-tamətte i-ad-tät-
isəbbärrək. Äzjazza tamətte, ijräh-in a-s ih'-et
ähaləs wärän ija isəlsa wi s-änihäjjä s-ad-tän-äj
ere ihan azli, wär-ässahäχ ašäl.

¹² Issäχr'-e-hi-dd, inn'-as: <Mändam! Əndek
əmmək wa s-dd-təjjäšäd edägg-wa-dāχ a-s wär
tässahäχäd ašäl?> Wär t-illa a has-inna ähaləs-
en.

¹³ Inna ämänokal i-inaxdimän-net iyyäd:
<Ärməsät-t, təkredäm idarän-net hakd ifassän-
net, təjrəm-t-in dāχ-tihay ti n-ajäma i-ad-ihall,
iziməkärkiχ isenän fäl tämujriχt.>

¹⁴ Tidət, ätwäχrän-dd äddinät äjjootnen
mäšan, wär əjjətän wi ənnəfrännen.»

*Isälän n-tiwse i-ämänokal Qäyşär
(Marqəs 12:13-17; Luqa 20:20-26)*

¹⁵ Änmäkkäsän käl-faris s-takše darät-a-wen,
ad-tattärän əmmək s-äswännän Yisa a wärän
itətwənn i-ad-t-səttärməsän.

¹⁶ Äšmašälän-dd sār-s härät dāχ-inəttulab-
näšän äddewnen d-iyyäd la taggayt ta n-
käl-Harudəs; osän-t-dd, ənnän-as: «Älχalim,
nəssan a-s tidət χas a janned, wär säχrid ar

tabarät ta n-tuksəda n-Mässinəx, wär täkkuläd d-a-wa jannen äddinät, wär tän-təzməzləyäd;

¹⁷ ämära, läxät-anəx, dəx-a-wa hannäyäd: ak iwar-anəx ad-nəzəl tiwse i-ämänokal wa mäqqārən Qäyşär mey?»

¹⁸ İlmäd Yisa xur-iman-net erk ənniyät n-asəstan wa t-jän xas, inn'-asän: «Älmunafəxän yaden! Mafäl hi-tizərrubum?»

¹⁹ Inn'-asän çarät-a-wen: «Säknät-ahi-dd ärriyal n-azrəf wa s-təzzaläm tiwse», əkfän-as-t-dd.

²⁰ Inn'-asän: «Mi län ättaşwer d-isəm wa tiwārən?»

²¹ İnnän-as: «I n-ämänokal Qäyşär.» Inn'-asän: «Adiš, suxələt i-ämänokal wa mäqqārən a-wa fälla-wän ila, təkfəm dəx Mässinəx a-wa fälla-wän ila.»

²² İqqän älwižab-wen-dəx tän-ikfa ixfawän n-äddinät. Fälän Yisa çarät-a-wen, əglän.

Äwwežəb Yisa dəx-isəlan n-tanəkra jer-inəmmuttan

(Marqəs 12:18-27; Luqa 20:27-40)

²³ Aşäl-wen-dəx iman-net ad-dd-əbdädän data-s äddinät la taggayt ta n-käl-sadus-i jannänen a-s wär təlkem tanəkra jer-inəmmuttan, afäl äba äwadəm, əmdän isəlan-net; əssəstänən-t,

²⁴ ənnän-as: «Älxalim, inn'-anəx ännäbi Mosa: «Afäl ädobän ähaləs, äba-t wär-oher ara d-hänne-s, idubənet-tät äŋŋa-s i-ad-ikrəş əzzurəyät i-äŋŋa-s wa äba, i-ad-wär hin-itiləm isəm n-wa äba fäll-ärori n-äkall.»

²⁵ Ämära, əkkəs-anəx dəx-täqqän n-eşäf. Kälə hanəx-hän əssa ayətma; ädobän dəx-sän wa

n-amäqqar, äba-t wär ikreš ara. Täqqimä-dd hänner-s i-äñña-s wa has-ilkämän

²⁶ mäšan, äba-t ənta-däx wär-oherän ara, täqqimä-dd i-wa s-käraḍ ɗarät-a-wen; təgla tan-fust s-əmmək-wen-däx har wa n-əssa.

²⁷ ɗarät iba-näsän iket-näsän, äba tamäḍt ənta-däx.

²⁸ Nässistän-käy: ašäl wa n-tanäkra jer-inəmmuttan, əndek däx-əssa ayətma-win-däx wa s-mad-tumas hänner-s ed, ənhayän-tät adubən iket-näsän?»

²⁹ Inn'-asän Ƴisa: «Tidət-däx a-s käwänəd toškam ed a-wa ənnän əlkəttabän hakd-däx a-wa ɗar-togdäh tärna n-Mässinäx, wär t-illa a däx-s təfhamäm.

³⁰ Ašäl wa ilkämän, meddən hakd tidəden, ad-äbas tidubunän ed ad-taläh tämudre-näsän d-ta n-änjalosän wi hänen išənnawän.

³¹ Ämära, däx-isälan wi n-tanäkra n-inəmmuttan, ajän wär täxrem a-wa hawän-inna Mässinäx, a-s innä:

³² <Näkk a-s Mässinäx n-Ibrahim d-Isxaqq d-Yaqub>? A-wen, älmäxna-net a-s äddinät-win-däx, han älžännät, tiimələn Mässinäx; ənnär wär-ədderän, wär təjjən a-wen. Mässinäx, wädden inəmmuttan a-s ämoos Mässinäx, ämoos-t i-wi əddärnen.»

³³ Ijräz a-wen-däx issäyra Ƴisa i-tamətte ta has-täsijädät.

Alämär wa ufän

(Marqəs 12:28-34; Luqa 10:25-28)

34 Ʒslän käl-faris i-əmmək wa s-ässodāf Ʒisa käl-sadus imawän-näsän ɣas, əžžəmmäɣän-dd əntāneḍ-däɣ sār-s.

35 Iggād-dd iyyän däɣ-sän n-älɣalim n-Ättāwrät, ija i-Ʒisa asəstan däɣ-otas irrum-net.

36 Inn'-as: «Älɣalim, ma ämoos ɣur-Mässinäɣ alämär wa ojärän?»

37 Inn'-as Ʒisa: «Alämär wa ojärän da:
 <Ad-tärhəd Emäli-näk Mässinäɣ s-ulh-näk imda,
 tärhəd-t s-iman-näk əmdan,
 tärhəd-t s-tayətte-näk iket-net.>

38 Ʒnta-den-däɣ alämär wa äzzarän däɣ-alämärän, ənta daɣ a ojärän däɣ-alämärän.

39 Ill'-ee daɣ wa s-əssin wärän dār-s izley:
 <Ad-tärhəd ənhäraj-näk s-əmmək wa s-tärhed
 iman-näk.>

40 Alämärän-win-däɣ n-əssin a ittafän a-wa innä alämär n-Mässinäɣ d-a-wa ənnän ännäbitän iket-net.>

*Ʒisa Älmasex, ojär tumast n-ahäya n-Dawəd
 (Marqəs 12:35-37; Luqa 20:41-44)*

41 Inhäy Ʒisa ažəmmäɣ wa fälla-s dd-jän käl-faris ɣas, issəstän-tän, inn'-asän:

42 «Ak ma tordam, Älmasex, mi iqqal? Mi s-ämoos Rure-s?» Ʒnnän-as: «Dawəd.»

43 Inn'-asän Ʒisa: «Kunta Älmasex rure-s n-Dawəd, adiš, mafäl has-ijanna Dawəd s-mäjräd ija Unfas Šäddijän däɣ-emm-net: <Emäli?»

44 Dawəd en-däɣ a imməjrädän s-tärna n-Unfas Šäddijän, innä:
 <Inna Emäli Mässinäɣ i-Emäli-nin:
 Ʒyyäw, ɣayəm daw-aɣil-in

har äjəx išənja-nək daw-iḍarən-nək.›

⁴⁵ Ƴas kunta Dawəd iman-net iḡarr Älmasex s-isəm ‹Emäli›, əndek əmmək wa s-äddoobät ad-umas rure-s?›

⁴⁶ Wār tən-ijješ ere t-ikfan älwižab n-asəstan-wen-dəx hasən-ija; ijrəw dəx-sən älɣafyät ɣur-ašäl-wen-dəx, äbas t-illa-i dəx-sən ihälän asəstan-net ḍarät-a-wen.

23

Issədläm Ƴisa älɣulam n-Ätṭəwrät d-käl-faris (Marqəs 12:38-39; Luqa 11:43, 46; 20:45-46)

¹ İdkäl Ƴisa məjrad ḍarät-a-wen, imməjrad i-tamətte d-inəttulab-net, innä:

² «Älɣulam n-Ätṭəwrät d-käl-faris a iwar ättäfässir n-Ätṭəwrät ta n-Mosa i-äddinät.

³ Tamašalät a-wa hawän-jännən iket-net, məšan, he kəwəned, wār tətṭəläläm ijitän-näsən fäl-a-s a-wa jännən, wār-oher härät d-a-wa tajjän.

⁴ Tajjän färəḍän n-Mässinäx əzuk sawarən izerhan n-äddinät, šahəššälän-tän amišəl-näsən, a-s ija a-wen, wār tən-iha ad-hasən-ilalän s-aggay-näsən wəla-dəx s-emm n-assəkäd.

⁵ A-wa tamašalän iket-net, i n-təssəba ɣas n-ad-tän-in-əjrahän äddinät, šalläjän ikətban ojärnen wi n-äddinät, tajjän isəlsa əhobätnen,

⁶ ärhan taɣimit dəx-idəgğan wi ännufläynen dəx-imjora d-ihənan n-äddin wi n-käl-Älyähud,

⁷ ijraz-asən ad-hasən-tajjän äddinät isofan dəx-tišərriten, titwəxrin s-isəm: ‹Älɣalim, älɣalim!›

8 Kăwăned, wăr jem a-wen, wăr tărđem titwăxrim s-isəm: <Ălɣalim> ed Ălɣalim-năwăn, iyyăn ɣas, kăwăned, ayətmatăn a tămoosăm.

9 Wăr tăxrem äwadəm wăl' iyyăn s-isəm <Abba> ed Abba iyyăn ɣas a lam, a t-ămoosăn, Abba-năwăn wa ihăn isənnawăn.

10 Wăr tărđem ɣarrăn-kăwăn äddinăt s-isəm: <Ămănokal>, ed wăr lem ar iyyăn n-Ămănokal, a t-ămoosăn: Ălmasesx.

11 Wa ojărăn dăɣ-wăn, umaset akli n-imidiwăn-net.

12 Ere idkălăn iman-net-dăɣ, ad-irəs măšan, wa äsrăsăn iman-net, ad-t-idkəl Măssinăɣ.»

*Iməskay kăl-faris d-ălyulam n-Ăttăwrăt
(Marqəs 12:40; Luqa 11:39-42, 44, 47-51;
20:47)*

13 «Iməskay kăwăned-i n-ălyulam n-Ăttăwrăt d-kăl-faris, älmunafexăn yaden! Ənhəywăt ɣas, kăwăned a ititəbbun Təmmənəya n-Măssinăɣ i-äddinăt; älwăxla, a-s wăr tăt-təjjəšäm, äddinăt dəɣ wi ärhanen ujəš-net, gaddälăm-asăn s-a-wen.

[

14 Iməskay kăwăned-i n-ălyulam n-Ăttăwrăt d-kăl-faris, älmunafexăn yaden! Kăwăned a itihăxăn a-wa ihăn ifassăn n-tinuđafen, tajjäm imaddăn šəjrootnen i-ad-kăwăn-in-əjrahăn äddinăt, ilkam dăɣ-wăn äššäreɣa səmmăn.]

15 Iməskay kăwăned-i n-ălyulam n-Ăttăwrăt d-kăl-faris, älmunafexăn yaden! Wăr t-illa edəgg wăr tökkəm fäll-əkall wăla fäll-aman i-ad-dăɣ-s

dd-tøjrewäm äwadəm iyyän ɣas jəm dəɣ-äddin-nāwän mäšan, igdäh-as ɣas ad-hawän-ilkəm i-ad-t-səmmuttöyäm, umas, u-žohännäma s-tojār ämära tälläbäst ta ija ta jəm s-össin ihändäggan.

¹⁶ Iməskay kăwäned-i n-imalwayän dărɣalnen. Jannem: afäl ihäd äwadəm s-ehän n-ämudd wa mäqqārän, wār t-iwer ärkäwäl n-tahude-net mäšan, afäl ihäd s-oräɣ wa t-ihän, iwar-t ärkäwäl n-tahude ta ija.

¹⁷ Tidət-däɣ a-s irmas-kăwän iba n-tayette, dărɣaläm. Ajän, ehän n-ämudd wa mäqqārän, ma izlay d-oräɣ wa t-ihän? Wädden təšədje-ta-däɣ ija ehän n-ämudd, a dd-toräwät ɵlləllu wa ija oräɣ wa t-ihän?

¹⁸ Jannem daɣ: ere ihädän s-isəm n-edägg wa n-tikutawen, wār t-iwer ärkäwäl n-tahude-net mäšan, afäl ihäd s-takute-ta tənsät fäll-edägg-en, iwär-t ärkäwäl n-tahude ta ija.

¹⁹ Iməddorɣal yaden! Ajän wädden tihusay n-edägg wa n-tikutawen a äshäskən takute ta fälla-s isänsa äwadəm.

²⁰ Tidət a-s ere wa ihädän s-isəm n-edägg wa n-tikutawen, ihäd daɣ s-a-wa fälla-s insän iket-net,

²¹ wa ihädän daɣ s-ehän n-ämudd wa mäqqārän, adiš, Mässinäɣ-i n-Mässi-s n-ehän-en a ihäd.

²² Wa ihädän s-išənnawän, wädden tasäqqimit ta fäll-äminakäl Mässinäɣ a-s ihäd, Mässinäɣ iman-net a ihäd.

²³ Iməskay kăwäned-i n-älɣulam n-Ättäwrät d-käl-faris, älmunafəɣän yaden! Hakkäm s-iqqud a-wa ämoosän tämukäst-nāwän dəɣ-wäla

ənnəxnaχ d-ākamən d-tiyəššawen-ti iyyādnen māšan, tāsīsändārām dāχ-amišəl n-a-wa ifrād alāmār dāχ-isālan n-älχādalāt n-ulh, d-tāhanint, d-immun s-Mässināχ; härätān-win-dāχ a-s ānihājja a-s təssəntām sār-sān, səlkəmām-asān amišəl n-wi iyyādnen olāχnen.

²⁴ Imalwayān dārχalnen a tāmoošām, šānšašām a-wa sāssām i-ad-wār dāχ-s dd-itaximəy wāla ešš iyyān χas uhən-dāχ, a-wa hin-sitrəjjim dāχ-tisatten-nāwān, ogdāh d-amnəs təmyāre.

²⁵ Iməskay kāwāneḍ-i n-älχulam n-Ättāwrāt d-kāl-faris, älmunafəχān yaden! Kannām ašəšdaj n-afälla n-karatān d-ikassān-nāwān, a-s ija a-wen, ammas n-ulhawān-nāwān, ixla; šašdajām tiχəswen-nāwān, a-s ija a-wen, ammas n-ulhawān-nāwān, wār-iḍney ar tikra d-əwwəli.

²⁶ Ya kāl-faris-i n-iməddorχal, sirədāt ammas n-karatān d-ikassān-nāwān i-ad-išdajān təzzar, ad-saradām afälla-nāsān.

²⁷ Iməskay kāwāneḍ-i n-älχulam n-Ättāwrāt d-kāl-faris, älmunafəχān yaden! Tolāhām χas d-tiχəska wəššarnen s-āshāskāt əwadəm afälla-nāsnāt, a-s ija a-wen, ammas-nāsnāt, wār t-ihā ar iχāsan n-māχsoy d-märkähaw isamāḍasān.

²⁸ Ənta-den-dāχ a-wa dār-toolāhām; saknem äddināt älmāt a-s tāχdalām, a-s ija a-wen, ammas n-ulhawān-nāwān, wār-iḍney ar təlmənufāya d-tāxərme.

²⁹ Iməskay kāwāneḍ-i n-älχulam n-Ättāwrāt d-kāl-faris, älmunafəχān yaden! Kāwāneḍ a salmadnen äddināt s-idāggan wi dāχ-əzkān

ännäbitän, sahaskem izəkwan wi n-imaydalän wi n-ibda äba;

³⁰ isl'iwän a-wen-däx mäšan, jannem: <Ennär nəzzaḡ dəḡ-äzzäman n-abbatän-nänäḡ, wär dār-sän nətumas imäjjan n-iman n-ännäbitän-wi s-əssänyälän ašni-näsän.>

³¹ Jannen a-wen-däx uhən-däx wär hintəjrehäm a-s asətbat ḡas a tājām n-a-s, tämoosäm ihäyawän n-abbatän-näwän-wi janen iman n-ännäbitän.

³² A-wa əssəntän abbatän-näwän ḡas a hinsamdem.

³³ Taššälen a tämoosäm, wär təzleyäm d-tanäḡwät. Läḡätät-ahi ḡas əndek əmmək wa smad-täḡləsäm dəḡ-žohännäma?

³⁴ Däḡ-təssəba n-a-wen-däx a fäl sār-wän-in-äšimäšäläḡ hārät dəḡ-ännäbitän d-iməssorha d-älḡulam n-Ättäwrät; ad-təjəm iman n-iyyəḡ, təşləbäm iyyäḡ, təjəm tiwit s-ibärtäkän dəḡ-iyyəḡ dəḡ-ihānan n-äddin-näwän, təqquzzəbum iyyäḡ s-aḡrəm-aḡrəm

³⁵ i-ad-däḡ-wän əḡmənän iman n-e d t-illäm ämaydal s-jam iman-net bännan fäll-ārori n-äkall-i-däḡ, ḡur-ašni n-Xäbälla wa n-ämaydal äba hundäḡ har ašni n-Zäkärya wa n-ägg Bäräyka-i s-ätwäjjan iman-net jer-edägg wa šäddijän ihän ehän n-ämudd wa mäqqārän d-edägg wa dəḡ-raqqänät tikutawen.

³⁶ Äsidätteḡ-awän a-s äddinät-win-däḡ äba, əḡmanän iman-näsän dəḡ-käl-əzzurəyät-tadäḡ.»

*Tahäla n-Ḳisa fäll-Yäruşsälam
(Luqa 13:34-35)*

37 Innä Ƴisa ɖarät-a-wen: «Yărussälam, ya Yărussälam! Tamäskoyt kämm-i täjjät iman n-ännäbitän, hakkäd sämmäjori n-tihun inəmmušal wi sār-m dd-äšmašäl Mässinäḡ, əndek ḡas a-wa-däḡ wār jeḡ dāḡ-utār n-asdu n-imuzäḡän-näm šund a-wa täjj tekäzzit i-ikärtän-net daw-tafriwen-net mäšan, tössəndäräm-ahi.

38 Ämära, ənhəywät, isälan əmdän, ad-kāwän-äyy Mässinäḡ d-iman-nāwän, umas ehän-nāwän timšar.

39 Ässiilmädäḡ-kāwän, wār t-ih' äššäk a-wen, äbas ilkam ad-hi-tənhayäm hundäḡ har ašäl wa d-mad-taləsäm tənna n-a-s: «Naməlet wa dd-osän s-isəm n-Emäli!» »

24

Teräzže n-ehän n-ämudd wa mäqqärän (Marqəs 13:1-2; Luqa 21:5-6)

1 Älwäqq wa d-ifäl Ƴisa ehän n-ämudd wa mäqqärän, ohäzän-t-dd inəttulab-net, äddoqqen-as tihusay n-akäros wa ija ehän n-ämudd wa mäqqärän.

2 Islä i-təmmal ta täjjän i-ehän-en ḡas, inn'-asän: «Wädden hannäyäm tihusay n-edey-wa-däḡ? Äsidätteḡ-awän a-s ilkam ašäl d-wār mad-däḡ-s dd-täqqayəm wäla-däḡ tähünt tiyyät warät tamidit-net ed, ad-ättäḡtäḡ iket-däḡ-net.»

Išmal n-sämdo (Marqəs 13:3-23; Luqa 21:7-24; 17:22-24)

³ Ikkä ʏisa ɖarät-a-wen taɖayt ta tässidwälät ihəskan wi n-əzzäytun, äqqima. Ohäzän-t-dd inəṭṭulab-net, ənnän-as dəṅ-tenere n-iman-näsän: «Älyalim, läṅät-anäṅ, härätän-win-däṅ s-tənned, əmme d-mad-əjən? Ækkəs-anäṅ dəṅ-tayɖärt n-işmal n-uṅəl-näk d-täməddawt n-äddunya.»

⁴ Äwwežäb-asän ʏisa, inn'-asän: «He käwäned, äjät ənniyät; wär käwän-işäsket äwadəm wäl' iyyän

⁵ fäl-a-s, ad-käwän-dd-asən äddinät äjjootnen äwwaynen isəm-in, änn hak iyyän dəṅ-sän: <Näkk a-s Älmasex>, şişkən s-a-wen-däṅ äddinät äjjootnen.

⁶ Ad-təsləm i-isalan n-imjārän d-mähewəl n-imjārän, wär täxweläm ed ilzam ad-äj a-wen mäşan, sämdo n-äddunya ənta, wär-ija härwa.

⁷ Ad-təknəs tawset tamidit-net, iknəs əddəwəl amidi-net, äj laz, işkəɖkəɖ äkall dəṅ-idäggan äjjootnen,

⁸ sänto n-täməddawt n-äddunya ṅas a-wa, oläh d-sänto n-tizzurt ta rämmäsät tamäɖt s-işwar təjraw eṅäf-net.

⁹ Ad-käwän-äqqəzzəbun äddinät, əjən iman-näwän kərəf, akəɖnät ɖär-wän tiwsaten iket-däṅ-näsnät, dəṅ-äddimmät n-isəm-in wa käwän-iwarän.

¹⁰ Ad-təjməd tuksəɖa n-Mässinäṅ ulhawän n-i äjjootnen dəṅ-wän, tənmäṅɖäräm jer-iman-näwän, tənmäkyəɖäm jer-iman-näwän,

¹¹ asən-dd ännäbitän n-bahu äjjootnen, šənnəməşrəyän äddinät äjjootnen.

12 Ad-äj iba n-iqqud təmyäre ta-däx fäl ad-tismaḍ tārha n-Mässinäx däx-ulhawän n-äddinät äjjootnen

13 mäšan, ere wa äkoyädän däx-alkum-hahi däx-immun-net har ašäl wa d-imda a-wen-däx iket-net, ad-iyləs.

14 Ad-ətwəjjən isälan n-Älənžil n-Təmmənəya n-Mässinäx i-tiwsaten n-äddunya iket-däx-näsnät i-ad-əslənät i-isälan-win-däx təzzar, təmdəw äddunya.»

Erk äzzämanän wi dd-malənen

15 Inna Ƴisa daḡ: «Afäl ašäl wa d-tənhäyäm änabxas wa n-emökkärekäd s-innä ännäbi Danyäl har dd-ijjäš edägg wa šäddijän ihän ehän n-ämudd wa mäqqärän ad-t-isamädas, [ašäl-en, äwadəm wa iyarrän isälan-wi-däx, ijrähet älmäyna-näsän!]

16 Ašäl-en, wi hänen teje ta n-Älyähudəyät, jawäḍnet däx-azzal s-ašrut wa n-iḍaxän;

17 wi dd-ogäz ašäl-en əwarän afälla n-ihänan, wär dd-təzəbbutnet i-ad-əḍkəlän a hasän-ihan ammas n-ehän, jawäḍnet däx-azzal.

18 Wi dd-ogäz ašäl-en han išəkraš, wär dd-täqqälnet ḍara-sän i-ad-əḍkəlän isəlsa-näsän.

19 Timəskay tiḍeḍen ti mad-ijrəw ašäl-en-däx lanät ənniyät meḡ siḍuḍnät, ed ad-täzzäwät talxa-näsnät.

20 Ettärät däx-Mässinäx ad-wär itəmzəyyit ajiwəḍ-näwän d-äzzäman wa n-akäsa meḡ tajrəst meḡ d-ašäl n-əssəbət-i n-täsonfat.

21 Äzzäman-en, ad-täj tissust tässuksäḍät s-ad-dd-täxläk äddunya-däx, wär käla ätiwänhäy

šund ənta fäll-ārori n-ākall; ad-təmdəw əddunya dəx, wār-ilkem ad-ija a dār-s olāhän.

²² Afäl wār-ifnez Mässinäx dəx-täqqän n-tisnant ta häť išilan-en-dəx, wār t-illa ere madän-iyləs; məšan ad-išəksəl Mässinäx täqqän n-tizzurt-ten-dəx dəx-təssəba n-əddinät wi əsnäfrän i-əlyəllas.

²³ Dihen, afäl hawän-innä əwadəm: <Ənhəywät-t-ak Əlmasex, ənta da> mex: <Ənta den>, wār t-təfləsäm.

²⁴ Ad-dd-asən əlmasexän n-bahu d-ännäbitän n-bahu, əjən ijitän d-härätän əssuksäđnen, šışkən ənnär əmmukkän a-wen wəla əddinät wi əsnäfrän Mässinäx.

²⁵ He kəwəneđ, əkkasəx-kəwän dəx-tayđärt härwa wār jen härätän-win-dəx.

²⁶ Ere hawän-innä: <Ənhəywät, Əlmasex wa n-Əməxlas, osä-dd, iha tenere-ta>, wār təkke m dihen; mex dəx afäl hawän-ätwänna: <Ih' ehän iyyän dihen>, wār t-təfləsäm.

²⁷ Əgg-əgg-adəm, ad-aläh ass-net d-essam-i s-e-d issäm dəx-eməynəj, ad-itwənhəy asməxməx-net dəx-atəram.

²⁸ Dihad t-təlla taməxsoyt, ad-itajj ellay.»

Uyəl n-Ÿisa Əlmasex

(Marqəs 13:24-27; Luqa 21:25-28)

²⁹ Əssewəđ Ÿisa fäll-a-wen, innä:

« <Təmda xas tisnant n-išilan-win-dəx,
ad-əlsənät tihay təfukt,
iba təmölle n-ewär;
ətrəkken-dd etran,
ənhəynəhəyän iməşsuha wi hənən išənnawän.>

³⁰ Älwäqq-wen-däx, a dd-e-tənfiləl tamätart ta sälmadät s-ass n-Ägg-ägg-adəm däx-išənnawän, ad-šorsənät tiwsaten ti wärnen ärori n-äkall, ad-t-ənhəynät, imal-dd, inay tijäräken, təlcam-as tärna-net d-älxurmät-net.

³¹ Dihen, ad-išəmmişəl änjälosän-net i-ad-sähəḍän täsinsäxt s-afälla, sədwən-dd sär-s e d t-illäm ere äsinäfrän Mässinäx däx-e d t-tölläm tamdujt, səntən däx-ašrut iyyän, səmdəwän-dd s-ašrut wa iyyädän.»

Äjät ənniyät

(Marqəs 13:28-31; Luqa 21:29-33)

³² «Səjrähät xas əmmək wa s-idaggäl ašar: wädden e-d t-tənhäyäm a-s dd-inšär har lämmədän ifärketän-net, ad-tənnəm, os'-anäx äzzäman wa oläxän;

³³ əmmək-wen-däx daḡ a-s afäl tənähäyäm išmal-wi-däx s-hawän-ənnex har jän, adiš əlmədät a-s Ägg-ägg-adəm, ohäz-dd uḡel-net, os'-iwän fäw.

³⁴ Äsidätteḡ-awän a-s wär-e takəy əzzurəyät-ta-däx, wär jen härätän-win-däx s-hawän-ənnex iket-däx-näsän.

³⁵ Ojär täräxse ija ad-ib' išənnawän d-äkall, uhən ad-iba tənna-nin.»

ḡaymät täsidawäm i-ass n-Ägg-ägg-adəm

(Marqəs 13:32-37; Luqa 17:30, 34-36)

³⁶ Innä ḡisa daḡ ḍarät-a-wen: «Ämära, däx-isälan n-ašäl d-ässaḡät wa d-mad-əjən härätän-win-däx, wär t-illa ere t-issanän; wär t-əssenän

änjälösän wi hänen isənnawän wāla Ägg-ägg-adəm; Abba ɣas, a t-issanän.

³⁷ Ass n-Ägg-ägg-adəm, ad-aläh a-wa dəɣ-s-e-ijən d-a-wa ijän dəɣ-išilan wi n-ännäbi Nox.

³⁸ Äzzāman wa n-Nox, dat-anji wa n-ɖuf, tayāwanän äddinät, sassän, tidubunän, sidubunän har ašäl wa d-ijjäš Nox turäft n-aman ta mäqqārät s-has-innä Mässinäɣ ad-tät-ikən.

³⁹ Wār t-illa a-s tän-ha tijya-net har fälla-sän dd-oðän aman wi n-anji wa n-ɖuf, oläm-tän-in iket-dəɣ-näsän. Šund a-wen-dəɣ ijän a madän-äj ašäl wa dd-mad-dd-ass Ägg-ägg-adəm.

⁴⁰ Ašäl-en, ad-äddewän əssin meddən dəɣ-tenere, ämmäɖkäl iyyän, itwəyy-dd iyyän,

⁴¹ ad-taddähnät sänatät tiðeden dəɣ-iiyän edägg, tammäɖkäl tiyyät, tətəwəyy-dd tiyyät.

⁴² A-wen-dəɣ a fäl, ɣaymät tokayäm ed wār təssenäm ašäl n-ass n-Emäli-nəwän.

⁴³ Wädden käwāneɖ iman-nəwän təssanäm a-s ənnär issan mässi-s n-ehän älwäqq wa s-t-dd-itis emäkräɖ s-ehäɖ i-ad-ärz ehän-net, iket-di, wār-itəttəs i-ad-has-ärz emäkräɖ ehän-net.

⁴⁴ A-wen-dəɣ a fäl, ɣaymät täsidawäm, täxtafäm ed, Ägg-ägg-adəm, ad-dd-ass s-ässaɣät d-wār fälla-s jem.

Tangalt ta n-änaxdim wa oläɣän d-wa n-enälläbäs

(Luqa 12:41-48)

⁴⁵ Änaxdim wa n-ämayɖdal ijrähän härät, ənta a mad-isäɣləf mässi-s təla-net i-ad-ännihäɖ fäll-inaxdimän-net wi iyyäɖnen, isamänsaw-tän e-d ija älwäqq n-a-wen.

⁴⁶ Təndəq i-änaxdim wa mad-ijrəw məssi-s äddunkät dəx-älxidmət wa dəx-t ija, älwäqq s-t-dd-osa-dəx.

⁴⁷ Äsidättey-awän a-s änaxdim-en, ad-t-isäyləf məssi-s təla-net iket-net,

⁴⁸ məšan, erk änaxdim ənta, ad-änn dəx-iman-net: <Näkk, məssi-x, əhoja-hin fäll-i, əbas dd-iqqal>,

⁴⁹ ad-iqannəy imidiwän-net wi iyyädnen tiwit, itatt, isass ənta d-iməswan n-əlxəmər,

⁵⁰ änaxdim-wen, ilkam ad-t-dd-iydär məssi-s dəx-aşäl d-əssağät d-wär fälla-s ija, ilməd s-erk əşşəxəl wa t-işlän a ija a-wa-dəx,

⁵¹ afäl t-dd-osa, ad-t-iqquzzəbət, isärtəy-t d-älmunafeyän dəx-tihay ti n-ajäma wär-iha ar tahäla d-azəmmäkärkəz n-isenän fäl tämujrizt.»

25

Tangalt ta n-timawađen

¹ Ija Yisa i-äddinät tangalt tiyyät dəx dəx-hasän-innä: «Təmmənəya ta n-Mässinäx, tänifäqqa d-mərawät timawađen wären əzzey meddən ədkälnen tiftəl-nəsnät s-ehäd i-ad-əlkədnät i-əmazlay s-edägg-wa-dəx itäjj azli.

² Səmmosät dəx-timawađen-tin-dəx, ijrəw-tänät iba n-tayətə, səmmosät ti iyyädnen, timəssorha.

³ Älwäqq wa d-gilləwnät, ədkäl-nät ti ijrəw iba n-tayətə tiftəl-nəsnät məšan, wär dəx-snät jenät aman n-käränzil hasnät-əgdähnen.

⁴ Ti n-timəssorha əntänätəd, jänät aman dəx-butəlän s-edes, äwwäynät-tän.

5 Ad-simäqqulnät ya ɖarät a-wen i-ämaɖlay. Täqqälnät-as, täqqälnät-as har äldäšnät, ilɣädtänät-in eɖəs iket-näsnät.

6 Šämad igl' ehäɖ ad-ija eɣäri innän: <Ämaɖlay ya, iwwäɖ-dd, səlkəɖät-as.>

7 Ænkärnät-dd timawaɖen iket-näsnät, əɖkälnät tiftəl-näsnät.

8 Æggädnät-dd ti ijräw iba n-tayətte, ənnänät i-ti n-timəssorha: <Näkkänätəɖ ya, tiftəl-nänäɣ, išwar ämmutnät, äkfəmət-anäɣ-dd härät n-aman.>

9 Ænnänät-asnät ti n-timəssorha: <A fäw, wär näddobät ed a-wa nətətaf dəɣ-aman, wär hanäɣ-igdeh iket-nänäɣ, äkkəmət u-mamäla, žänšəmət-dd aman i-iman-näkmät.>

10 Æglänät i-ad-dd-žənšənät aman, osä-dd ämaɖlay ɖara-snät. Änmäjäšnät dār-s ti n-timəssorha äsdäwnen i-a-wen, ammas n-ehän təzzar, ätəubben ishar n-edägg.

11 A əndärrän ɖarät-a-wen, əqqälnät-dd ti ijräw iba n-tayətte, ad-takäwkawnät ashär, jan-nenät: <Mändam, mändam! Arr-anäɣ-in emm n-ehän.>

12 Mäšan, inn'-asnät mässi-s n-edägg: <Älɣafyät-näkmät, wär kämət-əzzeyäɣ.> »

13 Innä Ƴisa ɖarät-a-wen i-inəttulab-net: «A-wen-däɣ a fäl, ɣaymət tokayäm ed wär təssenäm ašäl wäl' ässaɣät wa s-dd-mad-dd-ass Emäli.»

*Tangalt ta n-isuf wi itäjj Mässinäɣ
(Luqa 19:11-27)*

14 Oläs daḡ ʒisa, innä: «Təmmənəya n-Mässināḡ, tänifäqqqa d-isālan n-āhaləs iyyān dd-ijjāš ənniyät n-asikəl, ässawäd tekle ḡas, issäḡräd-d inaxdimān-net, ij' ehäre-net iket-net jer-ifassän-näsän i-ad-sär-s äxdəmān;

15 ikf'-iyyän səmmos ibəlḡan n-oräḡ, wa iyyädän, ikf'-e əssin ibəlḡan, wa s-kärad, ikf'-e iyyän n-abläḡ; hak iyyän-däḡ, ikf'-e s-a-wa dār-togdāh tardast-net təzzar, ässokäl.

16 Šik-däḡ a-s hin-ämmummälät wa n-səmmos ibəlḡan, oräḡ-net, irbāx fälla-s səmmos ibəlḡan iyyäd.

17 Wa n-əssin daḡ, ija šund a-wen-däḡ, irbāx fäll-wi-net, əssin iyyäd daḡ.

18 Wa n-iyyän n-abläḡ n-oräḡ, iglä, iḡāš-as anu, təzzar inbäl däḡ-s a-wa t-ikfa mässi-s.

19 Ähoja-hin mässi-sän däḡ-asikəl har ašäl wa dd-iqqäl; osä-dd ḡas, iḡräd-dd inaxdimān-net i-ad-has-əjön älmeḡan n-a-wa tän-issäḡläf.

20 Os-e-hi-dd wa n-səmmos ibəlḡan n-oräḡ, äwway daḡ səmmos ibəlḡan wi dd-irbāx; inna i-mässi-s: «Mässi-ḡ, səmmos ibəlḡan n-oräḡ wi hi-tössäḡläfäd, əntäneḡ da, ärbäxäḡ-dd fälla-sän səmmos iyyäd.»

21 Inn'-as mässi-s: «Ehoyd! Änaxdim ifranän ha taflest a tämoosäd; šämad h'-ik taflest däḡ-a-wärän əjjət, adiš ad-käy-säḡləfäḡ a äjjeen. ʒyyāw ḡayəm edes-in, ad-nahär tedāwit ta jeḡ.»

22 Osä-dd ḡarät-a-wen wa n-əssin ibəlḡan n-oräḡ, inna i-mässi-s: «Mässi-ḡ, əssin ibəlḡan-wi hi-tössäḡläfäd, ärbäxäḡ-dd fälla-sän əssin iyyäd.»

²³ Inn'-as mässä-s: <Ehoyd! Änaxdim ifranän ha tafløst a tämoosäd; šamad h'-ik tafløst dāḡ-a-wārän əjət, adiš ad-kāy-sāxləfāḡ a äjjeen. Ʒyyāw ḡayəm edes-in, ad-nahār tedāwit ta jeḡ.>

²⁴ Išrāy-dd wa n-iyyän n-ablāḡ, innä i-mässä-s: <Mässä-ḡ, əssanāḡ a-s kāyy emäššehi a tämoosäd, tiḡlubud a wār täddomed, tiləyəd ašəkrəš dāḡ-wār tənferäd härät,

²⁵ jeḡ-ak tüksəḡa-ta-dāḡ fäl təḡled ḡas, əḡleḡ nāk-k-dāḡ, jeḡ anu i-ablāḡ n-orāḡ wa hi-təssāxləfäd, ənbälāḡ-t dāḡ-s; ənta da, ərməs təla-nāk.>

²⁶ Inn'-as mässä-s: <Kāyy wa-hi, erk änaxdim n-eməssendəd a tämoosäd! A-s təssänäd a-s tiḡlubəḡ a wār-äddomeḡ, tiləyāḡ ašəkrəš dāḡ-wār ənferāḡ härät,

²⁷ mafäl wār jed azrəf-in dāḡ-bānk i-ad-ättälläḡāḡ härät fälla-s afäl dd-äqqälāḡ?>

²⁸ Inna i-äddinät ḡarät-a-wen, ad-dāḡ-s ahāḡän ablāḡ n-orāḡ wa iṡṡäf, əkfən-t i-wa n-māraw ibəlḡan.

²⁹ Ässiilmädāḡ-kāwän a-s äwadəm wa ilän härät ad-has-iwwaḡ, iḡat a-wa ila mäšan, wa wārän ila härät, ad-dāḡ-s ättärmäs wäla a-wa iṡṡäf.

³⁰ <Ämära, amälḡon wa-hi, ərməsät-t, təjrəm-t-in dāḡ-tihay ti n-ajäma wār iha ar tahäla d-azəmmākärkəz n-isenän fäl tämujriḡt.> »

Äššäreḡa wa n-tilkamät

³¹ Innä Ʒisa daḡ: «Ašäl wa dd-mad-iqqəl Äḡḡ-äḡḡ-adəm dāḡ-älxurmät-net äddew d-

änjälösän-net, ad-äqqayəm fäll-tasäqqaymut-net ta n-älxurmät i-ad-immukəl.

³² Ašäl-en, ad-dd-äqqaymənät data-s tiwsaten n-äddunya iket-däḡ-näsnät, izəmmäzləy äddinät s-əmmək wa s-izəmmäzlay aməḍan tahrut i-ad-ibḍəw tihatten d-išulay.

³³ Dihen, ad-äj tihatten daw-aḡil-net, äj išulay daw-täšalje-net.

³⁴ Tihatten ti t-əllänen daw-aḡil-net, ad-hasnät-änn ämänokal: <Əyyäwmät, kämätəḍ-i n-timəssundəḍ n-Abba-nin, uhənmät təmmənəya ta hakmät-äsmäjnät Abba a dd-täxläk äddunya.

³⁵ Ašäl wa d-älluzäḡ, kämätəḍ a hi-äswäyanän, a-s äffudäḡ, kämätəḍ a hi-issəsəwän, a-s hakmät-ämjareḡ, täsbärräkmät-ahi,

³⁶ a-s ḡäluläḡ, təssəlsämät-ahi, a-s ärhinäḡ, təssəfärmät-ahi, a-s heḡ takärmüt, jämät-ahi-dd äsafu.>

³⁷ Afäl inn' ämänokal a-wen-däḡ, ad-has-ənnən imayḍalän wi t-əllänen dihen: <Emäli, əmme d-käy-nənhäy tälluzäd, nəššəkš'-ik? Əmme d-käy-nənhäy täffudäd, nəssəsəw'-ik?

³⁸ Əmme hanäḡ-dd-täm Jared har käy-näsbärräk? Əmme d-ḡäluläd har käy-nəssəlsa?

³⁹ Əmme d-tärhinäd meḡ əmme d-təjjäšäd takärmüt har hak-in-nəja äsafu?>

⁴⁰ Dihen, ad-hasän-änn ämänokal: <Äsidätteḡ-awän a-s hak ässaḡät d-jäm a-wen-däḡ i-iyän däḡ-ayətma-ḡ däḡ-äddunya, kud-däḡ wa əndärrän däḡ-sän, šund näkk a-s t-jäm.>

⁴¹ Ad-dd-innäḍ ämänokal ḍarät-a-wen s-wi wärnen täšalje-net, änn'-asän: <Käwänəḍ iməḡyan ilḡan Mässinäḡ a tämoosäm, äflät

dat-i, äkkät temse ta täxlälät tämmujnet i-Iblis d-änjälösän-net,

⁴² fäl-a-s käwāneḏ, älluzäḡ data-wän, wär hi-təššəkšäm; äffudäḡ, wär hi-təssəs-wäm;

⁴³ ämjareḡ-awän, wär hi-täsbärräkäm; ḡäluläḡ, wär hi-təssəlsäm; ärhinäḡ, əjjäšäḡ takärmüt mäšan, wär hi-dd-jem äsafu.>

⁴⁴ Afäl hasän-inna ämänokal a-wen, ad-has-ənnən əntāneḏ: <Emäli, əmme käy-nənhäy tälluzäd? Əmme käy-nənhäy täffudäd, meḡ ḡäluläd, meḡ tämijared-anäḡ-dd, meḡ tärhinäd, meḡ hed takärmüt näqqim wär hak-nəkna härät?>

⁴⁵ Ad-hasän-änn ämänokal: <Äsidätteḡ-awän a-s ed wär jem a-wen i-iyjän däḡ-ayətma-ḡ däḡ-äddunya, kud-däḡ wa ənḏärrän däḡ-sän, šund näkk a-s wär t-jem.>

⁴⁶ Äywa, wi-hi əntāneḏ, ad-hin-ətwejärän däḡ-tisnant ta täxlälät mäšan, imaxdalän əntāneḏ, ad-əjjəšan tämudre ta täxlälät.»

26

Utär n-asäydär n-Ḣisa

(Marqəs 14:1-2; Luqa 22:1-2; Exya 11:45-53)

¹ Ija Ḣisa mäjräd-wen-däḡ ḡas, innä i-inəṭṭulab-net:

² «Təssanäm a-s əssin išilan a hin-äqqimänen i-ämudd wa n-Faşka-i däḡ-mad-ättärmäs Ägg-ägg-adəm, itwešləb fäll-tajəttewt.»

³ Däḡ-isälan n-a-wen-däḡ a däḡ-dd-əžžəmmäḡän imänokalän n-käl-tikutawen

d-inušămän n-Işrayil dăḡ ehän n-Qayăf wa n-ămănokal n-kăl-tikutawen.

⁴ Ănmănnakän dihen fäll-əmmək wa s-mad-săḡdărăn Țisa, əjən iman-net dăḡ-ufăr

⁵ măšan, ənnän, wăr-ufa ad-ăj a-wen dăḡ-aşăl wa n-ămudd i-ad-wăr təjj tamdərwayt dăḡ-tamətte.

*Tamăđt ta tössănḡălăt ađutăn fäll-Țisa
(Marqəs 14:3-9; Exya 12:1-8)*

⁶ Ămjarăt Țisa aşăl iyyän dăḡ-taḡrəmt ta n-Bitanya i-ehän n-ăhaləs s-isəm-net Simyon wa s-kăla t-ijrăw jəri.

⁷ Ill'-e ḡur-s dihen-dăḡ, əsiḡămăr dăḡ-edăgg wa n-imənsiwăn, a-s t-dd-tosa tamăđt tăwwayăt butəl n-ađutăn lanen əlqim ad-tăn-sanḡal fäll-eḡăf n-Țisa.

⁸ Ɛnhăyăn inəţţulab-net a-wen, wăr hasăn-ijrez, əhnăffen dăḡ-iman-năsăn ad-jannen: «Şăḡşad yaden!

⁹ Ađutăn-wi-dăḡ, mafăl wăr hin-ənsən, umas əlqim-năsăn takute i-tilăqqiwen.»

¹⁰ Ilmăd Țisa a-wa kittəwăn, inn'-asăn: «Ma s-naxxăsăm iman n-tamăđt-i-dăḡ? Tihusay n-hărăt, təj'-ahi-t!

¹¹ Tilăqqiwen ya, əllanăt ḡur-wăn hărkuk, a-s ija a-wen, năkk, ilkam ad-kăwăn-ăflăḡ.

¹² Asănḡal wa fäll-i ja ađutăn-wi-dăḡ, aşəşwar a dd-ja i-ăddinăt dăḡ-isălan n-ămukən n-taḡəssa-nin i-azəkka.

¹³ Ăsidătteḡ-awăn a-s edăgg dăḡ-ătwăxtăbăn isălan n-Ălənżil dăḡ-ăddunya-ta-dăḡ, ad-dăḡ-

s ətwəsuxəlän isälan n-a-wa tēja, i-ad-tät-kittəwän äddinät.»

Anu n-taydärt wa iyäš Yahudəs

(Marqəs 14:10-11; Luqa 22:3-6; Exya 12:1-8)

¹⁴ Däx-a-wen-däx, a dd-iggäd Yahudəs Isxaryut wa n-iyyän däx-inəttulab wi n-märaw d-əssin, ikk' imänokalän n-käl-tikutawen,

¹⁵ inn'-asän: «Ma hi-hakkäm afäl hawän-əssäxdäräx Yisa?» Assedänän-as kərədät timərwen n-ərriyal n-azrəf, əkfän-as-tän.

¹⁶ Ad-itammäx Yähudəs xur-älwäqq-wen-däx i-tašləlt s-hasän-t-ästärmäs.

Ämudd wa n-Faşka

(Marqəs 14:12-21; Luqa 22:7-14, 21-23; Exya 13:21-30; 1 Kur. 11:23-25)

¹⁷ Ašäl wa äzzarän n-ämudd wa n-Faşka, däx-tamäkšanät tijəlwen-ti wär ha täzza, ənnän inəttulab i-Yisa: «Älyalim, əndek diha d-tärhed ad-nəsəssikəy imənsiwän n-ämudd wa n-Faşka?»

¹⁸ Inn'-asän: «Əjjəšät axrəm, təkəkəm ehän n-mändam, tənnəm-as, inn'-ak älyalim: <täqqän-in, tohäz-dd; ad-səssikəyäx näkk d-inəttulab-in ämudd wa n-Faşka däx-ehän-näk.> »

¹⁹ Jän inəttulab a-wa hasän-innä Yisa, əglän ad-siməjnun imənsiwän wi n-Faşka.

²⁰ Ij' ehäd xas, änyäyma Yisa d-inəttulab wi n-märaw d-əssin däx-edägg wa n-imənsiwän.

Äsfäkkär-dd Yisa ämaxdar-net

21 Tamänsawän dihen-däx a-s hasän-innä: «Äsidätteḡ-awän a-s iyyän däḡ-wän a hi-madän-isəssäḡdär.»

22 Ękmän-tän iman-näsän a-s hasän-innä a-wen-däḡ, ad-has-jannen s-iyyän-iyyän: «Älḡalim, ajän näkk?»

23 Äwwežäb-asän, inn'-asän Ḳisa: «Wa dār-i madän-imzəyyət iji n-äfuss däḡ-äkoss, ənta a hi-madän-isəssäḡdär.

24 Tidət-däḡ a-s Ägg-ägg-adəm, ad-t-iba ed a-wen-däḡ a ənnän əlkəttabän n-Mässinäḡ däḡ-isälan-net mäšan, amäskoy äwadəm wa t-madän-isəssäḡdär! Äwadəm-en, iššäm-as-in, ad-wār dd-ijješ äddunya.»

25 Iggäd-dd Yähudəs wa t-madän-isəssäḡdär, innä ənta-däḡ: «Älfäqqi-nin, äwadəm wa s-jänned, adiš näkk?» Inn'-as Ḳisa: «Käyy iman-näk, tənned-tän.»

Tasäktot šäddijät

(Marqəs 14:22-26; Luqa 22:15-20; 1 Kur. 11:23-25)

26 Tattän dihen-däḡ a-s idkäl Ḳisa tajəlla, ämmoy i-Mässinäḡ təzzar, irz'-et, äzun-tät jer-inəṭṭulab-net, inn'-asän: «Uhənät, äksät, a-wa taḡəssa-nin.»

27 Idkäl-dd day kara han aman n-läḡnəb äxxiimmärnen, ämmoy i-Mässinäḡ təzzar, ikf'-asän-t, inn'-asän: «Uhənät, äswät iket-näwän;

28 a-wa ašni-nin wa ämoosän ärkäwäl n-tassayt ta täynayät d-Mässinäḡ. Ašni-nin, ad-inḡəl däḡ-təssəba n-tenäšše n-ibäkkadän i-äddinät äjjootnen.

29 Ässiilmädäx-käwän a-s, wär-ilkem ad-əswex ad-dd-ijmadän ara n-läxnäb hundäx har ašäl wa d-mad-aləsäx näkk d-käwäneḍ tesäse-net, s-älxal äynayän däx-Təmmənəya ta n-Abbanin.»

Ilkam ad-ikkuddəl Bəṭrus Yisa

(Marqəs 14:27-31; Luqa 22:31-34; Exya 13:36-38)

30 Äwwäy Yisa d-inəṭṭulab-net isuhax n-təmmal n-Mässinäx dd-əzjarnen əlkəttab wa n-Äzzäbur, əglän ɗarät-a-wen, əkkän taɗaxt ta tässidwälät ihəškan wi n-əzzäytun.

31 Əwwädän-in dihen xas, inn'-asän: «Xorəzzəma wa-hi madän-irməs, ad-dd-arəw akuddəl-näwän hahi ehäd-i-däx, təjawädäm iket-däx-näwän, təyyəm-ahi-dd näkk xas fäl-a-s iktab däx-əlkəttab a-s:

«Ad-əwətäy amädan, iba-t, ämmähäšnät tihatten iket-näsnät.» »

32 Inn'-asän daɗ: «Afäl dd-ənkäräx jer-inəmmuttan, ad-hawän-izaräx s-teje ta n-Galila.»

33 Iggäd-dd Bəṭrus, innä i-Yisa: «Näkk iman-in, kud äjewädän imidiwän-in wi iyyäɗnen iket-näsän däx, wär mad-äjawädäx, äyyäx-käy, fäw!»

34 Inn'-as Yisa: «Äsidätteɗ-ak a-s wär mad-äj ekäz kərəɗ iɗoran ehäd-i-däx s-wädden täkkudələd-ahi har kərəɗ ihändäggan.»

35 Inn'-as Bəṭrus: «Näkk xas, kud-däx tamättant a tihräx ɗär-k, wär käy-mad-əkkuddələx.» Abäraj-wen-däx ija Bəṭrus, a jän daɗ inəṭṭulab wi iyyäɗnen iket-däx-näsän.

Ässaḡät wa ikkäs Ḡisa dāḡ-ašəkrəš wa n-Žätsämmani

(Marqəs 14:32-34; Luqa 22:39-46)

³⁶ Äddew dār-sän Ḡisa darät-a-wen s-ašəkrəš iyyän iknan asədwal n-ihəškan s-isəm-net Žätsämmani, əwwädän-in ḡas, inn'-asän: «Ḡaymät, täqqəlām-ahi diha-dāḡ, ad-ədələḡ Mässinäḡ, əqqələḡ-kāwän-dd.»

³⁷ Iššənkäš-in fälla-sän, äddeew d-Bəṭrus d-məddana-s n-Zäbdi wi n-əssin; ḡur-ässaxät-wen-dāḡ, ad-t-əssəntän iman-net təkma, ixwāl.

³⁸ Innä i-inəṭṭulab wi dār-äddew: «Äḡyan iman-in, äḡyan har išwar hi-äba, wär hanāḡ-iläqqädət eḡəs.»

³⁹ Iššənkäš-in daḡ fälla-sän a əndärrän, irkāḡ, äsḡäs timme-net äkall, ad-itəddal Mässinäḡ, ijanna: «Ya Abba-nin, kunta ämmukkän a-wen-dāḡ, səssijəj-ahi tisanant-ta-dāḡ! Hakd a-wen-dāḡ, äjet erhet wa-näk wädden wa-nin.»

⁴⁰ Iqqäl-dd Ḡisa inəṭṭulab-net wi n-kärad, ogäz-tän-dd əṭṭasän; issənkär Bəṭrus, inn'-as: «Ḡas kāwänəḡ, indär-awän wäla-dāḡ ad-där-i tahərəm iyyän n-ässaxät ḡas dāḡ-wär kāwän-ilyed eḡəs!

⁴¹ Ənkärät, ədələt Mässinäḡ i-ad-kāwän-agəz dāḡ-tändärbaten n-Iblis; ägg-adəm, tidət-dāḡ, a-s äsidärhän amišəl n-a äjjeen ähuusken mäšan, igdal-as iba n-äššahät n-tumast-net amišəl n-a-wa irha.»

⁴² Oläs-dd daḡ äsihe wa s-əssin, iššənkäš-in fälla-sän, ad-itəddal Mässinäḡ, ijanna: «Abba-nin, kunta wär t-illa fäw əmmək s-äḡläsəḡ dāḡ-tisanant-ta-dāḡ, adiš, äjet erhet-näk.»

⁴³ Oläs-tän uḡel, ogäz-tän-dd, ij'-asän eḡes aläḡad-wa-däḡ fäl hasän-indär wäla ad-arən tiṡṡawen-näsän.

⁴⁴ Ifäl-tän daḡ asihe wa s-käraḡ, idäl daḡ Mässiinäḡ s-əmmək-wənnin-däḡ.

⁴⁵ Iglä, iqqäl-tän-dd, issenkär-tän, inn'-asän: «Ḥas käwäneḡ tətṡasäm, sinfum härwa? Ğnkärät-dd ämära, ässaḡät n-atärməs-in, ohäz-dd. Ägg-ägg-adəm, ad-itwäḡdär, ijjəš ifassän n-inäsbäkkadän,

⁴⁶ ənkarät, äglät-anäḡ; os'-anäḡ wa hi-e-isəssäḡdärän.»

Atärməs n-Ḥisa

(Marḡəs 14:43-53; Luḡa 22:47-53; Exya 18:2-11)

⁴⁷ Wär-issəmdä Ḥisa tənna n-a-wen-däḡ a-s Yähudəs, wa n-iyjän däḡ-inəṡṡulab-net wi n-märaw d-əssin da-däḡ, äsiläl tamətte täjjeet dd-äšimašälän imänokalän n-käl-tikutawen d-inušämän n-Işrayil; əşləjän iyyäḡ tikobawen, äwwayän iyyäḡ iboriyän.

⁴⁸ Tamətte-ten-däḡ, ij'-as Yähudəs wa n-ämayḡdar tamätart däḡ-has-inna: «Ähaləs wa s-hi-tənhäyäm har t-osäsäḡ däḡ-idmarän-in, ənta a-s Ḥisa, ärməsät-t.»

⁴⁹ Osä-dd Yähudəs, oḡäd iman-net s-Ḥisa, inn'-as: «Älfäqqi-nin, jeḡ-ak äsafu!» Osäs-t däḡ-idmarän-net.

⁵⁰ Inn'-as Ḥisa: «Amidi-nin, äj ya a-wa s-dd-tosed». Toḡa tamətte fäll-Ḥisa älwäqq-wen-däḡ, tərmäs-t.

⁵¹ Iggäd-dd iyyän däḡ-inəṭṭulab-net, ilbäy-dd tākoba-net, ištāf-dd sār-s taməzzujt n-akli n-āmānokāl n-kāl-tikutawen.

⁵² Iḡtāl-t Ȳisa, inn'-as: «Suḡəl tākoba-nāk däḡ-titar-net; ere iknāsän s-tākoba, ad-āmmāt s-tākoba.

⁵³ Äddoobex teḡäre n-Abba-nin āmāra-däḡ, afäl t-äyrex daḡ, šik-däḡ a-s mad-sār-i dd-išəmmişəl mārāw ajhanän n-ānjālosän d-əssin hi-ohäḡnen tinahäḡen

⁵⁴ māšan afäl ija a-wen, əndek əmmək wa s-mad-itbat a-wa fäll-i ənnän ännābitän däḡ-əlkəttabän n-Mässinäḡ.»

⁵⁵ Innä Ȳisa i-tamətte ḡarāt-a-wen: «Ajän nākk ānaḡtaf a āmoosäḡ a-s hi-dd-takkām d-tikobawen d-iboriyän i-ad-hi-tärməsäm? Wädden hannäyām-ahi hak ašāl äqqiimäḡ däḡ-ehän n-āmudd wa məqqārän saḡrex, mafäl wār hi däḡ-s tərməsäm?

⁵⁶ Māšan, əlmədāt a-s a-wa ijän iket-net, ija i-ad-itbət a-wa ənnän ännābitän däḡ-əlkəttabän.» Äjewädän inəṭṭulab-net iket-nāsän, oyyän-t-dd ənta ḡas jer-išənja-net.

*Tebädde n-Ȳisa dat-äššäreḡa wa məqqārän
(Marḡəs 14:53-65; Luḡa 22:54-55, 63-71; Exya
18:12-14, 19-24)*

⁵⁷ Təlwäy tamətte ta tərməsāt Ȳisa s-Qayāf wa n-āmānokāl n-kāl-tikutawen-i s-a-s itāj a-wen-däḡ äzzimmäḡän ḡur-s älḡulam n-Äṭṭäwrāt d-inušämän n-Išrayil.

⁵⁸ Tamətte-en, ij'-as-dd Bəṭrus alkum šəjren har təjjäš ammas n-äḡalla n-ehän n-āmānokāl

n-käl-tikutawen; osä-dd Bətrus, ijjäš ənta-däx, igla äqqima edes i-gärditän, ad-isimäqqul i-ajilal n-tanfust-ta-däx.

⁵⁹ Eǧǧädän-dd imänokalän n-käl-tikutawen d-käl-Sinhidrin† wi tirənen äššärexa iket-näsän, ad-tammäxän i-tajuhe n-bahu ənnän fäll-Ÿisa i-ad-t-sidəwän däx-äššärexa, sənnəhəjjən-t d-tamättant;

⁶⁰ ənnän fälla-s bahutän äjjootnen məšan, wär tən-iha a ibdadän fäll-härät. Eǧǧädän-dd əssin äddinät äjjəyhnen s-bahu,

⁶¹ ad-jannen: «Ähaləs-i-däx, näjjəyha a-s inna, äddoobät ad-änd ehän n-ämudd wa məqqārən n-Mässinäx, idəy-dd iyyän äynayän däx-edägg-net däx-käraç işilan.»

⁶² Isl' ämänokal n-käl-tikutawen i-a-wen xas, ihä-dd ibdad, imməjräd, innä i-Ÿisa: «Ma tənned däx-a-wa fälla-k itawannen? Mäjräd!»

⁶³ Wär t-illa a has-inna Ÿisa. Inn'-as ämänokal n-käl-tikutawen älwäqq-wen: «Jaräx-käy s-idəm n-Mässinäx-i iddärän, läxät-anäx kunta käyy a-s Älmasex wa n-Rure-s n-Mässinäx.»

⁶⁴ Inn'-as Ÿisa: «Käyy iman-näk, tənned-tän; ässiilmädäx-käy daç a-s xur-aşäl-i-däx, ad-tənhəyäm Ägg-ägg-adəm, äqqiima daw-açil n-Wa ilän tärna iket-net, taləsəm-t daç ahänay, iqqal-dd, ifal-dd işənnawän, inay tijäräken.»

⁶⁵ Isl' ämänokal n-käl-tikutawen i-a-wen-däx xas, ijjäš-t älhäm, wa-däx fäl, irmäs err n-eräswäy-net, äşxərrawät-t fäll-iman-net, innä:

† 26:59 26:59 A-wa älzämaçät n-inušämän d-imizärän n-käl-Işrayil wa itirən äššärexa, əntäneç a-s älcallitän, osaxän daç tamətte d-əlxəkum d-äddin.

«A-wa äskafär, wädden salläm-as a-s äskafär; ma nətajj i-tijuhawen daḡ? Igdäh-anäḡ a-wa dāḡ-inna meḡ ma tənnäm?»

⁶⁶ Ğnän-as: «Wa ənta, ānihājja d-tamättant!»

⁶⁷ Ad-fälla-s situfän, dabbäḡän-as, ḡazzän dāḡ-s iyyäd,

⁶⁸ jannen-as: «Ĝyyaa Ālmasex, luləy ya, tālläḡed-anäḡ mi hak-istäḡän?»

Akuddəl n-Bəṭrus i-Ḣisa Ālmasex

(Marḡəs 14:66-72; Luḡa 22:56-62; Exya 18:15-18, 25-27)

⁶⁹ A-s itäj a-wen-dāḡ, äqqiima Bəṭrus dāḡ-təfärre n-ammās n-äḡalla. Tos'-e-hidd tānaxdimt tiyyät, tənn'-as: «Käyy-i-dāḡ hannäyāḡ, kälā tāddewäd d-Ḣisa wa n-Galila?»

⁷⁰ Äkkuddäl Bəṭrus a-wen dat-äddinät iket-näsän, inn'-as: «Wär-əssenäḡ a dāḡ-hitässewäläd.»

⁷¹ Innä Bəṭrus a-wen ḡas, äškätaräš s-emm n-äḡalla n-ehän, tənḡay-t daḡ tānaxdimt tiyyät, ad-janna i-äddinät wi t-əllanen dihen: «Hannäyäm-t ähaləs-wa-dāḡ, kälā äddew d-Ḣisa wa n-Näširät.»

⁷² Ad-itəhhaḡ Bəṭrus išənnawän d-äkall, ijanna: «Ähaləs-wa-dāḡ s-hi-jännem, wär t-əzzeyāḡ.»

⁷³ A əndärrän ḡarät-a-wen, əkkän-t-dd äddinät əbdadnen dāḡ-ammās n-äḡalla-en-dāḡ, ənnän-as: «Ijmaḡ-t äššäk a-s käyy-dāḡ, iyyän dāḡ-äddinät wi n-Ḣisa, temäsläḡt-näk iman-net a täsdättet a-wen.»

⁷⁴ Ad-itähhad Bətrus, ilaqqän iman-net siha d-siha, ijanna: «Ənney-awän, ähaləs wa s-hi-jännem, wär t-əzzeyäx.» Diha-däx d-innä a-wendäx, ad-iwät ekäz äxora.

⁷⁵ Iktä-dd Bətrus mäjräd wa s-käla has-t-ija Yisa, a-s has-inna: «Wär mad-iwət ekäz äxora ašäl-i-däx s-wädden täkkuddäläd-ahi har kərəd ihändäggan.» Izjār çarät-a-wen, ad-ihall a-wadäx has-ja tisanant.

27

Tebädde n-Yisa dat-Bilatəs

(Marqəs 15:1; Luqa 23:1-2; Exya 18:28-32)

¹ Äffaw ças, əžžəmmäxän imänokalän n-käl-tikutawen d-inušämän n-Işrayil, ətṭäfän iyyän n-emm däx-isälän n-iji n-iman n-Yisa,

² ərmasän-t, jän däx-s tišəm təzzar, əlwäyän-t s-Bilatəs wa n-gəfär.

Imməntäl Yähudəs i-iman-net

(Ijitän 1:18-19)

³ Inhäy Yähudəs-i t-issäxdärän a-s äššäreya n-tamättant a əxtäsän i-Yisa ças, ämmujrəz a-wa ija; ikk' imänokalän n-käl-tikutawen d-inušämän n-Işrayil, äsoxäl-asän kərədät timərwen n-ärriyal n-azrəf wi t-əkfän.

⁴ Os'-en-dd, inn'-asän, «Ofey abäkkad, Yisa, wa jeç däx-ifassän-näwän, wär t-illa a iṣšad.» Ənnän-as: «Un, ma näkkul? A-wen əššäxəl-näk.»

⁵ Irmäs Yähudəs azrəf-ənnin, ijär-asän-t-in däx-ehän n-ämudd wa mäqqärän təzzar, iglä,

ässeläy aḡan, ija tärsəm däḡ-err-net, imməntäl i-iman-net.

⁶ Ǝkkəmen-dd imānokālän n-käl-tikutawen azrəf wa hin-ijär māšan, ənnän: «Wär hanāḡ-xälal iji n-azrəf-wa-däḡ fäll-wa n-ehän n-āmudd wa māqqārän, ed ənta a-s ätwäjjän iman n-āhaləs.»

⁷ Ǝžžəmmäḡän däḡ-isälan n-a-wa mad-əjən i-azrəf-en, ohārän emm, ənnän, ad-sär-s žänšən ašəkrəš n-āhaləs iyyän hin-ižanšen iləkkan, i-ad-umas edəgg-en, tižəska i-imäjarän.

⁸ Däḡ-təssəba n-äddäbara-wen-däḡ a fäl har ašäl-i-däḡ, təfärre-ten-däḡ, iwär-tät isəm: «Ašəkrəš wa n-ašni.»

⁹ Āmoos a-wen-däḡ jän a ässitbätän a-wa innä ännäbi Yirmiya,[†] a-s innä däḡ-əlkəttab-net:

«Ārmäsän kərəḡät timərwen n-ārriyal n-azrəf, älqim-wen-däḡ a-s t-əḡkəḡän käl-Išrayil, ənta-den-däḡ a-wa dār-ässagdəhän älqim n-ägg-adəm,

¹⁰ əžžənšän sār-s ašəkrəš wa n-i n-iləkkan s-əmmək wa s-hi-tän-innä Emäli.»

Āmewäy Ƴisa s-Bilatəs

(Marqəs 15:2-5; Luqa 23:3-5; Exya 18:33-38)

¹¹ Älwäqq wa dd-ibdäd Ƴisa dat-Bilatəs wa n-gəfär, issəstän-t, inn'-as: «Ak, käyy a-s ämänokal n-käl-Älyähud meḡ?» Inn'-as Ƴisa: «Käyy iman-näk, tənne-d-tän.»

[†] **27:9 27:9** A-wa ännäbi dd-äzzarän i-Ƴisa, älöläy däḡ-isälan-net säḡisät timəḡ n-awätay dat-tiwit-net.

12 Eǵǵädän-dd imänokalän n-käl-tikutawen d-inušämän n-Işrayil, ad-t-sađlamän siha d-siha maşan, wär t-illa a hasän-inna.

13 Innä gəfär i-Ŷisa: «Ajän käyy, wär səlləd i-tikunen ti fälla-k titwənninen?»

14 Wär t-təlla täfert dd-təzjarät emm n-Ŷisa, iqqän a-wen eǵäf n-gəfär.

Bärǵäbbas wa n-emäjj n-iman

(Marqəs 15:6-15; Luqa 23:13-25; Exya 18:39-19:16)

15 Äzzäman-en, hak ämudd n-Faşka, äsiwäyy'-in gəfär u-takärmüt wa däǵ-s tətär tamətte.

16 A-s itäjj a-wen-däǵ, ih' ähaləs s-isəmet Bärǵäbbas takärmüt, isəmetnet iyyän Ŷisa ənta-däǵ, wär t-illa ere s-wädden issan fällterwidəma-net.

17 Inhäy Bilatəs tamətte-ta dd-təžžəmmäǵät sär-s ǵas, inn'-asän: «Läǵätät-ahi, əndek jermeddən-wi-däǵ n-əssin wa s-tärham a hawän-t-in-səwwəyyäǵ? Ma tässofäm Bärǵäbbas meǵ Ŷisa wa s-itawänna Älmaseǵ?»

18 Ij'-asän Bilatəs asəstan-wen-däǵ fäl-a-s isan a-s təmǵäre n-tismiten-näsän ǵas a fäl ästärmäsän Ŷisa.

19 Äqqiima Bilatəs härwa däǵ-edägg wa däǵ-iǵattäs äşşərəǵa a-s dd-täşmaşäl hənne-s äwadəm sär-s i-ad-wär-isəmtəltil iman-net d-iman n-ähaləs wärän iǵşed härät ed tənn'-as, əndähad, əgdälän-as imänäwnäwän n-ähaləs-en-däǵ eđəs.

20 Eǵǵädän imänokalän n-käl-tikutawen d-inušämän n-Işrayil, äşhäşşälän tamətte

i-ad-töttär dāḡ-gəfār ad-hasān-dd-isəwwəy Bārḡābbas, ämmät ʁisa.

²¹ Olās daḡ gəfār, inn'-asān: «Ǽndek jer-meddən-wi-dāḡ n-əssin wa s-tārham ad-hawānt-in-səwwəyyäḡ?» Ǽnnān-as: «Bārḡābbas.»

²² Inn'-asān Bilatəs: «ʁisa-š wa s-itawānna Ąlmasex, ma has-e-ājäḡ?» Ǽnnān-as iket-dāḡ-nāsān: «Itwəşləbet fäll-tajəttewt!»

²³ Inn'-asān Bilatəs: «Mafāl, ma iyşäd t-äsiinähäjjän d-tamättant?» Äşḡäyyän daḡ s-äşşahät: «Itwəşləbet fäll-tajəttewt.»

²⁴ Inhäy Bilatəs a-s wär t-illa a infa mäjräd-net ed, təssəntä tamətte amdərway n-əşşənju ḡas, idkäl-dd äkoss han aman, ässeräd ifassān-net dat-tamətte təzzar, inn'-asān: «Ähaləs-i-dāḡ ya ämaydal, täjjihäm a-s wär dāḡ-i ədmenän iman-net; oyyeḡ jere-wän dār-s.»

²⁵ Tənn'-as tamətte iket-net: «Ǽyya, nərda s-a-wen; ədmənnət iman-net dāḡ-näḡ näkkäneḡ d-ihäyawän-nänäḡ.»

²⁶ Äswäyy'-asān-in Bilatəs Bārḡābbas, äswäjjä tiwit n-ebärtäk dāḡ-ʁisa təzzar, ikf'-asān-t i-ad-itwəşləb fäll-tajəttewt.

Jän əssärdusa ʁisa tekäşkäšt

(Marqəs 15:16-20; Exya 19:2-3)

²⁷ Ǽlwäyän əssärdusa wi n-gəfār ʁisa s-ammas n-ehän wa n-gəfār, iḡläyḡäläy-t-dd dihen ejhän n-əssärdusa imdan,

²⁸ əkkäsän dāḡ-s isəlsa-net, əssəlsän-t anäkäbba šəggäḡän,

²⁹ jän-as älmät, korona, a-wen, takənbut şund ta n-imänokalän təzət dāḡ-isənnanän, jän älmät

täborit ta n-tömmönuköla dāḡ-āfuss-net wa n-aḡil, ad-rakkāḡān data-s, ḡazzān, jannen-as: «Ämänokal n-käl-Älyāhud, nəj'-ak ḡärdəbu!»

³⁰ Situfān fälla-s, tihāḡān dāḡ-s täborit ta jän dāḡ-āfuss-net, təggatān-t sär-s fäll-eḡāf.

³¹ Essəgdāhān dāḡ-tekāškāšt ta tən-təšlāt ḡas, əkkāsān-dd fälla-s anākäbba-wənnin šəggāḡān, əssoḡālān-as isəlsa-net təzzar, əḡlān dār-s i-ad-itwəšləb fäll-tajəttewt.

Atwəšləb n-ḡisa fäll-tajəttewt

(Marḡəs 15:21-32; Luḡa 23:26-43; Exya 19:17-27)

³² Əḡlan dār-s a-s ämmoqqāsān d-āhaləs n-tadābayt ta n-Qərwan s-isəm-net Simyon; äšhāššälān-t alənji n-tajəttewt ta fäll-mad-itwəšləb ḡisa.

³³ Əkkān d-ḡisa edägg s-itawānna: Gälgota, a-wen älmāḡna-net: «Edägg wa n-akärkor.» Əwwädān-in edägg-en ḡas,

³⁴ əssärtäyān əssärdusa asməd d-asāfar iyyān ifannāzān tisanant i-ad-has-t-səswən, māšan, äkräbbät-t ḡas, unjäy sär-s.

³⁵ Əšläbān-t əssärdusa fäll-tajəttewt ḡas, jän tisəḡeren i-ad-uḡanān isəlsa-net jer-iman-nāsān; ämoos a-wen a əssiitbätān a-wa s-kāla tən-innä ännābi iyyān a-s innä:

«Äzunān isəlsa-nin jer-iman-nāsān

jän tisəḡeren fäll-anākäbba-nin.»

³⁶ Əssəmdān a-wen-dāḡ ḡas, əqqimān, jän ənniyät i-ḡisa,

³⁷ ettəytäyän ällöx jənnəj-s i-ad-əlmədän äddinät äddälil wa sār-s dd-orāwän tamättant. Ällöx-en, iktab fälla-s:

«A-WA ƳISA WA N-ÄMÄNOKAL
N-KÄL-ÄLYÄHUD».

³⁸ Ašäl-en, ämizäyyen əssin inaytafän atwəşləb d-Ƴisa; ätwəşləb iyyän daw-aɣil-net, ätwəşləb wa iyyädän daw-täşälje-net.

³⁹ Iqqäl Ƴisa tekäşkäšt i-äddinät-wi tikəynen, gaggärän-t, siwliwilän iɣäfawän-näsän,

⁴⁰ jannen-as: «Əyyaa, käyy-i innän täddoobed teräzze n-ehän n-ämudd wa mäqqärän taləsäd-t edey dəɣ-käraɣ išilan, äɣləs iman-näk ya ämära! Kunta tidət-däɣ a-s käyy a-s Rure-s n-Mässinäɣ, zubbət-dd tajəttewt!»

⁴¹ Ad-ɗazzän dəɣ-s dəɣ imänokalän n-käl-tikutawen d-älɣulam d-Ätṭäwrät d-inušämän n-Işrayil, jannen:

⁴² «Wädden iɣläs äddinät wi iyyädnen, iɣləset ya iman-net ämära. Ikkəset-dd iman-net fäll-tajəttewt, dihen ad-nəfləs a-s ənta a-s ämänokal n-Işrayil;

⁴³ wädden oman s-Mässinäɣ, iɣləset-t Mässinäɣ ya ämära kunta ənta irh'-e, ed innä, ənta a-s Rure-s.»

⁴⁴ Eɡgädän-dd dəɣ inaytafän wi ätwəşləbnen edes-has, ad-t-gaggärän əntäneɗ-däɣ s-əmmək-en-däɣ.

Tamättant n-Ƴisa

(Marqəs 15:33-41; Luqa 23:44-49; Exya 19:28-30)

45 Əlsənät tihay əreri n-əkall iket-dəx-net wa-dəx n-tarəhut hundəx har tezzar.

46 Təjə tezzar ɣas, əsxərät Ƴisa s-afälla, innə dəx-tawalt-net:

«*Yällöy, Yällöy,*
lama sərbəxtani?»

A-wen əlməxna-net:

«Məssi-ɣ Məssinəx, Məssi-ɣ Məssinəx,
mafəl hi-təyyəd d-iman-in
dəx-tisnant-ta-dəx?»

47 Əslən-as əddinät əbdadnen dihen, wər-əfhemən a-wa ijənna ɣas, ad-jannen: «Səjdət-as, ənnəbi Ƴəli a iɣarr!»

48 Oşəl-dd iyyən dəx-sən əlwəqq-wen-dəx, issəlməx təduft tətallət fəll-əbori dəx-bənegər təzzar, əssok'-et-dd emm n-Ƴisa i-ad-tət-ismusəm, infəw-t a-wen dəx-fad

49 məşan, ənnən-as imidiwən-net: «Əşləy-as, əyy'-e ad-nənhəy kunta ad-t-dd-ass ənnəbi Ƴəli, ixləs-t.»

50 Əsxərät Ƴisa dəx s-əşşahət, təzzar, əjmədän-t iman.

51 Diha-dəx d-ija a-wen a-s ərido wa ibdən edəgg n-əmudd wa şəddijən d-wa iknən təşşədje dəx-ehən n-əmudd wa məqqārən da-dəx a-s iqqərrawət dəx-amməs, wa-dəx n-afälla-net har ider-net; əşkədkəq əkall, əşşoren idəyən;

52 əmerənät tizəska, ənkərən-dd inəmmuttan n-imumənən əjjootnen

53 ɗarət-tanəkra n-Ƴisa jer-inəmmuttan. Əjjəyhən əddinät əjjootnen tən-ənhaynen a-s dd-əjjəşən aɣrəm wa şəddijən n-Yərussəlam ɗarət tanəkra-nəsən jer-inəmmuttan.

⁵⁴ Inhäy käbtän iyyän n-käl-Roma d-össärdusa wi jänen önnyät i-ÿisa a-wa ijän d-aškədkəd wa ija äkall ɣas, ärmäɣän, ad-jannen: «Tidət-däɣ a-s ähaləs-i-däɣ, Rure-s n-Mässinäɣ.»

⁵⁵ Əbdadnät daɣ tideden äjjootnen dihen, əswadnät däɣ-ijəj däɣ-a-wa ijän iket-net. Tideden-tin-däɣ a-s kälä ədhälänät ÿisa, äddewnät där-s wa-däɣ n-a ifäl teje ta n-Galila har əntänäteɗ-da-däɣ;

⁵⁶ h'-enät Märyäma ta n-Muläzdaləyät d-Märyäma ta n-ma-s n-Yaqub d-Yusəf, h'-enät daɣ ma-s n-dägg-Zäbdi.

Azəkka n-ÿisa

(Marqəs 15:42-47; Luqa 23:50-56; Exya 19:38-42)

⁵⁷ Tokäy takkäşt ɣas, osä-dd ägg-ehäre iyyän la taɣrəmt ta n-Arimata n-anätɣalib n-ÿisa s-isəm-net Yusəf.

⁵⁸ Ənta-en-däɣ a ikkän Bilatəs, ittär däɣ-s turhajät n-ad-dd-ikkəs tafəkka n-ÿisa fäll-tajəttewt, iştär-tät; ird'-as Bilatəs s-a-wen.

⁵⁹ Ikkäs-dd Yusəf tafəkka n-ÿisa fäll-tajəttewt, ikn'-et, issəls'-et tefit

⁶⁰ təzzar, issəns'-et däɣ-azəkka äynayän s-äru t-iɣaş i-iman-net däɣ-esəwäl; äşɣäränɣarät-t-dd ɗarät-a-wen təhünt məqqoorät, ätɣubbät sār-s emm n-azəkka təzzar, iglä.

⁶¹ A-s itäjj a-wen-däɣ, təbdad Märyäma ta n-Muläzdaləyät d-tanəmmäɣrut-net ta iyyädät, äqqimänät tissənen dat-azəkka-en-däɣ, hannäynät a-wa ijän iket-net.

⁶² Äba Yisa däḡ-ašäl wa n-dat-wa d-siməjnun käl-Älyähud i-ašäl wa n-əssəbət-i n-täsonfat. Ašäl wa ilkämän i-wen n-əssəbət wa n-täsonfat, əkkän imänokalän n-käl-tikutawen d-käl-faris Bilatəs, ənnän-as:

⁶³ «Ämänokal-nänäḡ, nəkittəw a-s äwadəm wa išinməšrəyän äddinät, a-s iddär, innä, afäl t-äba, käraḍ išilan ḍarät-tamättant-net, ad-dd-inkär jer-inəmmuttan.

⁶⁴ Nārha däḡ-k, ad-səwwəjjəd ənniyät i-azəkka-net hundäḡ har akəyən käraḍ išilan-win-däḡ s-innä, dihen, wär mad-akrən inəṭṭulab-net tafəkka-net, əffärän-tät təzzar, ənnən i-tamətte a-s inkär-dd jer-inəmmuttan. Afäl jän a-wen, ad-tajär tanməšrayt ta jän ta ija ənta iman-net.»

⁶⁵ Inn'-asän Bilatəs: «Äjät a-wa s-tärhäm. Ənhəywät, härät däḡ-əssärdusa-dədi, səwwəjjəm-tän ənniyät i-azəkka s-əmmək wa s-tärhäm.»

⁶⁶ Əkkän azəkka, əssəbdädän data-s əssärdusa təzzar, əknän-t äṭabbu i-ad-wär-itədubut äwadəm wäl' iyyän arr-net.

28

Inkär-dd Yisa jer-inəmmuttan

(Marqəs 16:1-11; Luqa 24:1-12; Exya 20:1-10)

¹ Täbboqqät tifawt n-ašäl wa n-ḍarät wa n-əssəbət-i n-täsonfat ḡas, təkka Märyäma ta n-Muläzḍaləyät azəkka täddeew d-Märyäma ta iyyäḍät n-tanəmmäḡrut-net.

² A əndärrän, äzzubbät-dd änjälos n-Emäli dd-ifalän išənnawän, äškäḍkäḍ äkall s-äššahät,

äŝŷäraräd-in tähünt ta härät emm n-azəkka, äqqima fälla-s.

³ Änjälos-i-däŷ, äsimäŷmäŷ ŝund essam, jan isəlsa-net tøməlle-i-däŷ mäqqärät.

⁴ Ija a-wen ŷas, jän əssärdusa wi jänen ənniyät i-azəkka tarəmməŷt-ta-däŷ fäl dd-hän äbbunbäŷän ŝund ämmun.

⁵ Imməjräd änjälos i-tidəden, inn'-asnät: «Wär tärmeŷmät; əssanäŷ a-s Ÿisa wa ätwäŝläbän fäll-tajəttewt a-s tammäŷmät;

⁶ äbas t-illa diha, inkär-dd jer-inəmmuttan s-əmmək wa s-tän-innä, əyyäwmät, ənhəymät edägg wa s-käla däŷ-s insa.

⁷ Šəwənkətmät ämära, təjəmət isälan n-tanäkra-net jer-inəmmuttan i-inəttulab, tälläŷätmət-asän daŷ a-s äzzar-awän iket-näwän s-Galila ed dihen-däŷ ad-t-mad-tənhəyəm. Ənta-den-däŷ mäjräd wa s-dd-ämešäläŷ i-ad-hakmət-t-in-səssiwədəŷ.»

⁸ Fälnät ŝik azəkka, tärtay-asnät tarəmməŷt d-təməŷare n-tedäwit, ošälnät i-ad-əjənät jänät isälan däŷ-inəttulab-net.

⁹ Wär t-illa a hin-əjrahnät a-s hasnät-dd-ilkäd Ÿisa iman-net, ij'-asnät äsafu. Ohäznät-t-dd, ärkäŷnät data-s, ad-timəllutnät i-iðarän-net, ŷäbbädñät-t.

¹⁰ Inn'-asnät: «Wär tərmeŷmät, əqqəlmät ayətma-ŷ, tənnəmət-asän a-s, äzzaräŷ-asän s-teje ta n-Galila-i-däŷ hi-mad-ənhəyən.»

Utär n-akuddəl n-tanäkra n-Ÿisa jer-inəmmuttan

11 Härwa hanät zäbo, øglanät a-s økkän øssärdusa wi jänen ønniyät i-ažekka aŷrøm, äwwayän isälan n-a-wa ijän iket-net i-imänokalän n-käl-tikutawen.

12 Æslän imänokalän n-käl-tikutawen d-inušämän n-Işrayil i-isälan-win-däŷ ŷas, äñŷäymän fäl a-wen. Inkär älžämaŷät-näsän ŷas, økfän aŷrøf äjjeen i-øssärdusa tøzzar, ønnän-asän:

13 «Ere käwän-issøstänän, ännät-as: øsän-anäŷ-dd inøŷŷulab n-Ŷisa s-ehäð, nøŷŷas, økärän taføkka-net, øglän där-s.»

14 Ænnän i-øssärdusa: «Afäl øjjäšän isälan gøfär, ad-t-nøšøsmäð fälla-wän, täŷløšäm.»

15 Ärmäsän øssärdusa aŷrøf-näsän, øglän däŷ-øššäŷøl-näsän, jän a-wa hasän-ätwännän. Ämoos a-s isälan-win-däŷ a øfläsän käl-Älyähud har ašäl-i-däŷ.

Ämašal wa mäqqärän issäŷläf Ŷisa inøŷŷulab-net

(Marqøš 16:14-18; Luqa 24:36-49; Exya 20:19-23; Ijitän 1:6-8)

16 Ækkän inøŷŷulab wi n-märaw d-iyyän taðaxt ta hät teje ta n-Galila hasän-ija Ŷisa tašøssihärt, øgäzän-t-in fälla-s.

17 Ænhäyän-t ŷas, ärkäŷän-as, ad-t-ŷabbädän mäšan, hakd a-wen-däŷ, han-tän iyyäð däŷ-s janen äššäk.

18 Ohäž-dd Ŷisa älžämaŷät wa n-inøŷŷulab-net, inn'-asän: «Wär t-illa jer-išønnawän d-äkall a-s wädden øjrawäŷ fälla-s tärna;

19 a-wen-däŷ a fäl ämära, äglät; äkkät tiwsaten n-äddunya iket-däŷ-näsnät, søŷŷuløbäm

däḡ-snät äddinät, səlmäḡäm-tän däḡ-aman s-
isəm n-Abba d-Rure-s d-Unfas Šäddijän,
²⁰ säyrəm-tän amišəl n-a-wa s-hawän-omäräḡ
iket-net. Näkk-da, ad-där-wän äddewäḡ,
ədhaläḡ-käwän hak ašäl har төmdəw äddunya.»
Amin!

**Ălənžil n-Ÿisa Ălmasex: Kitab Ălmuqăddăs
Tamasheq: New Testament**

copyright © 2003 Wycliffe Bible Translators, Inc.

Language: (Tamasheq)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 18 Apr 2025 from source
files dated 29 Jan 2022

b95f369b-a236-5ca8-8cab-11f74279d73c